

**UNIVERSITY OF EDUCATION, WINNEBA**

**MOFO-SEMANTEKS MPENSEMPENSENMU FA AKAN ADEYE:  
BO, BU, DI NE HYE HO**



**Tiisisi a ewo Akan-Nzema Kasasua Asoee, 'Faculty of Ghanaian Languages  
Education', a mede akoma 'School of Graduate Studies',**

**sedee ebeboa ama manya abodin krataa wo  
'Master of Philosophy'  
(Ghanaian Languages Education – Twi)  
wo University of Education, Winneba mu.**

**OFORISUO, 2019**

## PAEMUKA

### OSUANI PAEMUKA

Me, Patrick Ntiamoah pae mu ka se, saa dwumadie yi ye nhwehwemu a m'ankasa na meyeεε. Se mede nea nkurofoε a mabobo won din wo dwumadie yi mu aka to nkyen a, nea aka nyinaa ye m'ankasa me nsa ano adwuma. Obiara nyeε emu fa anaa mua bi se ode repe abodin wo baabiara.

.....

Nsa ano din

.....

Da

### OHWEFOO PAEMUKA

Mepae mu ka se, me na mehweε dwumadie yi so, tenetene no maa no yeε nsiesie a efata senea University of Education, Winneba akwankyerε a wofa so de tenetene tiisisi dwumadie no te perepe.

DR KWAKU OFORI

.....

Nsa ano din

.....

Da

## DINTOO

Meto nwoma yi din ma wɔn a ɛsiane biribi nti wɔantumi anko suapɔn nyinaa.




## ASEDA

Sɛ mewɔ aseda, ayeyie ne nkamfoɔ bi a, mede bɛma Asafo Awurade a ɔka me ho mmerɛ nyinaa. Ono na ɔmaa me ahooɔden, nyansa, nimdeɛ ne akwankyerɛ a mede dii dwuma yi. Onyame Teasefoɔ, ayeyie nka wo din.

M'aseda a ɛdi ho kɔ ma me nhwɛsofoɔ, Dr Kwaku Ofori wɔ akwankyerɛ ne atenetene a ɔde maa me wɔ dwumadie yi mu. Enam n'atenetene ne n'akwankyerɛ so na ɛma yɛhunu dwumadie yi. Ɔpanin, Onyankopɔn nhyira wo.

Meda Owura Bright Amoah ne Owura Franklin Asamoah nso ase sɛ wɔmaa me nwoma a na mehia de dii dwuma yi.

Mesane da me nua Agyei Badu ne me nuanom nyinaa ase wɔ mmoa a wɔde ma me wɔ me sukuuko mu. M'aseda a ɛtwa toɔ kɔ ma me yɔnko, Nana Akua Atwemaa Mansa wɔ mmoa ahodoɔ ne nkuranhyɛ a ɔde maa me wɔ dwumadie yi mu. Akua, meda wo ase a ɛnsa da.



## EMU NSEM

<b>Ɔfa</b>	<b>Krataafa</b>
<b>PAEMUKA</b>	<b>iii</b>
<b>DINTOO</b>	<b>iv</b>
<b>ASEDA</b>	<b>v</b>
<b>EMU NSEM</b>	<b>vi</b>
<b>EPONO A EWƆ DWUMADIE YI MU</b>	<b>x</b>
<b>AGYINAHYEDEE AHODOO A EWƆ DWUMADIE YI MU ASEKYERE</b>	<b>xi</b>
<b>ANIM MUABOSEM</b>	<b>xii</b>
<b>ƆFA A EƆI KAN: DWUMADIE NO NNIANIMU</b>	<b>1</b>
1.0 Nnianimu	1
1.1 Dwumadie yi Nnyinasoo	1
1.2 Akan Kasa	4
1.3 Ohaw no Adiyie	4
1.4 Dwumadie yi Botace	5
1.5 Dwumadie yi ho Nsemmissa	6
1.6 Dwumadie yi ho Mfasoo	6
1.7 Dwumadie yi ho Akwansidee	6
1.8 Faako a Dwumadie yi Ano Kɔpem	6
1.9 Dwumadie yi Nhyehyee	7
1.10 Ɔfa yi Muaboo	8
<b>ƆFA A EƆO SO MMIENU: ANIMDEFOO BINOM ADWENKYERE</b>	<b>9</b>
2.0 Nnianimu	9
2.1 Mofologyi	9
2.1.1 Asehnini	12
2.1.2 Mmataho	13
2.1.2.1 Akan Adeye Mmataho	16
2.1.2.1.2 Oyefoo Dinnsiananmu	16

2.1.2.1.3	Kabea	17
2.1.3	Edinye (Nominalization)	19
2.1.4	Nsemfua Nkabomye (Compounding)	20
2.2	Semanteks	23
2.2.1	Homonim (Homonym)	24
2.2.2	Polesemi (Polysemy)	25
2.2.3	Anantebo (Collocation)	26
2.3	Metafo	26
2.4	Nhwehwemu-dwuma a ene Dwumadie yi wo Twaka (Related Works)	27
2.5	Dwumadie yi ho Tiori	36
2.6	Ofa yi Muabo	38
<b>OFA A ETŌ SO MMIENSA: DWUMADIE YI HO AKWANKYERE</b>		<b>39</b>
3.0	Nnianimu	39
3.1	Nhwehwemu no Su	39
3.2	Mmeaee a Nhwehwemu no Koo so	40
3.3	Nnipa a Mede won Dii Dwuma	40
3.4	Okwan a Mefaa so Paa Nnipa no	41
3.5	Akwan a Mefaa so Nyaa Nsem de Dii Dwuma yi	42
3.5.1	Dawubo Nnwuma (Media)	42
3.5.2	Nsem a ewo Nwoma mu (Literary Texts)	42
3.5.2.1	Nsemfua Nkyereasee Nwoma (Dictionary)	42
3.5.2.2	Akan Nwoma	43
3.5.2.3	Twere Kronkron	43
3.5.3	Nkɔmmɔtwetwe (Interviews)	43
3.6	Senea Mede Nsem no Too Dwa	44
3.7	Ofa yi Muabo	44

<b>ƆFA A ETƆ SO NNAN: NSEM NO MPENSEMPENSENMU</b>	<b>45</b>
4.0 Nnianimu	45
4.1 Adeye Bɔ, Bu, Di ne Hye Nkyerɛaseɛ	45
4.1.1 Bɔ Nkyerɛaseɛ	45
4.1.2 Bu Nkyerɛaseɛ	46
4.1.3 Di Nkyerɛaseɛ	47
4.1.4 Hye Nkyerɛaseɛ	47
4.2 Nsemfua a Yɛnya firi Adeye: Bɔ, Bu, Di ne Hye mu	49
4.2.1 Nsemfua a Yɛnya firi Bɔ mu	49
4.2.2 Nsemfua a Yɛnya firi Bu mu	54
4.2.3 Nsemfua a Yɛnya firi Di mu	56
4.2.4 Nsemfua a Yɛnya firi Hye mu	61
4.3 Nsemfua a Yɛnya firi Adeye: Bɔ, Bu, Di ne Hye mu Nkyerɛaseɛ	64
4.3.1 Nsemfua a Yɛnya firi Bɔ mu Nkyerɛaseɛ	64
4.3.2 Nsemfua a Yɛnya firi Bu mu Asekyerɛ	77
4.3.3 Nsemfua a Yɛnya firi Di mu Asekyerɛ	81
4.3.4 Nsemfua a Yɛnya firi Hye mu Asekyerɛ	91
4.4 Adeye Bɔ, Bu ne Hye Anantebɔ (Collocants)	99
4.4.1 Bɔ Anantebɔ (Bɔ Collocants)	99
4.4.2 Bu Anantebɔ (Bu Collocants)	107
4.4.3 Hye Anantebɔ (Hye Collocants)	110
4.5 Nsem no Mpensempensɛnmu wɔ Adwenemusem Metafɔ Tiɔri ne Adwenemu Semanteks mu	114
4.6 Ɔfa yi Muabɔ	115
<b>ƆFA A ETƆ SO NNUM: MUABƆ, ADWENKYERɛ NE AWIEBɛ</b>	<b>116</b>
5.0 Nnianimu	116
5.1 Dwumadie yi Nyinaa Muabɔ	116
5.2 Adwenkyerɛ	119

5.3	Awieee	119
	<b>MMOA NWOMA</b>	<b>121</b>
	<b>NKEKAHO I: DWUMADIE YI MU NSEMFOA NKABOM BI</b>	<b>126</b>
	<b>NKEKAHO II: DWUMADIE YI MU ANANTEBO BI</b>	<b>128</b>





## EPONO A EWƆ DWUMADIE YI MU

**Ɛpono**

Ɛpono 1.1: Nnipa no ho Nsem

**Krataafa**

41



## AGYINAHYEDEE AHODOO A EWƆ DWUMADIE YI MU

### ASEKYERE

ADY.	-	Adeye
AN.	-	Anammontuo
AYK.	-	Ayewie Kabea
BB.	-	Bɔbea
BK.	-	Baako Kabea
DOD.	-	Dodoɔ
DK.	-	Daakye Kabea
ED.	-	Edin
EDAKYI.	-	Edinakyisibea
F	-	Fante
KM.	-	Kumaa
NKY.	-	Edin Nkyerekyeremu
NSK.	-	Nsiakyire
NSM.	-	Nsianim
OKY.	-	Okyerɛfoɔ
TK.	-	Twam Kabea



## ANIM MUABOSEM

Nhwehwemu-dwuma yi ye mofɔ-semanteks mpensempenseɛnmu fa Akan adeye *bo*, *bu*, *di* ne *hye* ho. Dwumadie yi botaeɛ ne se ebɛhwɛwɛ adeye yi mu biara nkyerɛaseɛ ankasa ne ne nkyerɛaseɛ ahodoɔ, na asane ahwe mofɔlogyi akwan a yetumi fa so de nya nsemfua aforɔɔ firi adeye yi mu ne nsemfua aforɔɔ yi nso nkyerɛaseɛ ne wɔn metafo ntrɛmu ahodoɔ. Nsem a mede yee nhwehwemu yi menyaa bi firii Christaler (1933) ne Legon-Zurich-Trondheim (2011) Akan nsemfua nkyerɛaseɛ nwoma mu ne nkɔmmɔtwetwe a ekɔɔ so wɔ me ne nnipa binom ntam. Dwumadie yi twe adwene si so se adeye yi mu biara wowɔ ne nkyerɛaseɛ ankasa ne ne nkyerɛaseɛ ahodoɔ. Ema yehunu se mofɔlogyi akwan a yetumi fa so de nya nsemfua aforɔɔ firi adeye yi mu ye edinye ne nsemfua nkabomye. Nsemfua aforɔɔ a menyaa firii adeye (*bo*, *bu*, *di* ne *hye*) mu wɔ dwumadie yi mu nyinaa ye edin. Dwumadie yi si Appah (2016) nhwehwemu so dua se yetumi fa nsemfua nkabomye so de nya edin firi adeye mu. Yesane hunu se nsemfua aforɔɔ a yɛnya firi adeye yi mu nyinaa wowɔ wɔn nkyerɛaseɛ ne wɔn metafo ntrɛmu ahodoɔ. Dwumadie yi sane da no adi se adeye yi wowɔ nsemfua bi a etaa ne wɔn nante bom (anantebɔ) ma yɛn nkyerɛaseɛ ne metafo ntrɛmu ahodoɔ. Tiori a megyinaa so de yee nsem no mpensempenseɛnmu wɔ dwumadie yi mu ye adwenemusem metafo tiori (Lakoff ne Johnson, 1980) ne adwenemu semanteks (Lakoff, 1988).



## ƆFA A ƐDI KAN

### DWUMADIE NO NNIANIMU

#### 1.0 Nnianimu

Nhwehwemu yi fa a ɛdi kan da dwumadie no adi. Ɔfa yi kɔ so kyere dwumadie yi nnyinasoɔ, Akan kasa ne ɔhaw no adiyie. Ɔfa yi sane kyere dwumadie yi botaeɛ, ɛho nsemfua, ɛho mfasoɔ, ɛho akwansideɛ, faako a dwumadie yi ano kɔpem ne ne nhyehyeeɛ.

#### 1.1 Dwumadie yi Nnyinasoɔ

Adeye ne nsenkuo a ɛkyere biribi a obi (ɔyefoɔ) ye anaa tebea a ɔyefoɔ no wɔ mu (Agyekum, 2010:91). Akrofi (2011:12) nso kyere adeye mu se eye nsemfua anaa nsenkuo a ɛma onipa anaa aboa bi tumi ye biribi anaa adeɛ bi. Adeye ho hia yie pa ara wɔ wiase kasa ahodoɔ nyinaa mu. Ɛrekame aye se ɔkasamu biara de adeye asemfua/nsemfua di dwuma ansa na ne nteaseɛ awie pɛye wɔ ɔkasa bi mu. Agyekum (2010) de to dwa se Akan adeye wɔ nkyekyemu nsia, ɛnonom ne;

- (1) i. Nea ɛkyere biribi a wɔye. Se ebia; da, tu, popa, pia.
- ii. Nea ɛkyere tebea a ɔyefoɔ no wɔ mu. Se ebia; sua, so, yare.
- iii. Nea ɛkyere atenka anaa nea obi nya. Se ebia; hia, pɛ, hunu.
- iv. Ɔkasa adeye nsem. Se ebia; ka, kasa, bisa.
- v. Anammɔntuo adeye. Se ebia; kɔ, bra, siane, dwane.
- vi. Nsesaeɛ adeye. Se ebia; bu, kyea, moa, pae.

Yɛtumi de adeye a ɛwɔ soro yi mu biara di dwuma ahodoɔ ma wɔn nteaseɛ di mu wɔ yen nkitahodie mu.

Nteaseɛ ye adeɛ a ɛho hia yie pa ara wɔ nnipa nkitahodie mu. Nteaseɛ a ɛwɔ nnipa nkitahodie mu no fapem no ara gyina nsemfua ahodoɔ a wɔde di dwuma wɔ nkasaeɛ no mu. Pierce (1995) kyere mu se nsemfua ne kasa biara nnyinasoɔ. Nsemfua binom

wɔ ho a wɔwɔ nteaseɛ mmieniu mmieniu anaa nea ɛboro saa. Berɛ ne faako a ɔkasafɔɔ bi de asemfua pɔtee bi bɛdi dwuma no na ɛbɛkyerɛ nteaseɛ a ɔpɛ sɛ n'atiefɔɔ nya firi n'asɛnka no mu. Riemer (2010) da no adi sɛ ɔkwan a yɛfa so hyehye asemfua bi tumi kyere nteaseɛ korɔ a saa asemfua no bɛnya wɔ ɔkasa bi mu.

Ɔkwan a yɛfa so hyehye asemfua na lengwesteks nwomanimfɔɔ frɛ no mɔfɔlɔgyi no. Gruyter (2000) de to dwa sɛ onipa a ɔdii kan de asemfua *mɔfɔlɔgyi* dii dwuma wɔ lengwesteks mu yɛ Germanni a wɔfrɛ no August Schleicher wɔ 1859 mu. Aronoff (1976) kyere mɔfɔlɔgyi mu sɛ ɛyɛ ɔkasa mu nhwehwɛmu a ɛfa nsemfua nhyehyɛɛɛ ne sɛdeɛ yɛyɛ nsemfua ho. Lieber (2009) nso kyere mɔfɔlɔgyi mu sɛ ɛyɛ adesua a ɛfa nsemfuayɛ ho, a ebi ne akwan a nsemfua aforɔɔ fa so ba wɔ ewiase kasa ahodoɔ mu. Lieber kɔ so kyere mu sɛ, sɛnti a ɔkasa bi de mɔfɔlɔgyi di dwuma ne sɛ ɛbɛyɛ nsemfua aforɔɔ aka nsemfua dada a saa ɔkasa no wɔ ho.

Adeɛ baako a ɛdi tintiban wɔ nsemfuayɛ ho wɔ mɔfɔlɔgyi adesua mu a ɛwɔ sɛ yetwe adwene si so yɛ mɔɔfɛm. Mprɛ pii no, yetaa keka mɔɔfɛm ahodoɔ bobom na yɛde ayɛ nsemfua. Katamba (1993) ne Thakur (2010) kyere mɔɔfɛm mu sɛ ɛyɛ nteaseɛ kumaa bi a ɛwɔ ɔkasa mu. Wei kyere sɛ ansa na yɛbɛka sɛ adeɛ bi yɛ mɔɔfɛm wɔ lengwesteks mu no na ɛtwa sɛ ɛwɔ nteaseɛ pɔtee bi. Mɔɔfɛm gu ahodoɔ mmieniu; yɛwɔ nea ɛno nko ara tumi gyina ne ho so ma nteaseɛ ne nea ɛno nko ara ntumi nnyina ne ho so mma nteaseɛ. Mɔɔfɛm a ɛtumi gyina ne ho so ma nteaseɛ no yɛfrɛ no ahosodi mɔɔfɛm, ɛnna mɔɔfɛm a ɛntumi nnyina ne ho so mma nteaseɛ no nso yɛfrɛ no mfamho mɔɔfɛm (Anderson, 1992).

Lieber (2009) kyere asemfua mu sɛ ɛyɛ mɔɔfɛm baako anaa nea ɛboro saa a ɛtumi gyina ne ho so wɔ ɔkasa mu. Ɔda no adi sɛ yɛfrɛ asemfua a ɛkuta mɔɔfɛm baako asemfua tiawa, ɛnna asemfua a ɛkura mɔɔfɛm mmieniu anaa nea ɛboro saa no nso yɛfrɛ no asemfua tenten/kuntann.

Adesua a εfa nteaseε ho wɔ ɔkasa mu nso yεfrε no semanteks (Hurford, 2007). Lobner (2002) de to dwa sε semanteks botaeε ara ne sε εhwε nteaseε a εwɔ lengwesteks nkasaeε bi te sε asemfua, ɔkasasin ne ɔkasamu mu. Sε megyina nkyerekyeremu a abenfoɔ yi de ato dwa fa semanteks ho yi so a, na εkyere sε asemfua, ɔkasasin ne ɔkasamu biara wɔ ne nteaseε soronko wɔ ɔkasa bi mu.

Adeε baako nso a εho hia yie wɔ nteaseε adesua mu ye metafo. Litirikya adesua mu no, metafo ye kasasu a εkyere sε yede adeε bi retoto ade foforo a ene no nse anaa ene no nni twaka ho de akyerε nsodie a εwɔ saa nneεma mmienno mu (Amuah, 2009) ne (Agyekum, 2011). Yεtaa de adeye asem 'ye' na εkyere nsodie a εwɔ saa nneεma mmienno ntam. Agyekum de to dwa sε yebetumi anya nkasaeε bi te sε *X ye Y*. Yede *X* retoto *Y* ho no kyere sε *X* wɔ *Y* su ahodoɔ nyinaa. Sε yεnya nhwesoo bi te sε *X ye prako* a, na εkyere sε *X* kura suban a prako wɔ nyinaa bi. Weinom mu bi ne adididodoɔ, awododoɔ, eburo, hwe a ɔnhwe mma, ne ade.

Semanteks mu no, metafo ne sε asemfua anaa nkasaeε bi nteaseε ankasa asesa (Amuah, 2009). Lakoff ne Johnson (1980) da no adi sε, sε ɔkasa bi nyini duru mpempensoo bi a, asemfua bi tumi nya nteaseε foforo ka ne nteaseε ankasa ho. Etumi mpo ba sε nteaseε a na asemfua bi kura kane no tumi sesa ma εkofa nteaseε foforo koraa wɔ metafo kwan so. Fromkin ne Rodman (1998) kyere mu sε kasa ahodoɔ bebree fa metafo kwan so de nya nsem ahodoɔ ka nsem a wowo ho. Akan kasa gu so renyini no, nsemfua binom anyinya nkyereaseε ahodoɔ akeka won nkyereaseε ankasa ho wɔ metafo kwan so.

Dwumadie yi ye mfo-semanteks mpensempensenu fa Akan adeye *bo*, *bu*, *di* ne *hye* ho. Mfo-semanteks botaeε ne sε εbehwe ɔkwan a yεfa so ye asemfua bi na asane ahwe nteaseε anaa nkyereaseε a εwɔ saa asemfua no mu. Adeye a mede yeε nhwehwemu yi mu biara wowo nkyereaseε ahodoɔ, senea Akan nsemfua bi tee no. Afei nso, yetumi fa mofologyi akwan bi te sε edinye (nominalization) ne nsemfua

nkabomye (compounding) so de nya nsemfua afoforo firi saa adeye yi mu. Bio, nsemfua ahodoɔ a yɛnya firi adeye yi biara mu nso wowɔ nkyerɛaseɛ ahodoɔ wɔ Akan kasa mu, enti dwumadie yi behwe saa nsemfua ahodoɔ yi ne wɔn nkyerɛaseɛ no.

## 1.2 Akan Kasa

Akan yɛ Kwa kasa a ɛka ‘Niger Congo Phylum’ kasa ahodoɔ no ho bi. Wɔka Akan kasa pa ara wɔ Ghana, ɛna wɔsane nso ka Akan kasa wɔ Ivory Coast fa bi. Akan kasa wɔ nkorabata bebree, ɛbi ne; Asante, Akuapem, Fante, Bono, Akyem, Sefwi, Wassa, Kwahu, Akwamu, ne ade. Okasa no nkorabata yi nyinaa no, nea wɔsua no wɔ sukuu mu ne Asante, Akuapem ne Fante. Asante ne Akuapem ka bom a na yɛfrɛ no Twi no (Adomako, 2015).

‘Ghana Statistical Service’ (2010) de to dwa sɛ Ghana nnipa bebore ɔha mu nkyekyɛmu aduanan (40%) tɛ Akan kasa no sane tumi ka no yie pa ara wɔ ɔman Ghana mu. Adomako (2015) nso kyerɛ mu sɛ Akan ne Ghana kasa a ɛnnɛ mmere yi ɔmanfoɔ taa de di dwuma pa ara wɔ ɔman yi nwomasua, dwadie ne nsentwere nnwuma mu.

## 1.3 Ohaw no Adiyie

Lengwesteks nhwehwɛmu bebree na akɔ so wɔ wiase kasa ahodoɔ mu a Akan kasa nso ka ho bi. Schneider (2010) mɔfo-semantic mpɛnsɛmpɛnsɛnmu a ɛfa Hebrew adeye ho da no adi sɛ yɛtumi de mmataho femfam Hebrew adeye bi ho ma yɛnya nsemfua ne nkyerɛaseɛ ahodoɔ firi adeye no mu. Barnabas, Wappah ne nkaɛɛ (2013) nso ayɛ mɔfo-semantic nhwehwɛmu afa Kamue nnipa din ho. Wɔde to dwa sɛ Kamue din no bi yɛ nsemfua nkabom a wɔwɔ wɔn mɔfoɔlogyi nhyehyɛɛ ne wɔn nkyerɛaseɛ ahodoɔ. Buernortey (2013) pɔlesɛmi ne metafo mpɛnsɛmpɛnsɛnmu a ɛfa Dangme adeye yɛ ‘di’, na ‘hunu’, nu ‘nom’, fia ‘bɔ’ ne kpa ‘gyae’ ho da no adi sɛ adeye yi wowɔ wɔn nkyerɛaseɛ ankasa ne wɔn metafo ntrɛmu ahodoɔ.

Mɔfɔlɔgyi ne semanteks nhwehwɛmu a akɔ so afa Akan adeye ho bi ne; Agyekum (2001) ahwe nsemfua a yɛfa mmatahoyɛ ne nsemfua nkabomyɛ so nya firi Akan adeye ‘hunu’ mu ne wɔn metafo ntrɛmu ahodoɔ. Adomako (2012) nso ayɛ nhwehwɛmu afa Akan adeye dinyɛ ho. Okyerɛ mu sɛ yetumi de tuon, mmataho (nsianim/ne nsiakyire) femfam adeye bi ho de nya edin nsemfua (nominals) firi mu. Sekyi-Baidoo (2013) nso fa adeye kasasin semanteks ho. Ɛda adi wɔ ne nhwehwɛmu-dwuma no mu sɛ Akan adeye kasasin dodoo no ara wowo nkyerɛaseɛ ahodoɔ. Saa ara nso na Agyepong (2017) ayɛ semanteks nhwehwɛmu afa Akan adeye a ɛkyerɛ ntwitwaeɛ ne mmubuiɛ ho. Agyepong, Amfo ne nkaɛɛ (2017) nso ahwe adeye ‘di’ ne ‘nom’ nkyerɛaseɛ ankasa ne wɔn metafo ntrɛmu ahodoɔ.

Nwomanipfoɔ yi ne afoforo binom nhwehwɛmu a wɔayɛ afa Akan adeye ho no, wɔn mu biara anhwɛ adeye *bɔ*, *bu*, *di* ne *hyɛ* mɔfo-semanteks, ne saa nti ama kwan (gap) abɛda ho. Saa adeye yi wowo nteaseɛ/nkyerɛaseɛ ahodoɔ a ɛsɛ fata sɛ nhwehwɛmu-dwuma bi kɔ so fa ho wɔ mɔfo-semanteks mu, na aboa de nkyerɛaseɛ ahodoɔ yi ato dwa wɔ Akan kasa mu. Ne saa nti na nhwehwɛmu-dwuma yi koo so.

#### 1.4 Dwumadie yi Botaeɛ

Dwumadie yi botaeɛ ara ne sɛ;

- i. Ɛbɛhwɛ adeye ‘bɔ’, ‘bu’, ‘di’ ne ‘hyɛ’ nkyerɛaseɛ ankasa ne wɔn nkyerɛaseɛ ahodoɔ.
- ii. Ɛbɛhwɛ nsemfua a yɛbetumi anya afiri adeye: ‘bɔ’, ‘bu’, ‘di’ ne ‘hyɛ’ mu wɔ mɔfɔlɔgyi akwan so.
- iii. Ɛbɛhwɛ nsemfua a yɛnya firi adeye yi mu nkyerɛaseɛ ahodoɔ.



### 1.5 Dwumadie yi ho Nsemmissa

Nsemmissa ahodoɔ a dwumadie yi gyina so ne sɛ;

- i) Adeyɛ ‘bɔ’, ‘bu’, ‘di’ ne ‘hyɛ’ nkyerɛasɛɛ ankasa ne wɔn nkyerɛasɛɛ ahodoɔ ne sɛn?
- ii) Nsemfua bɛn na yɛbɛtumi afa mɔfɔlɔgyi akwan so anya afiri adeyɛ: ‘bɔ’, ‘bu’, ‘di’ ne ‘hyɛ’ mu?
- iii) Nsemfua a yɛnya firi adeyɛ yi mu nkyerɛasɛɛ ne sɛn?

### 1.6 Dwumadie yi ho Mfasoɔ

Mfasoɔ a ɛwɔ nhwehwɛmu-dwuma yi ho ne sɛ;

- i. ɛbɛma lengwesteks nhwehwɛmufɔɔ ahunu nkyerɛasɛɛ ahodoɔ a ɛwɔ adeyɛ a mede dii dwuma yi mu.
- ii. Bio, ɛbɛboa ama nhwehwɛmufɔɔ ahunu mɔfɔlɔgyi akwan a yɛfa so de nya nsemfua aforɔɔ firi saa adeyɛ yi mu.
- iii. Afei, ɛbɛma nhwehwɛmufɔɔ ahunu nkyerɛasɛɛ ahodoɔ a ɛwɔ nsemfua a yɛnya firi adeyɛ yi mu.
- iv. ɛbɛsane ayɛ mmoa nwoma ama wɔn a wɔpɛ sɛ wɔyɛ nhwehwɛmu fa Akan ne kasa aforɔɔ adeyɛ ho wɔ mɔfɔlɔgyi ne semanteks mu.

### 1.7 Dwumadie yi ho Akwansidɛɛ

Akwansidɛɛ kakra a mehyiaa no wɔ nhwehwɛmu-dwuma yi mu ara ne sɛ, ɛsiane adaagye a na nnipa a me ne wɔn dii nkutaho no nni nti amma me nsa anka nsem (deta) no ntɛm. Wei twee berɛ a anka na ɛwɔ sɛ mewie dwumadie yi kɔɔ akyire kakra.

### 1.8 Faako a Dwumadie yi Ano Kɔpɛm

Adeyɛ ho adesua yɛ adeɛ a ɛmu dɔ na ɛwɔ afaafa bebree. ɛbi tumi yɛ nea ɛfa adeyɛ no fɔnɔlɔgyi, mɔfɔlɔgyi, sentase ne ne semanteks ho. Wei nyinaa mu no, nhwehwɛmu yi

botaeɛ ne sɛ ɛbɛyɛ mɔfɔ-semanteks mpɛnsɛmpɛnsɛnmu afa Akan adeyɛ nsemfua bi ho.

Akan adeyɛ no dɔɔso, nanso dwumadie yi mfa ne nyinaa ho, na mmom ɛfa adeyɛ ‘bɔ’, ‘bu’, ‘di’ ne ‘hyɛ’ mɔfɔ-semanteks ho. Sɛnti a adeyɛ yi na dwumadie yi fa ho ne sɛ, ɛwɔwɔ nkyerɛaseɛ ahodoɔ a ɛsɛ fata sɛ nhwehwɛmu-dwuma bi kɔ so fa ho, na aboa de saa nkyerɛaseɛ ahodoɔ yi ato dwa. Nhwehwɛmu yi kɔ so wɔ Nkenkaasu a ɛwɔ Ofenso Atifi Mansini mu wɔ Asante Mantam mu ne Dadeɛsoaba a ɛwɔ Asutifi Anaafɔ Mansini mu wɔ Ahafo Mantam mu.

### 1.9 Dwumadie yi Nhyehyɛɛ

Dwumadie yi wɔ afaafa nnum. Ofa a ɛdi kan no da nhwehwɛmu-dwuma no adi. Ɛkɔ so kyere dwumadie no nnyinasɔ, Akan kasa, ɔkwan a ɔhaw no fa so yi ne ho adi, dwumadie yi botaeɛ ne ɛho nsemmissa, ɛho mfasɔ, ɛho akwansideɛ ne faako a dwumadie yi ano kɔpem.

Ofa a ɛtɔ so mmieniu kyere nea abenfoɔ binom de ato dwa a ɛne dwumadie yi wɔ twaka wɔ mɔfɔlɔgyi, semanteks ne metafoɔ mu. Ɛsiane sɛ deɛ wadi kan na yetu n’akyi gya nti, ɛsɛ fata sɛ mehwe wɔn adwenkyere fa saa nsempɔ atitire yi ho, na aboa ama me dwumadie yi adi mu.

Ofa a ɛtɔ so mmiɛnsa da dwumadie yi ho akwankyerɛ nso adi. Ɛha na mɛkyere nhwehwɛmu no su, faako a nhwehwɛmu no kɔ so, nnipa a mede wɔn dii dwuma ne akwan a mɛfaa so nyaa nsem de dii dwuma no.

Dwumadie yi fa a ɛtɔ so nnan mu na mɛfa mɔfɔlɔgyi ne semanteks akwan so aye mpɛnsɛmpɛnsɛnmu afa adeyɛ a mede yɛɛ nhwehwɛmu yi ho. Ofa yi mu ara na mede nkyerɛaseɛ ahodoɔ a mɛnya afiri adeyɛ yi mu nso bɛto dwa.

Ofa a ɛtwa toɔ no de nhwehwɛmu-dwuma yi muabɔ, m’adwenkyere ne n’awieɛ nso bɛto dwa.

### 1.10 Ofa yi Muabo

Ofa yi ada dwumadie yi adi de ne nnianimu ato dwa. Ofa yi ako so akyerɛ dwumadie no nnyinasoɔ, Akan kasa ne sɛnea ɔhaw no yi ne ho adi. Ofa yi asane akyerɛ dwumadie yi botaeɛ, ɛho nsemmissa, ɛho mfasoɔ, ɛho akwansideɛ, faako a nhwehwɛmu yi ano kɔpɛm ne ne nhyehyɛɛɛ. Ofa a ɛto so mmienu no kyerɛ nea abenfoɔ binom de ato dwa a ɛne dwumadie yi wɔ twaka.



## ƆFA A ƐTO SO MMIENU

### ANIMDEFƆO BINOM ADWENKYERE

#### 2.0 Nnianimu

Dwumadie yi fa a Ɛto so mmienu mu na mede adwenkyere ahodoƆ a animdefoƆ binom de ato dwa a Ɛne me dwumadie yi wo twaka beƆto dwa. Nhwewemu bebreƆ na ako so afa mofologyi ne semanteks ho, enti ƐƐ fata se mede bi to dwa wo Ɔfa yi mu na aboa ahye me dwumadie yi mu kena. Ɔfa yi behwe mofologyi ne ne nhyehyeeƆ te se; asenhini, mmataho, Akan adeye mmataho, edinye ne nsemfua nkabomye. Ɛbesane akyerƆ semanteks ne ne nhyehyeeƆ te se; homonim, polesemi ne anantebo. Ɔfa yi nso betwe adwene asi metafo, nhwewemu-dwuma a Ɛne dwumadie yi wo twaka ne dwumadie yi ho tiori so.

#### 2.1 Mofologyi

Aronof (1976) de to dwa se German nwomanimfoƆ Johann Wolfgang von Goethe na Ɔdii kan de asemfua *mofologyi* dii dwuma wo baelogyi mu wo 19<sup>th</sup> century mu. Asemfua mofologyi aboseƆ firi Greek kasa mu a 'mof' kyerƆ biribi su, Ɛna 'logyi' nso kyerƆ se woƆsua biribi. Mofologyi ne se woƆsua biribi su. Wo baelogyi mu no, mofologyi ne se woƆsua mmoa su. Aronof ko so kyerƆ mu se wo gyeografi adesua mu no, mofologyi ne se woƆsua seneƆ asase su tee.

Gruyter (2000:1) nso da no adi se onipa a Ɔdii kan de asemfua *mofologyi* dii dwuma wo lengwesteks mu ye Germani a woƆre no August Schleicher wo 1859 mu. Aronof (1976) kyerƆ mofologyi mu se eye Ɔkasa mu nhwewemu a Ɛfa nsemfua nhyehyeeƆ ne seƆeƆ yeƆe nsemfua ho. Anderson (1992:22) de to dwa se mofologyi adesua botaeƆ ne se ebehwehwe nsemfua su, na asane ahwe akwan a nsemfua no fa so ne nsemfua binom keka bom di dwuma wo Ɔkasamu mu.

Katamba (1993) hunu mofologyi se eye lengwesteks fa bi a ehwe sedee asemfua su anaa ne nhyehyeee si tee wo kasa bi mu. Lieber (2009:6) de foa so se mofologyi ye adesua a efa nsemfuaye ho, a ebi ne akwan a nsemfua afororo fa so ba wo ewiase kasa ahodoɔ mu. Senti a okasa bi de mofologyi di dwuma ne se ebeye nsemfua afororo aka nsemfua dada a saa okasa no wo ho.

Hayes (2009:103) kyere mofologyi mu se eye lengwesteks adesua a ehwe nsemfua nhyehyeee ho. Kirby ne Bowers (2012) nso da no adi se mofologyi fa senea yehyehye nsemfua ho. Kirby ne Bowers hunu mofologyi se ene semanteks wo twaka. Senti a mofologyi ne semanteks wo twaka ne se, asemfua bi nhyehyeee tumi nya nsunsuansoo wo nkyereasee a ebanya so. Esiane se asemfua biara ne ne mofologyi nti, asemfua biara nso ne nkyereasee pɔtee a ewo.

Lengwesteks mu no, mofologyi ye adesua a efa nsemfua nhyehyeee ho. Se yeye mofologyi ho mpensempensemu a, na yerehwe okwan a yefa so de moofem hyehye nsemfua. Adeɛ baako a edi tintiban wo nsemfuaye ho wo mofologyi adesua mu a ewo se yetwe adwene si so ye moofem. Mpre pii no, yetaa keka moofem ahodoɔ bobom na yede aye nsemfua.


Agyapong (2013) de foa so se, se yeka nsemfua nhyehyeee anaa nsemfua boɔɔa sua a, ene se woreye nhwehwemu afa moofem a ewowo kasa bi nsemfua mu. Saa nhwehwemu yi na ebeɔa ama yeahunu senea asemfua bi tee ankasa ne okwan a ne su fa so da adi. Se obi nim moofem ahodoɔ a ewowo asemfua bi mu anaa senea asemfua koro no su si tee a, eɔa no ma asemfua no bo mpo ye fo ma no.

Katamba (1993) kyere moofem mu se eye asemfua mu nkyekyemu a ekura nteasee pɔtee bi. Saa ara nso na Thakur (2010:2) de foa so se moofem ye nteasee kumaa bi a ewo okasa mu. Thakur nkyeremu yi da no adi se asemfua fa bi a ema nteasee a wokye mu bio a entumi mma nteasee bio na lengwesteks nwomanimfoɔ fre no moofem no.

Mɔɔfem gu ahodoɔ mmieniu, enonom ne ahosodi ne mfamho mɔɔfem (Thakur, 2010). Lengwesteks nwomanimfoɔ kyerɛ mu sɛ ahosodi mɔɔfem yɛ mɔɔfem a eno nko ara tumi gyina ne ho so ma nteaseɛ. Wei kyerɛ sɛ ahosodi mɔɔfem nhia sɛ ɛde ne ho bebata mɔɔfem foforo ho ansa na ne nteaseɛ awie pɛyɛ wɔ ɔkasa bi mu. Mfamho mɔɔfem nso yɛ mɔɔfem a n'ankasa ntumi nnyina ne ho so mma nteaseɛ, na mmom gye sɛ berɛ biara ɛfam mɔɔfem foforo bi te sɛ ahosodi ho ansa na ne nteaseɛ awie pɛyɛ.

Senca Lieber (2009:3) de to dwa no, asemfua yɛ mɔɔfem baako anaa nea ɛboro saa a ɛtumi gyina ne ho so wɔ ɔkasa mu. Yɛfrɛ asemfua a ɛkuta mɔɔfem baako asemfua tiawa. Asemfua tiawa ho nhwɛsoɔ bi ne:

- (2) i. kɔ
- ii. sekan
- iii. dua
- iv. kɛsɛɛ



Senti a nsemfua a ɛwowɔ nhwɛsoɔ (2i-iv) mu yɛ ntiawa ne sɛ ɛmu biara wowɔ mɔɔfem mmaako mmaako. Lieber kɔ so kyerɛ mu sɛ asemfua a ɛkura mɔɔfem mmieniu anaa nea ɛboro saa no nso yɛfrɛ no asemfua tenten/kuntann. Asemfua tenten/kuntann ho nhwɛsoɔ bi ne:

- (3) i. kɔɛɛ
- ii. dadewa
- iii. akɛsɛɛ
- iv. asuafoɔ

Nhwɛsoɔ (3i) mu no, asemfua 'kɔɛɛ' kura mɔɔfem mmieniu a ɛne /kɔ-/ (asennua) ne /-ɛɛ/ (nsiakyyire a ɛkyerɛ twam). Nhwɛsoɔ (3ii) mu no, asemfua 'dadewa' kura mɔɔfem mmieniu a ɛne /dadaɛ-/ (asennua) ne /-wa/ (nsiakyyire a ɛkyerɛ kumaa). Saa

ara nso na nhwesoo (3iii) mu no, asemfua ‘akeseɛ’ kura mɔɔfem mmienɔ a ene /a-/ (nsianim a ekyere dodoɔ) ne /-keseɛ/ (asennua). Nhwesoo (3iv) mu nso no, asemfua ‘asuafoɔ’ kura mɔɔfem mmiensa a ene /a-/ (nsianim a ekyere dodoɔ), /-sua-/ (asennua) ne /-foɔ/ (nsiakɔyire a ekyere dodoɔ). Esiane se nsemfua yi mu biara kurakura mɔɔfem a eboro baako nti, emu biara ye asemfua tenten.

### 2.1.1 Asehhini

Se yɛnya asemfua bi a ekura mɔɔfem mmienɔ anaa nea eboro saa a, mpre pii no eye a yɛnya efa bi a eye asemfua no fapem, enna nea edi dwuma se nkekaho ma asemfua no. Asemfua fa bi a eka bere a yeayiyi mmataho nyinaa afiri ho na yefre no asehhini. Eye asemfua fa bi a wokye mu bio a enye yie (Thakur, 2010:18). Kye a wokye asehhini mu bio a enye yie no kyere se wokye mu a entumi mma nteaseɛ papa biara wo akasa no mu. Katamba ne Stonham (2006) si no pi se etwa se bere biara asehhini no wo ho ansa na asemfua no nteaseɛ awie pɛye. Katamba ne Stonham nkyeremu yi da no adi se asehhini ne asemfua no nnyinasoo, ne saa nti woyi firi asemfua no mu a, ne nteaseɛ beye na. Se ebia:

(4)	Asemfua	Mɔɔfem Nkyekyemu	Asehhini
i.	sereɛɛ	sere-eɛ	sere
ii.	redi	re-di	di
iii.	abɔɛɛ	a-bɔ-eɛ	bɔ
iv.	ohiani	o-hia-ni	hia
v.	asuafoɔ	a-sua-foɔ	sua
vi.	agyanom	agya-nom	agya

Deɛ eɔa adi wo nhwesoo (4) mu ne se yetumi de mfamho mɔɔfem batabata asehhini ho de nya nsemfua afoforɔ. Esiane se asehhini no ne asemfua no fapem nti, se woyi firi mu a asemfua no nteaseɛ beyera, sɛdeɛ adi kan atɔ dwa no.

Ekwan bi so no, yebetumi aka se asenhini biara ye ahodi mɔɔfem, eno nti na eno nko ara tumi gyina ne ho so ma nteasee no. Akan nsemfua no bi kitakita nsenhini nko ara a mfamho mɔɔfem biara nka wɔn ho. Esiane se asenhini ne asemfua biara fapem nti yetumi de eno nko ara di dwuma wɔ Akan kasa mu ma wɔn nteasee wie pɛye. Se ebia:

- (5) i. pra
- ii. kuro
- iii. kɛsɛɛ
- iv. nyaa
- v. so

### 2.1.2 Mmataho

Adeɛ baako nso a eho hia yie pa ara wɔ nsemfua nhyehyɛɛ mu ne mmataho. Yetumi de mmataho ahodoɔ femfam nsemfua ho de nya nsemfua afoforo. Mmataho ye mfamho mɔɔfem a yede bata asemfua ho ma no di dwuma bi wɔ asemfua no mu. Crystal (2008) ne Thakur (2010) da no adi se yegyina faako a mmataho bi hye wɔ asemfua ho so na yede to no din. Ne saa nti yewɔ mmataho nkyekyemu weinom:

- i. Nea yede si asemfua no anim (nsianim).
- ii. Nea yede si asemfua no akyi (nsiakyire).
- iii. Nea yede hye asemfua no mu (nhyɛnmu).
- iv. Nea yede si asemfua no anim ne n'akyi wɔ bere korɔ no ara mu (ntwahyia).

Dolphyne (2006:80) da no adi se mmataho ahodoɔ mmienu na yewɔ no Akan kasa mu, weinom ne nsianim ne nsiakyire. Nanso mehunɔ no se Akan wɔ mmataho ahodoɔ mmiensa a ntwahyia (circumfix) nso ka ho bi. Thakur (2010:9) kyere nsianim mu se eye mmataho a yede si asemfua bi anim ma yɛnya asemfua foforo. Se ebia:



(6) Aseinhini	Nsianim	Asemfua Foforo
i. di (ADY.)	bε- (DK.)	bεdi (ADY.)
ii. sua (ADY.)	a- (AYK.)	asua (ADY.)
iii. εdan (ED.)	a- (DOD.)	adan (ED.)
iv. anomaa (ED.)	n- (DOD.)	nnomaa (ED.)

Thakur kɔ so kyere nsiakyire nso mu se eye mmataho a yede si asemfua bi akyi ma yɛnya asemfua foforo. Se ebia:

(7) Aseinhini	Nsiakyire	Asemfua Foforo
i. kɔ (ADY.)	-εε (TK.)	kɔεε (ADY.)
ii. di (ADY.)	-iε (TK.)	diiε (ADY.)
iii. lɔya (ED.)	-ni (BK.)	lɔyani (ED.)
iv. nana (ED.)	-nom (DOD.)	nananom (ED.)
v. dadeε (ED.)	-wa (KM.)	dadewa (ED.)

Senea madi kan de ato dwa no, Akan nsemfua no bi nso tumi nya mmataho a eye nsianim ne nsiakyire wɔ bere korɔ no ara mu. Saa mmataho wei na mefre no ntwahyia (circumfix) no. Se ebia:

(8) i. ɔkyerεkyerεni

ii. asuafoɔ

iii. abɔεε

Nsemfua nhyehyεε adesua mu no, yetumi nso gyina dwuma a mmataho di so kye mu kɔ akuo mmienɔ, weinom ne nyamfirimu (derivational) ne nnanemu (inflectional) mmataho (Issah & Adomako, 2013). Wɔde to dwa se nyamfirimu mmataho ye mmataho a se yede fam asemfua ho a εma asemfua no sesa firi n'asemfuakuo mu kɔ

asemfuakuo foforo mu. Hana (2011) de foa so se nyamfirimu mmataho ma yɛnya asemfua foforo koraa firi asemfua a ebata ho no mu. Boadi (2016:1) nso kyere nyamfirimu mmataho mu se eyɛ mmataho a esesa asemfua a ebata ne ho no asemfuakuo a ewo mu ko asemfuakuo foforo mu. Boadi nkyeremu fa nyamfirimu mmataho mu yi si Hana deɛ no so dua. Akan kasa mu no, yewo mmataho bi wo ho a se yede won femfam nsemfua bi ho a wodi saa dwuma yi. Se ebia:

(9) Asenhini	Nyamfirimu Mmataho	Asemfua Foforo
i. bo (ADY.)	a-, -ee	aboe (ED.)
ii. wie (ADY.)	a-, -ee	awiee (ED.)
iii. soa (ADY.)	o-, -foo	soafoo (ED.)
iv. sua (ADY.)	o-, -ni	osuani (ED.)
v. pra (ADY.)	-ee	prae (ED.)
vi. kyew (ADY.)	-ee	kyewee (NKY.)

Nnanemu mmataho nso ye mmataho a yede fam asemfua bi ho ma edi dwuma de kyere kabea, dodo, kumaa anaa bobe, na mmom ensesa asemfua no kuo a ewo mu mfa nko kuo foforo mu (Thakur, 2010:13). Hana (2011) de foa so se nnanemu ne se yeresakra asemfua bi mu anya asemfua foforo a asemfua no kuo nsesa. Se ebia:

(10) Asenhini	Nnanemu Mmataho	Asemfua Foforo
i. ko (ADY.)	re- (NS.)	reko (ADY.)
ii. di (ADY.)	-ie (TK.)	dii (ADY.)
iii. ko (ADY.)	n- (DABI)	nko (ADY.)
iv. dua (ED.)	n- (DOD.)	nnua (ED.)
v. kesee (NKY.)	a- (DOD.)	akesee (NKY.)
vi. kuro (ED.)	-wa (KM.)	kurowa (ED.)
vii. sekan (ED.)	-ma (KM.)	sekamma (ED.)

viii. agyei (ED.)

-waa (BB.)

agyeiwaa (ED.)

### 2.1.2.1 Akan Adeye Mmataho

Akan wɔ adeye mmataho ahodoɔ nnum, enonom ne: edinnsiananmu a edi dwuma se ɔyefoɔ, kabea, ɔhye, anammɔntuo ne dabi/ngoo (Osam, 2003) ne (Agyekum, 2010). Adeɛ baako a ehia se yetwe yen adwene si so ne se, se yede mmataho ahodoɔ yi femfam adeye nsemfua no ho a, wɔnsesa adeye no asemfuakuo a ewɔ mu nko asemfuakuo foforo mu. Ne saa nti se yegyina susudua a Issah & Adomako (2013) de ma faa mmataho nkyekyemu ho a madi kan de ato dwa no so a, yebetumi aka se Akan adeye mmataho no ye nnanemu (inflectional).

#### 2.1.2.1.2 Ɔyefoɔ Dinnsiananmu

Se edinnsiananmu a edidi soɔ yi mu biara di dwuma se ɔyefoɔ ma adeye asemfua bi a, yede edinnsiananmu no bata adeye asemfua no anim.


#### Edinnsiananmu I

me

wo

ɔno

eno



#### Edinnsiananmu II

yen

mo

wɔn

enonom

(cf. Akrofi, 2011:37)

Mede edinnsiananmu ahodoɔ yi redi dwuma se ɔyefoɔ ama adeye nsemfua bi wɔ ɔkasamu mu, na yeahwe senea yetwere wɔne adeye nsemfua no bom:

(11) i. Mekɔɔ adwuma nnora.

ii. Wobedo afuo afe yi?

iii. Ebo na ɔboo wo ba no.

iv. Kraman no na ɛfaa yen nam yi.

- v. Yensii fie da.
- vi. So, moato aba pɛn?
- vii. Nnora wɔdii aduane no nyinaa.

### 2.1.2.1.3 Kabea

Kabea kyere bere korɔ a dwumadie bi kɔ so (Carnie, 2013:276). Akan wɔ kabea a wɔde di dwuma de kyere bere korɔ a dwumadie bi kɔ so. Mpre pii no, yede kabea ahodoɔ no agyinahyede yɛ nsianim anaa nsiakyire ma adeye nsemfua no de kyere bere korɔ a dwumadie no kɔ so. Kabea no bi ne: ensiie, daa, daakye, ayɛawie, twam, ne ade. Agyekum (2010:110) ne Akrofi (2011:90) kyere mu sɛ ensiie kabea kyere biribi a wɔgu so reye anaa ne ye no nsiie wɔ bere a yerekasa no. Yede nsianim /re-/ na ɛkyere. Daakye kabea kyere biribi a wɔbeyɛ no da bi. Agyekum (2010:112), Akrofi (2011:91) ne Boadi (2016:90) da no adi sɛ Akan daakye kabea gu ahodoɔ mmienu, weinom ne daakye kabea a ɛdi kan ne daakye kabea a ɛto so mmienu. Yede nsianim /re-/ na ɛkyere daakye kabea a ɛdi kan, ɛna yede nsianim /rebe-/ nso kyere daakye kabea a ɛto so mmienu.

Agyekum de to dwa sɛ ayɛawie kabea kyere adeye bi a atwam nanso ɛso adeɛ wɔ ho mpren. Yede nsianim /a-/ na ɛkyere. Akrofi nso kyere twam kabea mu sɛ eye kabea a ɛkyere biribi a wɔyɛɛ no bere bi a atwam. Agyekum da no adi sɛ yegyina nneema ahodoɔ bi so na kyere twam kabea wɔ Akan kasa mu. Twam kabea su gyina sɛ adeye no kura ɔyɛtia anaase ɔkyerefoɔ anaa asemfua bi di n'akyiri anaase amfa-ɔyɛtia adeye a ɛkyere sɛ adeye no nko ara ne asemfua a ɛtwa toɔ koraa wɔ ɔkasamu no mu. Sɛ ɛba sɛ adeye no ye deɛ yɛdane mu baabiara kɔ bere a ɛnye yie a, ɛno nso nko ne sɛdeɛ ne twam kabea tee. Akan kasa mu no, sɛ yɛnya adeye bi a ɛnhia ɔyɛtia ansa na ne nteaseɛ adi mu a, yɛtaa de nsiakyire /-e, -ee, -i, -ie/ na ɛkyere wɔn twam kabea. Saa adeye nsem yi bi ne 'bɔ, bu, di, hyɛ, nante, pra', ne ade. Mmom sɛ eye /m,

n/ na edi adeye a emfa oyelia yi akyi deɛ a, yede nsiakyire /-ii/ anaase /-ee/ na ekyerɛ twam no. Saa adeye nsem yi bi ne ‘kan, sum, pam, tim, pɔn’, ne ade.

Agyekum (2010) da no adi sɛ ɔhyɛ kabea taa yɛ adeye asem a enni oyefoɔ wɔ baakofoɔ kabea mu. Yenkyerɛ oyefoɔ no deɛ nanso obiara nim sɛ oyefoɔ no yɛ nnipa dinnsiananmu a eto so mmienu /wo/. Dodoɔ kabea mu deɛ yetumi kyere oyefoɔ no. Adeɛ baako a ewɔ ɔhyɛ kabea ho ne sɛ enne a yede ka no wɔ soro. Christaler (1875) senea eɛda adi wɔ Boadi (2016) mu kyɛ ɔhyɛ kabea mu mmienu, wei ne ɔhyɛ kabea a edi kan ne ɔhyɛ kabea a eto so mmienu. Agyekum ne Akrofi kyere mu sɛ ɔhyɛ kabea a edi kan kyere biribi a onii a ɔkasa no pɛ sɛ nea ɔrekasa akyerɛ no no yɛ. Ne tiawa mu ne sɛ, ehyɛ anaa esrɛ obi ma oyɛ biribi. Sɛ eyɛ baakofoɔ kabea deɛ a, adeye asem no nni nsianim biara. Yetaa de nteamudeɛ (!) na ewie ɔkasamu no. Agyekum kyere mu sɛ, sɛ oyefoɔ no wɔ dodoɔ kabea mu deɛ a, ɔhyɛ kabea yi nya nsianim /mo + m/ anaa /n/. Sɛ yɛbɛfa /m/ anaa /n/ gyina adeye asennua no fonɔlɔgyi nhyehyɛɛ so. Sɛ konsonante /m-, b-, p-, f-/ na edi adeye asennua no anim a, efa /m-/ , enna sɛ nkonsonante nkaɛɛ no mu biara nso na edi adeye asennua no anim a efa /n-. ɔhyɛ kabea a eto so mmienu kyere biribi a obi foforo pɛ sɛ ɔkasamu bi mu oyefoɔ yɛ. Agyekum de to dwa sɛ etumi nso kyere nea ɔkasafɔɔ no pɛ sɛ ɔfa otiefɔɔ no so ma onipa foforo bi yɛ. Yede nsianim /m-/ ne /n-/ na ekyerɛ. Etɔ da bi nso a, yede asem ‘ma’ di adeye no anim ansa.

Yetumi de mmataho /bɛ-, kɔ-/ yɛ nsianim ma adeye asem de kyere anammɔntuo. Anammɔntuo mmataho ‘motional affix’ yɛ nsianim a ekyerɛ sɛ oyefoɔ no tu anammɔn wɔ dwumadie bi mu. Nsianim /bɛ-/ kyere sɛ oyefoɔ no firi baabi na ɔtu anammɔn ba faako a ɔkasafɔɔ no wɔ no. Enna nsianim /kɔ-/ nso kyere sɛ oyefoɔ no firi faako a ɔkasafɔɔ no wɔ no na ɔtu anammɔn kɔ beaɛ foforo kodi dwuma bi.

Adeye mmataho baako nso a Akan de di dwuma yɛ nea wɔde kyere dabi/ngoo. Zeijlstra (2013) de to dwa sɛ ewiase kasa ahodoɔ nyinaa wɔ akwan a wɔfa so kyere sɛ

nkasaεε bi ye nokore anaase enye nokore. Se nkasaεε bi nye nokore anaase dwumadie bi nkɔ so a, Akan frε no dabi/ngoo. Asante Twi de dabi di dwuma, enna Akuapem Twi nso de ngoo na εdi dwuma. Agyekum (2010) da no adi se adeye a εwɔ dabi/ngoo kabea mu kyere se adeye asem no ankɔ so, enkɔ so, anni mu anaase tebere no nte saa.

Akan de ‘homorganic nasal’ /N/ ye nsianim ma adeye asennua de kyere dabi (Dolphyne, 1988). Nsianim wei tumi sesa ye /m/ anaa /n/ ma ene nnyegyeeε a εdi adeye asennua no kan kɔnya beaεε korɔ. Yεde nsianim /m-/ ma adeye nsem a /m, b, p, f/ di kan, enna yεde /n-/ nso ma adeye nsem nkaεε no. Akan adeye ne wɔn mmataho bi na εdidi soɔ yi:

(12) Adeye	Mmataho	Asemfua Foforo
i. bu	re- (NS.)	rebu (ADY.)
ii. fa	-εε (TK.)	faεε (ADY.)
iii. hyε	a- (AYK.)	ahyε (ADY.)
iv. sra	bε- (DK.)	bεsra (ADY.)
v. gyina	kɔ- (AN.)	kɔgyina (ADY.)

Adeε baako a εwɔ se yehye no nso ne se mmatahodeε ahodoɔ yi nyinaa di dwuma se nsianim, gye se kabea twam nko ara na n’agyinahyεdeε no pue wɔ adeye no akyi se nsiakyire, senea εda adi wɔ nhwεsoɔ (12ii) mu no.

### 2.1.3 Edinyε (Nominalization)

Bodomo (1997a) kyere edinyε mu se eyε mɔfɔlogyi kwan a yεfa so de ye din (nominal) firi adeye ne edin nkyerεkyerεmu mu. Appah (2003) nso kyere edinyε mu se eyε ɔkwan a yεfa so de ye din firi nsemfua te se adeye, edin nkyerεkyerεmu, edin nsemfua afoforɔ, ɔkasasini anaa ɔkasamufa mu. Se yehwe Appah nkyerεmu a ɔde ama edinyε yi a, watre mu asene nkyerεmu a Bodomo de maεε. Esiane se yetumi nya

edin nsemfua firi edin aforo, edin nkyerekyeremu, okasasini ne okasamufa mu, senea Appah de ato dwa no.

Adomako (2013) da no adi se Bodomu (1997a) ne Appah (2003) de won adwene ko senea yede mmataho femfam nsemfua ho de nya edin, na mmom wanhwe dwuma a tuon (tone) nso tumi di wo edinye mu, senea eda adi wo tuon kasa (tone languages) te se Akan mu no. Adomako ma Akan nhwesoo wei de hye n'asanka no mu kena; firi 'se obi to adee na ontua ka ho ara' a eye adeye beye edin bere a yeasesa tuon a yede ka no, te se firi(é) 'adeto a wontua ka ho ara'. Ne saa nti Adomako kyere edinye mu se eye okwan a yefa so de mmataho anaa tuon ye din firi nsemfua te se adeye, edin nkyerekyeremu ne edin nsemfua aforo mu. Meunu Adomako nkyerekyeremu fa edinye ho yi se eto asom dee, nanso ensi ho ara. Esiane se yetumi nya edinye firi okasasini ne okasamufa mu senea Appah (2003) kyere mu no. Appah da no adi se yetumi fa mofologyi kwan so keka nsemfua ahodo a ewo okasamufa mu bobo mu na yeayiyi bi afiri mu adane no edin. Se ebia:

(13) Papa no ko de foro bo > okoforobo (edin asemfua)

Nhwesoo (13) mu no, yehunu se okasamufa 'papa no ko de foro bo' bedane 'okoforobo' (edin asemfua). Ene se, Appah de edinnsiananmu /o-/ agyina ho ama nkasae 'papa no', enna wayi asemfua 'de' nso afiri mu.

#### 2.1.4 Nsemfua Nkabomye (Compounding)

Anderson (1992) de to dwa se, yede nsemfua mmienu anaa nea eboro saa bobom de nya asemfua baako a na yefre no nsemfua nkabom. Katamba (1993) nso kyere mu se nsemfua nkabom ye nsemfua mmienu anaa nea eboro saa a yeakeka abom de anya asemfua tenten anaa kuntann. Oko so kyere mu se nkabom a ekura nsemfua mmienu pe no taa ye asennua mmienu nkabom. Payne (1997:92) de foa so se nsemfua nkabom ye nsemfua a yanya bere a yeakeka nsemfua aforo mmienu anaa nea eboro saa

abobom. Payne si so dua se enye asemfua a ekura asenhini mmieniu anaa nea eboro saa biara na yebetumi afre no nkabom. Ne saa nti ewo se yenya nneema bi a yebegyina so de ahunu se asemfua bi ye nkabom anaase enye nkabom. Oma saa nnyinasoo yi mmieniu wo Borɔfo kasa mu: *formal criteria* ne *semantic criteria*. Okyere mu se nsemfua nkabom biara da su yi mu bi adi.

Abakah (2004) senea eɗa adi wo Appah (2009) mu se, nsemfua nkabom ye nsemfua bi a yeaka ahosodi mɔɔfem mmieniu anaa nea eboro saa abom. Aronoff ne Fudeman (2005) de foa so se nsemfua nkabom ye kwan sononko bi a yefa so de ye nsemfua afoforɔ firi nsenkoo bi mu.

Lieber (2009) nso kyere mu se nsemfua nkabom ye asemfua bi a yeaka asenduban/asennhini mmieniu anaa nea eboro saa abom. Thakur (2010:61) nso da no adi se, se yede nsemfua mmieniu anaa nea eboro saa bobom de nya asemfua tenten a na yefre no nsemfua nkabom.

Se yehwe nwomanimfoɔ yi nkyerekyeremu a efa nsemfua nkabom ho yi a, nea eɗa adi wo mu ne se nsemfua nkabom afaafa no mu biara tumi gyina ne ho so ma nteaseɛ. Esiane se asenduban ne asennhini mu biara betumi aye ahosodi mɔɔfem. Nanso mehunu no se enye bere biara na nsemfua nkabom bi afaafa nyinaa ye ahosodi mɔɔfem. Eto da a yetumi de mfamho mɔɔfem bata nsemfua nkabom bi ho. Se yehwe asemfua ‘akwansrafoɔ’ a, ewo mɔɔfem nnan a ene /a-, -kwan-, -sra-, -foɔ/. Mɔɔfem nnan yi mu no, mɔɔfem /a-/ ne /-foɔ/ ye mfamho a won ankasa ntumi nnyina won ho so mma nteaseɛ, gye se wode won ho bata ahosodi mɔɔfem ansa na won nteaseɛ awie pɛye wo Akan kasa mu, enna /-kwan-/ ne /-sra-/ nso ye ahosodi mɔɔfem a won ankasa tumi gyina won ho so ma nteaseɛ. Saa ara nso na asemfua ‘mmarahyɛbadwani’ wo mɔɔfem nnum a ene /mmara-, -hyɛ-, -ba-, -dwa-, -ni/. Mɔɔfem nnum yi mu no, mɔɔfem /-ni/ ye mfamho a entumi nnyina n’ankasa ho so mma nteaseɛ, enna /mmara-



/, /-hyɛ-/, /-ba-/ ne/-dwa-/ nso yɛ ahosodi mɔɔfem a wɔn mu biara tumi gyina ne ho so ma nteaseɛ.

Appah (2009) da no adi sɛ Akan nsemfua nkabom ahodoɔ no afaafa tumi yɛ: edin + edin, edin + edin nkyerekyerɛmu, adeyɛ + edin anaase adeyɛ + edin nkyerekyerɛmu. Sɛ ebia:

<b>(14) i. Edin + Edin</b>	<b>Nsemfua Nkabom</b>
abɛ + nkwan	abɛnkwan
sika + adwa	sikadwa
borɔfo + kwan + sini	borɔfokwansini
<b>ii. Edin + Edin Nkyerekyerɛmu</b>	<b>Nsemfua Nkabom</b>
asɛm + hunu	asɛnhunu
asɛm + kɛsɛɛ	asɛnkɛsɛɛ
sika + kɔkɔɔ	sikakɔkɔɔ
<b>iii. Adeyɛ + Edin</b>	<b>Nsemfua Nkabom</b>
to + nkra	nkratoɔ
bɔ + mpaɛɛ	mpaɛbɔ
nom + nsa	nsanom
<b>iv. Adeyɛ + Edin Nkyerekyerɛmu</b>	<b>Nsemfua Nkabom</b>
yɛ + kɛsɛɛ	kɛsɛyɛ
yɛ + kɔkɔɔ	kɔkɔɔyɛ
yɛ + tenten	tentenyɛ



Me nhwehwɛmu-dwuma yi mu no, mɛda no adi, nsemfua binom a yetumi de keka adeyɛ *bɔ*, *bu*, *di* ne *hyɛ* ho de nya nsemfua nkabom ahodoɔ wɔ Akan kasa mu.

## 2.2 Semanteks

Lobner (2002) kyerε semanteks mu sε eyε lengwesteks nkorabata bi a εfa nteaseε ho. Sekyi-Baidoo (2002) nso da no adi sε semanteks yε nyansahunu dwumadie a εfa nteaseε ho. Hurford (2007) de foa so sε semanteks yε adesua a εfa nteaseε ho wɔ ɔkasa mu.

Sε mehwe nwomanimfoɔ yi nkyerεkyerεmu fa semanteks ho a, deε εda adi wɔ mu ara ne sε semanteks dwumadie fa nteaseε ho wɔ ɔkasa bi mu. Riemer (2010:3) da no adi sε nteaseε ne ɔkasa biara fapem. Murphy (2010:29) si so dua sε nteaseε ho hia yie pa ara. Ɔkyerε mu sε asemfua anaa nkasaeε biara wɔ ne nkyerεaseε wɔ lengwesteks mu, nanso εto da a asemfua anaa nkasaeε bi tumi nya nkyerεaseε mmienun anaa nea εboro saa.

Nkyerεaseε ahodoɔ bebree na εwɔ semanteks adesua mu, nanso deε mehwe no ɔfa-nkorabata yi mu yε dinoteehyin (denotation) ne konoteehyin (connotation). Sekyi-Baidoo (2002) ne Murphy (2010) kyerε dinoteetifo nkyerεaseε mu sε eyε nkyerεaseε pɔtee a asemfua bi kura. Wei kyerε sε nkyerεaseε a asemfua bi wɔ firi n'abɔsee mu na yεfrε no dinoteetifo nkyerεaseε no. Enna konoteetifo nso yε nkyerεaseε nkaeε a asemfua bi nya ka ne dinoteetifo nkyerεaseε ho. Murphy si so dua sε asemfua bi dinoteetifo nkyerεaseε na eyε a εdi kan wɔ 'dictionary' mu ansa na ne nkyerεaseε nkaeε no aba.

Ɔkwan a yεfa so de asemfua bi di dwuma wɔ ɔkasa mu na εkyerε ne konoteetifo nkyerεaseε. Ansa na wobɛtumi ate nkasaeε bi konoteetifo nkyerεaseε ase no, gye sε wohwe faako ne senea wɔde adi dwuma (context of use) ansa. Sε yεhwe Akan adeye 'fom' a, εwɔ nkyerεaseε mmienun a ene "sε obi de anibere anaa ahoɔhare pere fa biribi", enna "sε obi yε bɔne tia ɔfoforɔ". Yεnhwe adeye 'fom' ho nhwεsoɔ wei:

(15) i. Asuafoɔ no de ahoɔhare *fom* aduane daa.

ii. Polisini no a-*fom* aban.

Senea Murphy (2010) de to dwa no, asemfua bi dinoteetifo nkyerɛaseɛ na ɛye a ɛdi kan wɔ ‘dictionary’ mu ansa na ne nkyerɛaseɛ nkaɛ no aba. Sɛ megyina Murphy nkyerɛmu yi so a, na ɛkyerɛ sɛ adeye ‘fom’ dinoteetifo nkyerɛaseɛ ne deɛ ɛdi kan no, ɛnna ne konoteetifo nkyerɛaseɛ nso ne nea ɛto so mmieniu no. Wei da adi wɔ Legon-Zurich-Trondheim nsemfua nkyerɛaseɛ nwoma (2011:42) a meyii adeye ‘fom’ nkyerɛaseɛ yi firii mu no mu. Adeye *bɔ*, *bu*, *di* ne *hyɛ* a mede reyɛ nhwehwɛmu-dwuma yi wowɔ wɔn nkyerɛaseɛ ankasa (denotation) ne nkyerɛaseɛ nkaɛ (connotation).

### 2.2.1 Homonim (Homonym)

Homonim ye nsemfua bi a wɔn nkyerɛaseɛ nyɛ pɛ, na mmom wɔn atwerɛne/anaa wɔn ka ye pɛ (Murphy, 2010), (Thakur, 2011) ne (Okyere, 2012). Homonim gu ahodoɔ mmieniu, weinom ne homofon ne homografo. Okyere kyere homofon mu sɛ ɛye nsemfua bi a wɔn atwerɛ ne wɔn nkyerɛaseɛ nyɛ pɛ, na mmon wɔn ka ye pɛ. ɛnna homografo nso ye nsemfua a wɔn nkyerɛaseɛ nyɛ pɛ, na mmom wɔn atwerɛ ne wɔn ka ye pɛ. Akan homografo ho nhwɛsoɔ no bi na ɛdidi soɔ yi:

(16) i. Sa: Sɛ obi gyina twene anaa dwom bi so tutu ne nan, toto ne nsa hinhim ne

nipadua no.

ii. Sa: Sɛ obi de aduro gu bɛntoa mu de wura sɛbe, ne to ma aduro no kɔgu ne yam sa no yareɛ.

Sɛ yɛhwɛ asemfua ‘sa’ a ɛwɔ nhwɛsoɔ (16i) ne (16ii) mu yi a, wɔn atwerɛ ne wɔn ka ye pɛ, nanso wɔn nkyerɛaseɛ nyɛ pɛ wɔ Akan kasa mu nti wɔyɛ homografo. ‘Hyɛ’ a

εκα αδεγε α μεδε ρεγε νηωεηωεμου-dwuma yi wο homografo α μεδε βετο dwa wο dwumadie yi fa α ετο so nnan mu.

### 2.2.2 Pοlesemi (Polysemy)

Agyekum (2001), Akmajian (2001), Lobner (2002) ne Thakur (2011) hunu pοlesemi se eyε nsemfua bi α wοn nkyereaseε ye sononko na mmom wοn nkyereaseε no ρεγε ase wο okwan bi so.

Agyekum de to dwa se wο pοlesemi mu no, asemfua bi nya nkyereaseε foforo ka ne nkyereaseε ankasa ho nanso asemfua no nkyereaseε ankasa nyera. Wales (1989) wο Agyekum (2002) mu fre wei semanteks ntrεmu wο asemfua no so. Wei kyere se asemfua no anya nkyereaseε ahodoο. Murphy (2010) da no adi se εho behia se yebetumi atre asemfua bi nkyereaseε mu ama ne nkyereaseε agyina ho ama nneema bebree. Okyere mu se, se yege wei α εβεboa yen ama yenseε mmerε pii se yede bere asemfua foforo ama adeε biara α εβεpue wο okasa mu.

Nsonsonoeε baako α εda homonim ne pοlesemi ntam ne se, nteaseε α εwowo homonim nsemfua mu no nseε, na mmom nteaseε α εwowo pοlesemi nsemfua mu no di nse (Agyekum, 2001) ne (Thakur, 2011). Akan asemfua 'fua' wο pοlesemi nkyereaseε mmienu α ene "se obi de bayerε hyε nkofie mu dua", anaa "se wokura biribi mu". Se ebia:

(17) i. Maame Ataa a-*fua* ne bayerε awie.

ii. Gyau *fua* sika no.

Nkyerεmu α εwo nhwesoo (17i) mu ne se, se yefua bayerε a, εte se nea nkofie no aso anaa akura bayerε no mu no, εna (17ii) mu nso no, se obi kura adeε α na εkyere se waso mu. Yεhunu se asemfua 'fua' nkyereaseε mmienu yi sese, enti woye pοlesemi (Polysemous). Nsemfua 'bo' ne 'hyε' α εka αδεγε α μεδε ρεγε νηωεηωεμου-dwuma yi ho wowo pοlesemi nkyereaseε ahodoο α μεδε βετο dwa.

### 2.2.3 Anantebo (Collocation)

Anantebo ye nsemfua a mpre pii no wodi dwuma bom wo akasa bi mu. Etaa ba se wohunu asemfua baako a, etwa se wohunu oforo a aka ne ho no, na ama won dwumadie awie peye wo akasa no mu (Baruah, 2006) ne (Thakur, 2010). Thakur ma nhwesoo weinom wo Borfo kasa mu:

(18a) i. Handsome man


ii. Pretty woman

Nhwesoo (18a) mu no, yehunu se nsemfua a ewo (i) mu no taa di dwuma bom wo Borfo kasa mu, saa ara nso na nsemfua a ewo (ii) mu no taa di dwuma bom wo Borfo kasa mu. Ne saa nti yefre won anantebo. Se yehwe Akan asemfua 'gu' a n'asekyere ne se "biribi firi soro ba fam" a, etaa ne adeye nsem bi te se hwie, bo, ka na enam. Se ebia:

(18b) i. Nsuo no *hwie gu*.

ii. Osoafo no *a-bo* asem no *a-gu*.

iii. Asraafo no *ka mogya gu*.



Nsemfua binom wo ho a ene adeye a mede reye nhwehwemu yi taa di dwuma bom ma won nteasee wie peye wo Akan kasa mu. Nteasee mu no, wohunu baako a etaa ba se wobehunu oforo no aka ho ansa na nteasee a ewo senea yede won adi dwuma no mu adi mu.

### 2.3 Metafo

Litirikya adesua mu no, metafo ye kasasu a ekyerere se yede adee bi retoto ade fororo a ene no nse anaa ene no nni twaka ho de akyerere nsodie a ewo saa nneema mmienu no mu (Amuah, 2009) ne (Agyekum, 2011). Yetaa de adeye asem 'ye' na ekyerere nsodie a ewo saa nneema mmienu no ntam. Agyekum de to dwa se yebetumi anya nkasae bi

te se X ye Y. Yede X retoto Y ho no kyerε se X wɔ Y su ahodoɔ nyinaa. Se yenya nhwεsoɔ bi te se *X ye prako* a, na ekyerε se X kura suban a prako wɔ nyinaa bi. Weinom mu bi ne adididodoɔ, awododoɔ, eburo, hwe a ɔnhwe mma, ne ade.

Cruse (2011:242) da no adi se asemfua a metafo firi mu baε ye Greek asemfua a asekyerε ne nsesaε. Lengwesteks nwomanimfoɔ hunu metafo se eye lengwesteks fa bi a εma nteaseε. Kovescses (2002) de to dwa se metafo ne se worete nkasaeε bi ase berε a wode retoto nkasaeε foforo nkyerεaseε ho. Amuah (2009) de foa so se wɔ semanteks mu no, metafo ne se asemfua anaa nkasaeε bi nteaseε ankasa asesa anaase asemfua bi anya nteaseε foforo aka ne nteaseε ankasa ho. Adeye a mede reye nhwehwemu yi anyinya metafo ntremu ahodoɔ, enti mede beto dwa wɔ ɔfa a εto so nnan wɔ dwumadie yi mu.

#### 2.4 Nhwehwemu-dwuma a ene Dwumadie yi wɔ Twaka (Related Works)

Schneider (2010) mɔfo-semanteks mpensempensenmu a ɔgyinaa ‘Construction Grammar’ so ye faa Hebrew adeye ho da no adi se Hebrew adeye no bi wɔ asenhini anaa asennua ne mmataho. ɔkyerε ‘Construction Grammar’ mu se eye tiɔri a εfa ɔkwan a ɔkasa bi fa so hyehye ne nsemfua, ɔkasasini, ɔkasamufa ne ɔkasamu. Oda no adi se Hebrew adeye mmataho no bi di dwuma kyerε kabea ahodoɔ, εna ebi nso se wode femfam adeye asennua anaa asenhini ho a, wɔsesa adeye no nkyerεaseε koraa ma yen nkyerεaseε foforo. Oda no adi se adeye ‘ganav’ asekyerε ne ‘wia’(steal) wɔ Hebrew kasa mu, nanso yetumi ma no mmataho /ni-, -a, -i-, hit-/ ma no nya nkyerεaseε ahodoɔ. Se ebia:

- (19) i. nignav > ‘se wɔawia’ (be stolen)
- ii. ganva > ‘wiaεε’ (stole)
- iii. ginev > ‘wia ntoatoasoɔ’ (steal repeatedly)
- iv. hitganev > ‘ye kodεε wura baabi’ (sneak in/out/away)

Seneca Hebrew adeye wowo mmataho ahodoɔ a ekyerɛ kabea no, saa ara nso na Akan adeye wowo mmataho de kyere kabea ahodoɔ. Sɛ megyina Schneider dwumadie yi so a, nsonsooeɛ baako a mehunu sɛ ɛda Hebrew kasa ne Akan kasa ntam ne sɛ Hebrew wo nhyɛnmu mmataho (infix), nanso Akan nni bi.

Barnabas, Wappah ne nkaeɛ (2013) mpɛnsɛmpɛnsɛnmu a wɔfaa mɔfɔ-semanteks kwan so ye faa Kamue nnipa din ho ‘morphosemantic analysis of Kamue personal names’ da no adi sɛ Kamue din no bi ye nsemfua nkabom a wɔwo mɔfɔlogyi nkyekyɛmu ne wɔn nkyereaseɛ. Ansa na wobete edin no ase no, gye sɛ wohwe ne nhyehyeeɛ. Wɔkyere mu sɛ edin no bi wo ho a wobɛtumi agyina wɔn mɔfɔlogyi nkyekyɛmu so ate aseɛ mmaako mmaako, ebi wo ho nso a gye sɛ woka ne nkorabata no nyinaa bom ansa na woanya ne nkyereaseɛ. Kamue din no bi nkyekyɛmu tumi ye Edin + Adeye + Edin. Sɛ ebia:

(20a) Edin	Mɔɔfɛm nkyekyɛmu	Nkyereaseɛ
Njengara	Nje (ED.) + ngɛ (ADY.) + ra (ED.)	Nyame na ɔde maa me
	‘God gave me’	
	Nyame maa me	

Edin no bi nso nkyekyɛmu tumi ye Edinakyisibea + Edin. Wɔkyere mu sɛ edin a ne nhyehyeeɛ te sei taa kyere faako a wɔwoo abɔfra no. Sɛ ebia:

(20b) Edin	Mɔɔfɛm nkyekyɛmu	Nkyereaseɛ
Kwankwa	Kwa (EDAKYI.) + nkwa (ED.)	wɔwoo no ekwan so/mu
	‘on/inside road/path’	
	so/mu ekwan	

Nhwehwemufɔɔ no aboa ama yɛahunu edin no mɔfɔlɔgyi ne wɔn nkyerɛaseɛ deɛ, nanso sintɔ a mehunu no wɔ wɔn mpɛnsɛmpɛnsɛnmɔ no ho ne sɛ wɔankyerɛ edin ahodoɔ a yɛbetumi agyina wɔn mɔfɔlɔgyi nkyekyɛmɔ so anya wɔn nkyerɛaseɛ ne nea ɛwɔ sɛ yɛka edin asemfua nkorabata no nyinaa bom ansa na yɛanya ne nkyerɛaseɛ. Afei, wɔankyerɛ kwan a wɔfaa so nyaa nsem (data) de yɛɛ wɔn mpɛnsɛmpɛnsɛnmɔ no. Bio, wɔannyina lengwesteks tiɔri biara so na wɔyɛɛ wɔn mpɛnsɛmpɛnsɛnmɔ no.

Buernortey (2013) ayɛ pɔlesɛmi ne metafo mpɛnsɛmpɛnsɛnmɔ afa Dangme adeyɛ yɛ ‘di’, *na* ‘hunu’, *nu* ‘nom’, *fia* ‘bɔ’ ne *kpa* ‘gyae’ ho. Ofaa nkɔmmɔtwetwe so na ɔde nyaa nsem de dii ne dwuma no. Afei, ɔsane tietiee nkutaho ahodoɔ a ɔmanfoɔ di no wɔ adwabo ase, nsɔre nsɔre mu ne adwadibea ahodoɔ na ɔtwetwee nsem ahodoɔ a ɛhia ma ne dwumadie no. ɛtɔɔ dwa wɔ ne nhwehwemɔ-dwuma no mu sɛ adeyɛ nsemfua yi wowɔ wɔn nkyerɛaseɛ ankasa (literal meaning) ne metafo ntrɛmu (metaphorical extension). ɔkyerɛ mu sɛ wobɛte adeyɛ yi metafo dwumadie ase wɔ Dangme kasa mu a, na ɛgyina suahunu ne nimdeɛ a wowɔ fa Dangme kasa no ho so, na wosane hwe sɛnea wɔde asemfua no adi dwuma (context of use). Ne nkyerɛmɔ yi si Agyekum (2013) asɛnka so dua sɛ ansa na wobɛte asemfua bi metafo dwumadie ase no, ɛwɔ sɛ wote nnipa a wɔka saa kasa no amammerɛ ase, ɛfiri sɛ twaka kɛsɛɛ da nnipa kasa ne wɔn amammerɛ ntaɔ, na wosane hunu wɔn sohyiolengwesteks ne sɛnea wɔde asemfua no adi dwuma. Buernortey dwumadie yi sɔ ani, ɛsiane sɛ ɔbɔɔ mmɔden dɔɔ adeyɛ no metafo ntrɛmu ahodoɔ mu asukɔ wɔ Dangme kasa mu. Nanso wanhwe mɔfɔlɔgyi akwan a yɛtumi fa so de nya nsemfua afɔforɔ firi saa adeyɛ yi mu. Bio, wannyina lengwesteks tiɔri biara so na ɔde yɛɛ ne mpɛnsɛmpɛnsɛnmɔ no. Ne dwumadie no fa Dangme adeyɛ ho, ɛnna me deɛ yi nso fa Akan adeyɛ ho, mɛgyina adwenemusem metafo tiɔri ne adwenemɔ semanteks so de ayɛ mɔfo-semanteks mpɛnsɛmpɛnsɛnmɔ afa adeyɛ a mafa no ho.



Agyekum (2001) afa mmatahoye (affixation) ne nsemfua nkabomye (compounding) so anyinya edin (nominals) ahodoɔ afiri Akan adeye ‘hunu’ mu. Ɔgyinaa adwenemu semanteks so na ɔde yee ne mpensempenseɛnmu no. Ɔde to dwa se yefa mɔfɔlɔgyi akwan a eye mmatahoye ne nsemfua nkabomye so de nya nsemfua afoforo firi adeye ‘hunu’ a ne nkyereasee ne “se wode w’ani hwe biribi” mu a, asemfua no benya nkyereasee ntrɛmu anaa nkyereasee ahodoɔ (semantic extentions). Ne saa nti ansa na yebete nsemfua afoforo a yeanya afiri ‘hunu’ mu ase no, gye se yegyina yen nimdee so, a ebi ne yen suahunu wɔ ɔkasa no mu ne senea yede asemfua no adi dwuma (context of use). ‘Hunu’ mɔfɔlɔgyi ne ne metafo ntrɛmu nhwesoo a Agyekum mae no bi ne:

(21) i. o + sua + hunu > osuahunu: Osuahunu kyerɛ nimdee a obi wɔ fa biribi ho.

ii. a + hunu + a + bɔ + birim > ahunuabɔbirim: Ahunuabɔbirim kyerɛ obi anaa adee bi a wohunu a wo yam hye wo.

iii. a + hunu + a + nya + nkwa > Ahunuanyankwa: Ɛkyere obi anaa adee bi a wohunu no a wonya nkwa.

Agyekum dwumadie yi ne me nhwehwɛmu-dwuma yi wɔ twaka pa ara. Ne senti ne se, efa adeye a wadane no edin ho, na wasane ahwe ne semanteks ntrɛmu ahodoɔ. Me nso menam mɔfɔlɔgyi so benya edin ahodoɔ afiri adeye bu, bɔ, di ne hye mu, na masane ahwe wɔn semanteks ntrɛmu ahodoɔ, enti Agyekum dwumadie yi beye akwankyerɛ ama me nhwehwɛmu-dwuma yi. Mmom dee ema me nhwehwɛmu-dwuma yi da nso firi ne dee no ho ne se, ɔgyinaa adeye baako pe so na ɔde dii ne dwuma no, enna me nso mede adeye nnan na ɛredi dwuma yi. Sintɔ baako a mehunu no wɔ Agyekum dwumadie no ho ne se wankyerɛ yen faako a ɔnyaa ne nsem no firiie (source of data).

Adomako (2012) nhwehwemu-dwuma a efa Akan adeye dinye ‘verbal nominalization in Akan’ ho da no adi se yetumi de tuon, mmataho (nsianim/ne nsiakyire) femfam adeye ho de nya edin firi mu. Bio, yetumi ka adeye asemfua ku ho (reduplication) na yeama no nsianim adane no edin wo Asante-Twi mu. Edin ahodoɔ a ɔnya firii adeye mu nyinaa ɔgyinaa tuon, mmataho ne nkakuho so. Ne dwumadie yi di mu pa ara, esiane se wama yegahunu fonologyi ne morfologyi akwan binom a yefa so de nya edin firi adeye mu. Nanso nea mepɛ se mede ka ho ne se yetumi fa nsemfua nkabomye so de nya edin firi adeye mu, a Appah (2016) nso asi so dua. Se yefa adeye ‘gu’ a, yebetumi afa nkabom so adane no edin. Se ebia: anim + gu + ase(ɛ) > animguase(ɛ). *Animguaseɛ* (disgrace/shame) ye tebea bi a ema obuɔ anaa anidie a wɔde ma obi so te. Sintɔ baako a ewɔ ne dwumadie no ho ne se wannyina morfologyi tiɔri biara so na ɔde yee ne mpensempenseɛmu no. Afei, wanna faako a ɔnyaa ne nsem de dii ne dwuma no adi. Me nhwehwemu-dwuma yi mu no, menam edinye ne nsemfua nkabomye so benya edin afiri adeye ahodoɔ a mafa no mu.

Agyapong (2012) nso ahwe metafo ntrɛmu fa Akan honam akwaa ‘ho’, ‘aso’, ‘adwene’ ne ‘tekrɛma’ ho. Ɔfaa nkɔmmɔtwetwe (interview) so na ɔde nyaa nsem de dii ne dwuma no. Ɔgyinaa semanteks tiɔri (semantics-based tiɔri) ne adwenemusem metafo tiɔri so na ɔde yee ne mpensempenseɛmu no. Ɔde nsemfua binom kekaa honam akwaa a ɔde yee nhwehwemu no ho nyaa nsemfua nkabom ahodoɔ na ɔsane hwɛɛ nsemfua aforɔɔ a wanya no metafo ntrɛmu ahodoɔ. Se ebia:

(22) i. a + ho + te > ahotɛ: Ahotɛ ne se obi ani gye n’ankasa ho mmorosɔɔ.

ii. tekrɛma + nkyene > tekrɛmakyene: Akanfoɔ hunu obi a ɔde n’ano keka nsem deɛde se ɔkura tekrɛmakyene. Esiane se nkyene ye de nti wɔde saa nipa no tekrɛma toto nkyene ho.

Nhwehwemufoɔ no abɔ mmɔden adi dwuma pa, efiri se waboa de nsemfua nkabom ahodoɔ a efiri saa honam akwaa yi mu ato dwa. Nanso ɔde n'ani hwɛɛ honam akwaa nsemfua nkabom nko ara so. Nea ewɔ se yɛhyɛ no nso ne se, enye honam akwaa nko ara na yɛbetumi anya nsemfua nkabom ne metafo ntrɛmu afiri wɔn mu, yɛbetumi anya bi afiri nsemfua nkaɛɛ binom nso mu. Me dwumadie yi mu no, mɛfa mɔfoɔlogyi akwan so de anya nsemfua nkabom afiri adeye mu, na masane ahwe wɔn metafo ntrɛmu ahodoɔ.

Saa ara na Agyekum (2013) agyina adwenemu semanteks ne adwenemusem metafo tiɔri so apɛnsɛmpɛnsɛm 'ano' semanteks ne metafo ntrɛmu ahodoɔ mu. Okyerɛ se ɔfaa nkɔmmɔtwetwe (interview) so nyaa nsem no bi. ɔtwetwee nsem no bi nso firii Akan kaseɛbɔ ahodoɔ mu wɔ 'radio' so, enna ɔsane yiyii nsemfua no bi firii Christaller (1933)nsemfua nkyereaseɛ nwoma mu. Mɔfoɔlogyi nhyehyɛɛ baako a ɔde dii dwuma wɔ ne nhwehwemu yi mu ye nsemfua nkabom. Se ɔde nsemfua binom keka honam akwaa 'ano' ho a na wahwe ne metafo ntrɛmu ahodoɔ. Ne dwumadie wei ne afoforɔ binom asi so dua se nsemfua nkabom ye ɔkwan baako a yɛfa so de nya nsemfua ahodoɔ ba Akan kasa mu. Se ebia:

(23) i. ano + kam > anokam: Se obi de n'ano aka asem huuhu a ebetumi de amaneɛ

aba.

ii. ano + te > anote: Se obi nim kasa yie.

Twaka wɔ Agyekum nhwehwemu-dwuma no ne me deɛ yi mu. Ne senti ne se, me nso mɛgyina adwenemusem metafo tiɔri ne adwenemu semanteks so na mede beye me nsem no mpɛnsɛmpɛnsɛnmu. Nea ema me dwumadie yi da nso firi ne deɛ no ho ne se ɔhwɛɛ 'ano' (edin) semanteks ntrɛmu, enna me nso merehwe adeye mɔfo-  
semanteks ntrɛmu.

Sekyi-Baidoo (2013) nso ahwe adeye kasasini semanteks ntrɛmu ahodoɔ wɔ Akan kasa mu. Oda no adi sɛ kasasini no bi di dwuma sɛ kasakoa (idioms), na ebi nso de wɔn nkyerɛaseɛ ankasa na enam. Senea Makkai (1972) ne Palmer (1981) de to dwa wɔ Sekyi-Baidoo (2013) mu no, yetumi de nsemfua nkorenkore di dwuma sɛ kasakoa wɔ kasa mu. Wei betumi aba so a na egyna sohyiolengwesteks ne semanteks ntrɛmu ahodoɔ a asemfua no anya wɔ kasa no mu. Sekyi-Baidoo si no pi wɔ ne nhwehwɛmu-dwuma no mu sɛ adeye kasasini deɛ, sɛ eyɛ Borɔfo anaa Akan deɛ oo, dodoɔ no ara di dwuma sɛ kasakoa. Nwomanimfoɔ yi abɔ mmɔden sɛ ɔde Akan adeye kasasini semanteks ntrɛmu ahodoɔ ato dwa wɔ ne nhwehwɛmu-dwuma no mu, nanso wanhwe nsemfua nkabom a yebetumi afa mɔfɔlɔgyi akwan so anya afiri kasasini ahodoɔ no mu. Bio, wanna tiori a ɔgyinaa so de yeɛ ne mpɛnsɛmpɛnsɛnmu no adi ankyerɛ n'akenkanfoɔ.

Appah (2016) nso agyina 'Construction Morphology' so ahwe Akan nsemfua nkabom a yɛnya firi adeye-din mu (Akan verb-noun compounds). Eɔda adi wɔ ne dwumadie no mu sɛ adeye-din nsemfua nkabom no nyinaa ye din. Okyerɛ mu sɛ nsemfua nkabom no bi wɔ ho a wɔn nteaseɛ gyina wɔn ti so (endocentrics), enna nsemfua nkabom bi nso wɔ ho a yɛntumi nnyina wɔn ti so nnya wɔn nteaseɛ (exocentrics). Bauer (1980) de to dwa wɔ Appah (2016) mu sɛ adeye-din nsemfua nkabom nyinaa ye nea yɛntumi nnyina wɔnti so nnya wɔn nteaseɛ, nanso Appah da no adi sɛ Akan adeye-din nsemfua nkabom no bi wɔ ho a wɔn nteaseɛ gyina wɔn ti so. Otoa so de to dwa sɛ mpre pii no, Akan adeye-din nsemfua nkabom a wɔn nteaseɛ gyina wɔn ti so ye nea wɔn ti no wɔ nsemfua no nifa so (Akan endocentric compounds are predominantly right-headed). Appah nhwehwɛmu-dwuma no ye nea ene me deɛ yi wɔ twaka. Ne senti ne sɛ, menya nsemfua nkabom afiri adeye mu, enna nsemfua nkabom a menya afiri adeye no mu nyinaa nso ye edin.

Agyepong, Amfo ne afoforo (2017) nso ahwe adeye ‘di’ ne ‘nom’ nkyereasee ankasa ne won metafo nkyereasee ahodoɔ wɔ Akan kasa mu (literal and metaphorical usages of eat and drink in Akan). Wɔdaa no adi se woyiyii nsem no bi firii Christaller (1933) nsemfua nkyereasee nwoma mu, Akan litrikyia nwoma mmieniu mu, enna wɔsane ne Akan kasa mu abenfoɔ nnan twetwee nkɔmmɔ pɛe nsem no bi ne won nkyereasee. Wɔde to dwa se, seye yi adeye ‘di’ nkyereasee ankasa a ene se “obi de aduane hye n’anom” to nkyen a, adeye ‘di’ wɔ metafo ntrɛmu ahodoɔ wɔ Akan kasa mu. Saa ara nso na etɔ dwa wɔ won nhwehwɛmu-dwuma no mu se, se ye yi adeye ‘nom’ nkyereasee ankasa a ene “se obi de biribi a eye nsunsu fa n’anom kɔgu ne yafunu mu” to nkyen a, adeye ‘di’ ne ‘nom’ wɔ metafo ntrɛmu ahodoɔ wɔ Akan kasa mu. Wɔgyinaa adeye ‘di’ ne ‘nom’ nkyereasee ankasa so maa nhwɛsoɔ weinom:

(24a) i. Wɔrehye bi dwo na wɔrenoa bi *di*.

ii. Mansa a-*nom* nkwan no.

Nhwɛsoɔ (24ai) mu no, wɔde adeye *di* adi dwuma de akyerɛ ne nkyereasee ankasa (literal meaning) a ene se “nnipa bi de aduane wura won anom”. Saa ara nso na wɔ nhwɛsoɔ (24a ii) mu no, wɔde *nom* adi dwuma de akyerɛ ne nkyereasee ankasa a ene se “obi de nkwan a eye nsunsu faa n’anom kɔgu ne yafunu mu”. Wei akyi na wɔsane de ‘di’ ne ‘nom’ metafo ntrɛmu ahodoɔ too dwa. Se ebia:

(24b) i. Kofi a-*di* ne papa adeɛ.

ii. Mayweather a-*nom* Pacquiao.

Nhwehwɛmufɔɔ no kyerekyerɛ soro nhwɛsoɔ yi mu se, ‘di’ a ewɔ nhwɛsoɔ (24bi) mu no kyere se “wogyɛ biribi a esom bo te se akyedee anaa agyapadeɛ firi ɔfoforo hɔ”. Metafo ntrɛmu a ewɔ nhwɛsoɔ wei mu ne se, Kofi adi ne papa adeɛ no kyere se wanya adeɛ dɛɛdɛ a ne sɛso te se nea wadi aduane pɛpɛpɛ. Nhwɛsoɔ (24bii) mu nso no, nhwehwɛmufɔɔ no da no adi se ‘nom’ abeye metafo a ekyerɛ se Mayweather

aboro Pacquiao fremframm a ɔgye ne ho baabiara a ɛnnye, enti ɛkwan bi so no ɛte sɛ nea Mayweather anom Pacquiao ato ne yam no. Mehunu sɛ nhwehwɛmfɔɔ yi aye adeɛ de adeye ‘di’ ne ‘nom’ nkyerɛaseɛ ahodoɔ ato dwa. Nanso wɔhwɛɛ adeye a ɛkyere adidie ne ɔnom (eating and drinking verbs) nko ara. Nea ɛwɔ sɛ yɛhyɛ no nso ne sɛ ɛnye saa adeye yi nko ara na ɛwowɔ metafɔ ntrɛmu ahodoɔ wɔ Akan kasa mu. Bio, wɔanhwɛ nsemfua ahodoɔ a yɛtumi fa mɔfɔlɔgyi akwan so de nya firi adeye ‘di’ ne ‘nom’ a wɔyɛɛ nhwehwɛmu faa ho no mu. Me dwumadie yi bɛhwɛ nsemfua ahodoɔ a yɛfa mɔfɔlɔgyi so nya firi Akan adeye ‘bɔ’, ‘bu’ ‘di’ ne ‘hyɛ’ mu ne wɔn nkyerɛaseɛ ahodoɔ.

Agyepong (2017) nso agyina ‘Construction Grammar Theory’ so aye semanteks nhwehwɛmu afa Akan adeye a ɛkyere ntwitwɛɛ ne mmubuiɛ ‘cutting and breaking events in Akan’ ho. ɔkwan a ɔfaa so nyaa nsem de yɛɛ nhwehwɛmu yi ne sɛ ɔhwɛɛ adeye yi bi dwumadie firii Twere Kronkron ne nsemfua nkyerɛaseɛ nwoma mu. ɔsane nyaa ne nsem no bi firii ɔne nnipa a ɔde wɔn dii dwuma no (consultants) nkitahodie ahodoɔ mu, a ebi faa wɔn kuadwuma ne wɔn amammerɛ ho. ɛtɔɔ dwa wɔ ne dwumadie no mu sɛ adeye a yɛde di dwuma de kyere ntwitwɛɛ ne mmubuiɛ wɔ Akan mu bi ne twa, bu, bɔ, wae, pae, nu, ne de. ɔkyere mu sɛ Akan wɔ adeye atitire mmieniu a wɔde kyere ntwitwɛɛ ne mmubuiɛ a ɛne ‘twa’ (cut) ne ‘bu’ (break). Sɛ ebia:

(25) i. Mframa no *bu*-u dan no.

ii. Maame no a-*twa* akokɔ no mene.

Sɛ yɛhwɛ Agyepong dwumadie yi a, ɔde n’ani sii ntwitwɛɛ ne mmubuiɛ adeye nko ara so, a wanhwɛ Akan adeye biara semanteks anka ho. Bio, ɔhwɛɛ sɛnea yɛde adeye no nkyerɛaseɛ ankasa (literal meaning) di dwuma nko ara, a wanhwɛ adeye no metafɔ

ntremu anka ho. Afei, wanhwe nsemfua ahodoɔ a yetumi fa mɔfɔlɔgyi akwan bi te se edinye ne nsemfua-nkabomye so de nya firi adeye ahodoɔ a ɔde dii dwuma no mu.

Se yehwe nhwehwemu-dwuma ahodoɔ yi ne afoforo binom a nwomanimfoɔ aye afa Akan nsemfua ho a, ɛda adi se Akan nsemfua binom wowɔ nkyerɛaseɛ ahodoɔ a adeye nso ka ho bi, a ɛse fata se lengwesteks nwomanimfoɔ de wɔn adwene kɔ so. Se obi bete nsemfua bi dwumadie ahodoɔ ase wɔ ɔkasa bi mu a, gye se ɔwɔ kasa no ho nimdee ne suahunu mapa, anaase ɔhwe sɛnea yede asemfua no adi dwuma (context of use). Ne nyinaa mu no, nhwehwemu-dwuma a ɛfa Akan adeye mɔfɔ-semanteks ho nhye da nnɔso, enti ama ekwan (gap) abɛda ho. Mɔfɔ-semanteks botaeɛ ne se ɛbehwe ɔkwan a yefa so ye asemfua bi na asane ahwe nteaseɛ anaa nkyerɛaseɛ a ɛwɔ saa asemfua no mu. Enam wei so na ahye me nkuran ama mereye Akan adeye bɔ, bu, di ne hye ho nhwehwemu wɔ mɔfɔ-semanteks kwan so, na aboa ama ɔmanfoɔ ahunu nsemfua a yebetumi anya afiri adeye yi mu ne wɔn nkyerɛaseɛ ahodoɔ. *Bɔ* ne *bu* ye adeye a ekyerɛ mmubuiɛ (breaking verbs), *di* nso ye adeye a ekyerɛ adidie (consumption verb), ɛna *hye* nso ye adeye a ekyerɛ ahosiesie (dressing verb). ɛwom se adeye nnan yi firi akuo ahodoɔ mu dee, nanso mede redi dwuma yi ahwe se emu biara wowɔ metafo ntremu ne nkyerɛaseɛ ahodoɔ wɔ Akan kasa mu a.

## 2.5 Dwumadie yi ho Tiori

Adwenemusem metafo tiori (conceptual metaphor theory) a Lakoff ne Johnson de too dwa (1980) ne adwenemu semanteks (cognitive semantics) a Lakoff de too dwa (1988) so na megyina de aye mpensempensemmu wɔ dwumadie yi fa a ɛto so nnan mu. Lakoff (1988) kyerɛ mu se yegyina yen nimdee ne suahunu so na yede nya nkyerɛaseɛ fa lengwesteks nkasaɛ ho. Suahunu (experience) wɔ ɔkwan wei so ye nimdee a yɛnya firi yene nnipa binom nkitahodie mu wɔ wiase. Wei kyerɛ se yene nkurofoɔ di nkitaho kɔ anim a ɛboa ma yetumi nya nimdee mapa fa wɔn kasa ho, na aboa ama yeate wɔn kasa no dwumadie ase yie. Lakoff si so dua se nteaseɛ gyina

osuahunu so. Okyerε mu sε, nneεma a εboa ma yεte adwenemu semanteks dwumadie ase pa ara ye pōlesemi (sε nsemfua ankoreankore wowo nkyereaseε ahodoo a esese) ne metafo (sε asemfua bi anya nkyereaseε ntrεmu). Oda no adi sε, sε yεbete nsemfua no dwumadie ase wō okwan wei so a na εgyina adwenemu semanteks so.

Lakoff ne Johnson (1980) hunu metafo sε εye adwenemusem (conceptual). Metafo ne sε worete nkasaeε bi ase bere a wode retoto nkasaeε foforo ho, a twaka bi da nkasaeε no mmienu ntam. Woda no adi sε adwenemusem metafo (conceptual metaphor) da nneεma mmienu adi; wei ne ‘source domain’ ne ‘target domain’. Wokyerε mu sε ‘source domain’ no ye anituadeε (concrete), εna ‘target domain’ no nso ye adwenemuadehunu (abstract). Sweetser (1990) de foa so sε wō adwenemusem metafo tiōri mu no, yεgyina nnipa nimdee so na yede te lengwesteks nkasaeε ase. Wei si nkyerεmu a Lakoff (1988) de ma faa adwenemu semanteks ho no so dua.

Agyekum (2013) da no adi sε, nnipa kasa ne wōn amammerε, atenaε ne wōn nneyεε binom wō twaka na wōdi nsawosoo. Ne saa nti sε nsakraεε ba saa nneεma yi bi mu a, εtumi nya nsunsuansoo wō nnipa no kasa so. Lakoff ne Johnson (1980) da no adi sε, sε okasa bi nyini duru mpεmpensoo bi a, asemfua bi tumi nya nkyereaseε foforo ka ne nkyereaseε ankasa ho. εtumi mpo ba sε nkyereaseε a na asemfua bi kura kane no tumi sesa ma εkofa nkyereaseε foforo koraa wō metafo kwan so. Agyekum kyere mu sε, sε yεbete metafo dwumadie ase a, εnse sε yεfa nsemfua no aniani nkyereaseε kekε, na mmom εwō sε yεhwε wōn semanteks ne pragmateks, na afei nso yεte nnipa no kasa ne wōn amammerε ase.

Agyekum (2013) de to dwa sε, εto da a asemfua bi metafo nkyereaseε ye semanteks ntrεmu kakra bi na εye a εbeka asemfua no nkyereaseε ankasa ho. Agyekum kō so kyere mu sε asemfua bi wō hō na yede di dwuma wō metafo kwan so a, ne nkyereaseε ankasa ne ne metafo ntrεmu no nhyε da nsesa, enti ofrε wei ‘metafo a ne nkyereaseε wō hō’ (living metaphor), εna asemfua bi nso wō hō na yede di dwuma wō metafo



kwan so a, ne nkyerɛaseɛ ankasa ne ne metafo ntrɛmu no ntam twe, wei nso Agyekum frɛ no ‘metafo a ne nkyerɛaseɛ ayera’ (dead metaphor). Agyekum nkyerɛmu wei da no adi sɛ, sɛ yɛde asemfua bi di dwuma wɔ metafo kwan so a, ɛwɔ sɛ wodwene asemfua no ho yie, na wosane hwe sɛnea yɛde adi dwuma (context of use) ansa na woatumi anya ne nkyerɛaseɛ yie. Fromkin ne Rodman (1998) ka sɛ kasa ahodoɔ bebree fa metafo kwan so de nya nsem ahodoɔ ka wɔn nsem a wɔwɔ ho.

Lengwesteks nhwehwɛmu bebree na agyina adwenemusem metafo tiɔri ne adwenemu semanteks so ato dwa a ebi ne (Agyekum, 2001; 2013; Gries, 2004 ne Agyapong, 2012). Sɛ yɛhwe sɛnea nwomanimfoɔ yi faa saa tiɔri yi so de nyaa nsem ne nkyerɛaseɛ ahodoɔ firii nsemfua binom mu a, ɛda adi pefee sɛ tiɔri yi di mu. Ne saa nti mɛdi wɔn anammɔn akyi agyina adwenemusem metafo tiɔri ne adwenemu semanteks so de ayɛ mpɛnsɛmpɛnsɛnmu afa nsemfua ne nkyerɛaseɛ ahodoɔ a mɛnya afiri adeyɛ *bɔ*, *bu*, *di* ne *hyɛ* mu. Senti a mɛfaa tiɔri yi ne sɛ, adeyɛ a mede reyɛ nhwehwɛmu yi anyinya metafo ntrɛmu ahodoɔ, enti saa tiɔri yi bɛboa ama yɛanya nsem no nkyerɛaseɛ ahodoɔ no.

## 2.6 Ofa yi Muabo

Ofa yi ahwe nea abenfoɔ binom de ato dwa afa mɔfɔlɔgyi ne ne nhyehyɛɛ te sɛ; asɛnhini, mmataho, Akan adeyɛ mmataho, edinyɛ ne nsemfua nkabomyɛ ho. Asane de semanteks ne ne nhyehyɛɛ te sɛ; homonim, pɔlesɛmi ne anantebɔ nso ato dwa. Ofa yi sane twee adwene sii metafo, nhwehwɛmu-dwuma a ɛne dwumadie yi wɔ twaka ne dwumadie yi ho tiɔri so. Dwumadie yi fa a ɛto so mmiɛnsa de ɛho akwankyerɛ to dwa.

## ƆFA A ETƆ SO MMIƆNSA

### DWUMADIE YI HO AKWANKYERƆ

#### 3.0 Nnianimu

Dwumadie yi fa a etƆ so mmiƆnsa da Ɔkwan a mefaa so yee nhwehwemu yi adi. Ɖfa yi mu na mekyere nhwehwemu no su, mmeacee a nhwehwemu no koo so, nnipa a mede won dii dwuma no, Ɔkwan a mefaa so paa nnipa no, Ɔkwan a mefaa so nyaa nsem de dii dwuma no ne senea mede nsem no too dwa.

#### 3.1 Nhwehwemu no Su

Nhwehwemu-dwuma yi ye nea ede nsemfua kyerekyere biribi mu (qualitative). Cresswell (1998) kyere kwaliteetifo mu se eye nhwehwemu a yenam nyehyee so gye omanfoɔ adwempɔ fa biribi ho na eboa ma yete nsem anaa biribi ase. Owu-Ewie (2017) nso kyere kwaliteetifo mu se eye nhwehwemu a yenam nkommotwetwe (interview), nhwee (observation) ne nwoma (document) so nya nsem de kyerekyere senea biribi su tee. Ɖda no adi se kwaliteetifo nhwehwemu mfa noma (biribi dodoɔ ho), enti yetaa fre no nkyerekyeremu nhwehwemu. Cresswell (2009) kyere etnografi (ethnography) mu se eye kwaliteetifo nhwehwemu nkorabata bi a egyina nnipa amammerɛ ne won nneyee so de do asuko kyerekyere nsem anaa biribi mu. Ɖda no adi se akwan a yefa so nya nsem de ye etnografi nhwehwemu ye nkommotwetwe ne nhwee.

Dwumadie yi ye etnografi nhwehwemu a efa adeye *bo*, *bu*, *di* ne *hye* nkyereasee ahodoɔ ho. Megyinaa Akanfoɔ amammerɛ, won nnwuma ne won nneyee bi so na ede yee adeye nsem no mu mpensempensenmu faa won nkyereasee ahodoɔ.

### 3.2 Mmeaee a Nhwewemu no Koo so<sup>1</sup>

Nhwewemu-dwuma yi koo so wo Nkenkaasu a ewo Ofenso Atifi Mansini mu wo Asante Mantam mu ne Dadeesoaba a ewo Asutifi Anaafoo Mansini mu wo Ahafo Mantam mu. Nkenkaasu ben Kumase (Asante Mantam ahenkro), enna Dadeesoaba nso ben Gooaso (Ahafo Mantam ahenkro). Nkuro mmieny yi mu nnipa dodoo no ara ye akuafoo. Mefaa saa nkuro yi esiane se ehoofo ye Asantefoo a woka Asante Twi kasa, enna senea ehoofo no nso de Akan kasa no di dwuma wo won amammerɛ ne won nneyee ahodoo mu nti eboa maa menyaa nsem ahodoo a eboaa me dwumadie yi. Dwumadie yi mu no, metutuu anammɔn koo mpanimfoo a wowa nimdee mapa wo Akan kasa mu nkyɛn wo Nkenkaasu ne Dadeesoaba ne won kotwetwee nkɔmmo faa me dwumadie yi ho. Enam wei so na eboa maa me nsa kaa nsem ahodoo de yeɛ nhwewemu yi.

### 3.3 Nnipa a Mede won Dii Dwuma

Nnipa (consultants) baasa na mede won dii dwuma wo nkuro mmieny no mu wo nhwewemu yi mu. Won mu baanu ye mmarima na baako nso ye oboa. Won nyinaa ye Asantefoo a wowa nimdee mapa fa Asante Twi kasa ho a eboaa me nhwewemu-dwuma yi. Mmarima baanu no firi Nkenkaasu enna oboa no nso firi Dadeesoaba. Na eyɛ me botaeɛ se anka mede kasakoroofo (monolinguals) a woka Asante Twi nko ara na ebedi dwuma, nanso mannya no saa esiane kasahodoosem (multilingualism) a ewowo yen nkuro binom mu nti. Senti a na mɛpɛ se mede kasakoroofo nko ara di dwuma ne se, anka ebeboa na amma kasa foforo te se Borofo anaa Ghana kasa biara annya nsunsuansoo wo nsem (data) a mede dii dwuma yi so. Epono 1.1 da nnipa no ho nsem (meta data) adi.

<sup>1</sup>Ewom se dwumadie yi fa Akan adeye ho dee, nanso deta a mede dii dwuma yi menyaa firii Nkenkaasu a ewo Asante Mantam mu ne Dadeesoaba a ewo Ahafo Mantam mu.

**Ɛpono 1.1: Nnipa no ho Nsem**

Edin	Bɔbea	Mfee	Nwomasua	Kasa	Beaɛɛ
Onipa 1	ɔbarima	48+	suapɔn	Asante Twi, Borɔfo	Nkenkaasu
Onipa 2	ɔbarima	52+	suapɔn	Asante Twi, Borɔfo	Nkenkaasu
Onipa 3	ɔbaa	78+	wankɔ sukuu	Asante Twi	Dadeɛsoaba

Nnipa baasa a me ne wɔn twetwee nkɔmmɔ no, wɔn mu baako pɛ na na ɔyɛ kasakoroni (ɔbaa panin a wadi boro mfee 78), baanu a wɔaka no nso Asante Twi ne wɔn kasa a ɛdi kan (L1), ɛna Borɔfo nso ne wɔn kasa a ɛto so mmieniu (L2). Nokwasɛm ne sɛ, Borɔfo a nnipa baanu yi ka no annya nsunsuansoɔ biara wɔ nsem ahodoɔ a wɔde maa me no so. Na nnipa no nyinaa adi boro mfee aduanan. Na ɛho hia sɛ mede wɔn a wɔn mfee no kɔ anim bɛdi dwuma, ɛfiri sɛ wɔn na wɔde Asante Twi adi dwuma akyɛ, enti mehunu sɛ wɔwɔ kasa no ho nimdeɛ ne ɛmu suahunu pii a wɔbetumi ama me nsem frenkyemm de adi dwuma yi.

**3.4 Ɔkwan a Mefaa so Paa Nnipa no**

Megyinaa dwumadie yi botaeɛ so ne nnipa a mede wɔn dii dwuma yi nimdeɛ a wɔwɔ fa dwumadie yi ho so na mede paa wɔn. Ɛnam sɛ na ɛyɛ me tirimpɔ sɛ menya nsemfua bi nkyerɛaseɛ frenkyemm nti, meɔwɔ mmɔden ne ɔmanfoɔ didii nkitaho ahodoɔ wɔ nkuro no mu faa dwumadie yi ho, ɛna wɔboɔ maa me nsa kaa wɔn a wɔwɔ nimdeɛ fa dwumadie yi ho. Nnipa baasa a megyee nsem firii wɔn ho no, baako yɛ ɔhene kyeame wɔ Nkenkaasu, baako yɛ Asante Twi kyerekyerɛniwɔ ntoasoɔ sukuu mu, ɛna baako nso yɛ ɔbaa panin a ɔwɔ nimdeɛ mapa fa Akan kasa no dwumadie ho.

### **3.5 Akwan a Mefaa so Nyaa Nsem de Dii Dwuma yi**

Nsem (data) a mede dii dwuma yi menya firii mmeaee ahodoɔ mmiensa; eye nea menya firii dawubɔ nnwuma mu (radio ne televiyyin), nwoma mu (literary texts) ne nkɔmmɔtwetwe (interview) a ekɔɔ so wɔ me ne Akan kasa mu abenfoɔ binom ntam.

#### **3.5.1 Dawubɔ Nnwuma (Media)**

Senea ebeye a menya nsem ahodoɔ de aye nhwehwemu yi nti, mede dawubɔ nnwuma a wɔde Akan kasa di dwuma te se Peace Fm, Asempa Fm, UTV ne Adom TV dii dwuma pɛɛ nsemfua ahodoɔ a eho hia ma dwumadie yi bi. Dwumadie a mede m'ani dii akyire wɔ dawubɔ nnwuma yi mu ye amanyɔsem (political programs), kaseɛbo (news bulleting) ne nyamesenka (preaching). Deɛ meyeɛɛ ne se, se meretie anaa merehwe dwumadie yi mu biara na menya nsem a eho hia ma dwumadie yi a na matwere ato ho ape ne nkyereaseɛ. Senti a mede m'ani dii saa dawubɔ nnwuma yi ne wɔn nnwumadie akyi ne se, eho na me nsa soee a metumi nyaa nsem a ebeboa nhwehwemu yi.

#### **3.5.2 Nsem a ewɔ Nwoma mu (Literary Texts)**

Appah (2012) de to dwa se nsem a ewɔ nwoma mu boa nhwehwemu pa ara, esiane se nwomanifoɔ adi kan asa mu asiesie nsem no dada. Nwoma ahodoɔ a mede dii dwuma wɔ nhwehwemu yi mu ye nsemfua nkyereaseɛ nwoma, Akan nwoma ne Twere Kronkron.

##### **3.5.2.1 Nsemfua Nkyereaseɛ Nwoma (Dictionary)**

Mehweɛ nsem no bi nkyereaseɛ ahodoɔ firii Christaller (1933) ne Legon-Zurich-Trondheim (2011) Akan nsemfua nkyereaseɛ nwoma mu. Medii kan hwehweɛ adeye a mede dii dwuma yi nkyereaseɛ ankasa ne wɔn nkyereaseɛ ahodoɔ firii nsemfua nkyereaseɛ nwoma yi mu. Eno akyi na mesane hweɛ sena wɔde adeye no adi dwuma wɔ okasamu ahodoɔ mu nso wɔ nwoma yi mu.

### 3.5.2.2 Akan Nwoma

Mesane hwɛɛ nsem no bi ne wɔn nkyerɛkyerɛmu firii Agyekum (2011) *Akan Kasadwini* mu. Nwoma yi wowɔ Akan amammerɛ nsemfua bi a ɛboa maa me nsa kaa nsem no bi ne nkyerɛaseɛ a ɛhia wɔ dwumadie yi mu.

### 3.5.2.3 Twere Kronkron

Dwumadie yi mu nsem bi nso firi Twere Kronkron mu. Meyɛɛ nhwehwɛmu wɔ *Asante Twi Twere Kronkron* (2008) mu pɛɛ nsem ne nkyerɛaseɛ bi a ɛho hia ma dwumadie yi.

### 3.5.3 Nkɔmmɔtwetwe (Interviews)<sup>2</sup>

Senea ɛbeyɛ ama manya nsem no nkyerɛaseɛ frenkyemm nti, me ne Akan kasa mu abenfoɔ baasa a wɔfiri Nkenkaasu ne Dadeɛsoaba a wɔyɛ Asantefoɔ, na wɔasane atenatena nkuro no mu akyɛ yie twetwee nkɔmmɔ ahodoɔ de pɛɛ nsem no bi ne wɔn asekyerɛ. Owu-Ewie (2017) kyere nkɔmmɔtwetwe mu se eyɛ nkitaho a nhwehwɛmufoɔ (researcher) ne nkitahoni (participant) di de pɛ nsem ye ne nhwehwɛmu. Owu-Ewie da no adi se nkɔmmɔtwetwe boa ma nhwehwɛmufoɔ no akwannya ma ɔtumi bisabisa nsem dɔ nsem mu asukɔ hwɛhwɛ ne nkyerɛaseɛ firi nkitahodini no ho. Nkɔmmɔtwetwe a mede dii dwuma ye Anto-nhyehyɛɛ nsemmissa (semi-structured interview). Dwumadie yi mu mekurukyiree nsemmissa ahodoɔ guu krataa so na me ne nnipa no twetwee nkɔmmɔ faa ho hwɛhwɛ wɔn asekyerɛ.

Me ne nnipa baanu (mmarima) twetwee nkɔmmɔ wɔ Efiada, ɔpenimma 21, 2018 ne Memeneda, ɔpenimma 22, 2018 mu wɔ Nkitahodifoɔ no mu baako fie wɔ Nkenkaasu de pɛɛ nsem no asekyerɛ wɔ dwumadie yi mu. ɛno akyi no, mesane faa nkɔmmɔtwetwe so ne ɔbaa panin baako faa nsem no akyi hwɛɛ se nsem no asekyerɛ a manya no di mu a. Saa nkitahodie yi nso kɔɔ so wɔ Efiada, ɔpenimma 28, 2018 mu

---

<sup>2</sup>Meda Owura John Asamoah, Owura Kwaku Fokuo ne Maame Yaa Kontor ase se wɔboa maa me nsem no bi de dii dwuma yi.

wɔ ɔbaa panin no fie wɔ Dadeesoaba. Eno akyi no, na metaa ne nnipa no di nkitaho ahodoɔ nso wɔ ahomatoromfoɔ so de pɛ nsem no bi nkyerekyeremu bere ano bere ano.

Nkɔmmɔ a me ne wɔn twetwee no na ɛfa ɔmanfoɔ no dwumadie bi te sɛ nyamesom (worship), adwumayɛ (occupation), amammerɛ nneyɛɛɛ (cultural practices) ne wɔn asetena mu nsem ho.

Nkitaho ahodoɔ a me ne abenfoɔ yi di faa dwumadie yi ho nyinaa mekye guu afidie (audio recorder) so. Nsem ahodoɔ a mekye guu afidie so wɔ me ne mpanimfoɔ no nkitahodie mu nyinaa no, akyire yi meɔ tiee, saa mu yiyii nea ɛsɛ fata na ɛbeboa me dwumadie yi. M'ankasa me nimdeɛ a mewɔ fa Asante Twi kasa no ho nso boa maa me nsa kaa nsemfua no bi ne wɔn nkyerɛaseɛ.

### **3.6 Sɛnea Mede Nsem no Too Dwa**

Okwan a mefaa so de nsem no too dwa ne sɛ, sɛ mefa adeye no mu biara a, na mahwe ne nkyerɛaseɛ ankasa ne ne nkyerɛaseɛ nkacɛ wɔ Akan kasa mu. Mewieɛ no na mede mmataho ne/anaa nsemfua bi femfamm adeye no ho nyaa nsemfua afoforɔ wɔ mɔfɔlɔgyi kwan so. Eno akyi na mede nsemfua afoforɔ no nso nkyerɛaseɛ ahodoɔ too dwa. Nhwɛsoɔ ahodoɔ a ɛwɔ dwumadie yi mu no menyaa bi firii nwoma a mede dii dwuma no bi mu, nkɔmmɔtwetwe a ɛkɔɔ so wɔ me ne nnipa a mede wɔn dii dwuma no ntam ne m'ankasa me nimdeɛ a mewɔ fa Akan kasa no ho mu.

### **3.7 Ɔfa yi Muabo**

Ɔfa yi de dwumadie yi ho akwankyerɛ ato dwa. Akyerɛ nhwehwɛmu no su, mmeaɛ a nhwehwɛmu no kɔɔ so, nnipa a mede wɔn dii dwuma ne wɔn ho nsem, okwan a mefaa so paa nnipa no, akwan a mefaa so nyaa nsem de dii dwuma yi ne sɛnea mede nsem no too dwa wɔ ɔfa a ɛtɔ so nnan mu. Dwumadie yi fa a ɛtɔ so nnan de nsem no mpɛnsemɛnmu to dwa.

## ƆFA A ETƆ SO NNAN

### NSEM NO MPENSEMPENSENMU

#### 4.0 Nnianimu

Nteasee ne ɔkasa biara nnyinasoo. Asemfua anaa nsemfua betumi aye nteasee a ewo ɔkasa mu fapem (Pierce, 1995). Bolinger (1975) de to dwa wo Agyepong (2017) mu se, adee baako a eboa ma yenya lengwesteks nkasae bi nkyeasee ye senea yede nkasae no adi dwuma (context of use). Oko so kyere mu se, faako a yede asemfua bi adi dwuma ne nsemfua a ene asemfua bi di dwuma bom (collocation) boa ma asemfua no nkyeasee yi ne ho.

Ofa yi mu na mede adeye **bo, bu, di** ne **hye** a mede yee nhwehwemu yi nkyeasee ahodoɔ beto dwa. Mɛkyere adeye yi mu biara nkyeasee ankasa ne won nkyeasee ahodoɔ. Mesane de nsemfua ahodoɔ a yefa mofologyi akwan te se edinye ne nsemfua nkabomye so nya firi adeye yi mu ato dwa, mewie a na mahwe won nkyeasee ne won metafo ntramu ahodoɔ.

#### 4.1 Adeye Bo, Bu, Di ne Hye Nkyeasee

Saa ofa-nkorabata yi kyere adeye *bo, bu, di* ne *hye* nkyeasee ankasa ne won nkyeasee nkaee. Dee eboa ma adeye no nkyeasee nkaee da adi ye faako a yede adeye no adi dwuma.

##### 4.1.1 Bo Nkyeasee

Adeye *bo* wo polesemi nkyeasee. Christaller (1933:23) de to dwa se *bo* nkyeasee ankasa ne “se obi de ne nsa anaa ne honam akwaa bi anaa biribi hwe obi anaa biribi mu.” Ne nkyeasee bio nso ne “se biribi mu dwa, tue, pae anaa tokuro beda ho.” Se ebia:



(26) i. Gyan *bɔɔ* bɔɔlo no.

Nhwɛsoɔ (26i) mu no, *bɔ* redi dwuma akyerɛ sɛ Gyan de ne nan anaasɛ ne honam akwaa bi hwee bɔɔlo no mu.

(26) ii. Taforabɔɔ no a-*bɔ*.

Nhwɛsoɔ (26ii) mu nso no, *bɔ* redi dwuma akyerɛ sɛ taforabɔɔ no mu adwa, atue anaasɛ apae. Nea ɛma adeyɛ *bɔ* nkyerɛasɛɛ mmieniu yi yɛ pɔlesɛmi (Polysemous) ne sɛ, nkyerɛasɛɛ mmieniu yi nyinaa mu no yɛhunu sɛ biribi kɔka ade foforo (contact).

#### 4.1.2 Bu Nkyerɛasɛɛ

Adeyɛ ‘bu’ nkyerɛasɛɛ ankasa ne “sɛ biribi mu kyɛ mmieniu”. ɛtumi nso kyere “sɛ obi kɔa biribi mu ma afaafa no ano hyia ma ade no yɛ ketewa” (Legon-Zurich-Trondheim Nsemfua Nkyerɛasɛɛ Nwoma, 2011:34). Sɛ ebia:

(27) i. Aberantɛɛ no a-*bu* abaa no mu.

ii. Prɛmpɛ a-*bu* anwentama kɛsɛɛ no mu.

Nhwɛsoɔ (27i) asekyerɛ ne sɛ aberantɛɛ no akyerɛ abaa no mu mmieniu ama no abeyɛ asini asini anaa nketewa, ɛnaa nhwɛsoɔ (27ii) nso asekyerɛ ne sɛ, Prɛmpɛ akɔa anwentama kɛsɛɛ no mu ama no abeyɛ ketewa. Bu nkyerɛasɛɛ mmieniu a ɛwɔ nhwɛsoɔ (27i) ne (27ii) mu no yɛ pɔlesɛmi, ɛsiane sɛ yɛhunu sɛ biribi yɛ ketewa.

Legon-Zurich-Trondheim Nsemfua Nkyerɛasɛɛ Nwoma kɔ so de to dwa sɛ adeyɛ ‘bu’ nkyerɛasɛɛ bio ne “sɛ obi de anidie ma ɔfoforo”. ɛsane kyere “sɛ obi fa nyansakwan so anaa esum ase sisi obi wɔ sika anaa biribi mu”. Sɛ ebia:

(28) i. Asɔ *bú* ne kunu pa ara.


ii. Krakye no *bú* kookoo akuafɔɔ dodo.

Nhwɛsoɔ (28i) asekyerɛ ne sɛ Asɔ de anidie ma ne kunu, ɛnaa nhwɛsoɔ (28ii) nso asekyerɛ ne sɛ, wɔ krakye no ne kookoo akuafɔɔ dwumadie mu no, krakye no fa

nyansakwan so sisi kookoo akuafoɔ no. *Bu* nkyerɛaseɛ mmieniu a ɛwɔ nhwɛsoɔ (28i-ii) mu no gyina fɔnɔlɔgyi so. Sɛ yɛhwɛ a, yɛhunu sɛ yɛde tuon a ɛwɔ fam na ɛka *bu* a ɛwɔ nhwɛsoɔ (28i) mu no, ɛna yɛde tuon a ɛwɔ soro nso na ɛka *bu* a ɛwɔ nhwɛsoɔ (28ii) mu no.

#### 4.1.3 Di Nkyerɛaseɛ

Adeyɛ ‘di’ nkyerɛaseɛ ankasa ne “sɛ obi de aduane to n’anom (wesa) mene” (Legon-Zurich-Trondheim Nsemfua Nkyerɛaseɛ Nwoma, 2011:35). Nnuane a yɛdi no bi wɔ ho a yɛwɛsa ansa na yɛamene, ɛna ebi nso wɔ ho a yɛnwɛsa ansa na yɛamene. Aduane bi te sɛ ampɛsie sei, ansa na obi bɛtumi amene ato ne yam aka sɛ wadi no, gye sɛ ɔwɛsa ansa. Nnuane nso a yɛntaa nwɛsa ansa na yɛamene no bi ne banku, fufuo ne abetɛɛ. Sɛ yɛyi nnuane a yɛde toto yɛn anom di to nkyɛn a, yɛwɔ nneɛma bi a ayɛ sɛ nnuane a ɛno nso yɛde to yɛn anom di. Sɛ yɛhwɛ afenɛmfɛnɛmdeɛ bi te sɛ tɔfɛ sei a, sɛ obi de to n’anom tafere tafere ho a, yɛka sɛ wadi. Nnuaba bi te sɛ amango, ankaa, pɛɛ, ne ade nso yɛde to yɛn anom di. Sɛ ebia:

- 
- (29) i. Kwame re-*di* ampɛsie.  
ii. Asamoa *di* fufuo daa.  
iii. Mmɔfra no *di* tɔfɛ Kwasiada biara.  
iv. Nnora papa no *di*-i pɛɛ.

Sɛ yɛhwɛ ampɛsie, fufuo, tɔfɛ ne pɛɛ a, yɛhunu sɛ yɛde ɛmu biara to yɛn anom di. Deɛ ɛwɔ sɛ yɛhyɛ no nso ne sɛ ampɛsie ne fufuo nko ara na ɛyɛ nnuane, a tɔfɛ ne pɛɛ nka ho. Nkyerɛmu wei ma yɛhunu sɛ ɛnyɛ aduane nko ara na yɛde to yɛn anom di

#### 4.1.4 Hyɛ Nkyerɛaseɛ

Adeyɛ ‘hyɛ’ nkyerɛaseɛ ankasa ne “sɛ obi de afadɛɛ te sɛ mpaboa, atadɛɛ anaa kawa siesie ne ho” (Legon-Zurich-Trondheim Nsemfua Nkyerɛaseɛ Nwoma, 2011:50). Sɛ ebia:

(30) Maame no *hye* atade fufuo.

Nhwesoo (30) nkyereseɛ ne sɛ maame no de atadeɛ (afadeɛ) a n'ahosuo yɛ fufuo na asiesie ne ho.

Legon-Zurich-Trondheim Nsemfua Nkyereseɛ Nwoma kɔ so de to dwa sɛ adeyɛ 'hye' nkyereseɛ bio ne, "sɛ obi anaa biribi wɔ baabi". Etumi nso kyere "sɛ obi de biribi te sɛ aburoo anaa emo sie san anaa apata so ma ewo na etumi kye nso". Etumi nso kyere "sɛ obi de nneɛma te sɛ kookoo, aburoo anaa mfudeɛ bi gu kentɛn anaa botɔ mu". Sɛ ebia:

(31) i. Okra no *hye* akonnwa no ase.

ii. Papa no *hye* n'aburoo wɔ apata no so.

iii. Okuani no *hye* ne mankani wɔ kentɛn mu.

Sɛ yɛhwɛ nhwesoo (31i-iii) a, ewom sɛ nkyereseɛ a ewowɔ emu biara yɛ sononko deɛ, nanso nsɛdie wowɔ nhwesoo no nkyereseɛ mu, ɛfiri sɛ yɛhunu sɛ adeɛ bi wɔ baabi, ɛno nti *hye* nkyereseɛ mmiensa no nyinaa yɛ pɔlesɛmi.

'Hye' sane kyere "sɛ obi kɔka kyere odwumfoɔ bi te sɛ kapenta anaa otomfoɔ sɛ onye nneɛma bi te sɛ mpa, akonnwa anaa asɔ mma no". Etumi nso kyere "sɛ obi de tumi anaa ahunahuna ma ofoforo yɛ biribi a enye ne pɛ". Sɛ ebia:

(32) i. Asenso a-*hye* otomfoɔ no asɔ.

ii. Okyerɛkyerɛni no a-*hye* osuani no sɛ onna.

Sɛ yɛhwɛ nkyereseɛ a ewowɔ nhwesoo (32i) ne (32ii) mu a, yɛhunu sɛ obi ka kyere ofoforo sɛ onye adeɛ bi, enti nkyereseɛ mmienu a ewowɔ nhwesoo (32i) ne (32ii) mu no nso yɛ pɔlesɛmi. Afei, yɛnhwɛ nhwesoo bi te sɛ:

(33) a. Ato a-*hye* mpaboa.

b. Adu a-*hye* mmɔfra no sɛ wɔnnidi.

Nhwesoo (33a) mu no, yehunu se *hye* asekyere ne se Ato de mpaboa (afadee) asiesie ne ho. Enna nhwesoo (33b) mu nso no, yehunu se *hye* asekyere ne se Adu de ahunahuna na aka akyerε mmofra no se wonnidi. Adeye *hye* a ewo nhwesoo (33a) ne (33b) mu no ye homografo (homographous), efiri se won atwere ye pe, nanso won nkyereasee ye sononko.

#### 4.2 Nsemfua a Yenya firi Adeye: Bɔ, Bu, Di ne Hye mu

Saa ofa-nkorabata yi kyere nsemfua ahodoo a yefa mofologyi akwan so nya firi adeye nnan a mede yee nhwehwemu yi mu. Dee meye ne se, mede mmataho ne nsemfua bi befemfam adeye: *bɔ*, *bu*, *di* ne *hye* ho de anya nsemfua ahodoo afiri adeye no mu.

##### 4.2.1 Nsemfua a Yenya firi Bɔ mu

Ofa-nkorabata yi da nsemfua a yenya firi adeye *bɔ* mu adi. Saa nsemfua yi na edidi soo no:

##### (34) Mpaebɔ

NSM.	+	ADY.	+	ADY.	>> Edin Asemfua
m	+	pae	+	bɔ	>> mpaebɔ

Mofologyi nhyehyee a ewo asemfua *mpaebɔ* mu ne edinye ne nsemfua nkabomye.

Ne nkyekyemu ne nsianim /m-/ (edinye mofem), adeye *pae* ne *bɔ*.

##### (35) Ntoabɔ

NSM.	+	ADY.	+	ADY.	>> Edin Asemfua
n	+	toa	+	bɔ	>> ntoabɔ

Mofologyi nhyehyee a ewo asemfua *ntoabɔ* mu nso ye edinye ne nsemfua nkabomye.

Ne nkyekyemu ne nsianim /n-/ (edinye mofem), adeye *toa* ne *bɔ*.

**(36) Dawubo**

ED. + ADY. >> Edin Asemfua

dawuro + bɔ >> dawubo

Edinye ne nsemfua nkabomye ne mɔfɔlogyi nhyehyee a ewɔ *dawubo* mu. Ne nkyekyemu ne edin *dawuro* ne adeye *bɔ*.

**(37) Akotiabo**

NSM. + ADY. + ADY. + ADY. >> Edin Asemfua

a + ko + tia + bɔ >> akotiabo

Mɔfɔlogyi nhyehyee a ewɔ asemfua *akotiabo* mu nso ne edinye ne nsemfua nkabomye. Ne nkyekyemu ne nsianim /a-/ (edinye mɔofem), adeye *ko*, *tia* ne *bɔ*.

**(38) Osebo**

ED. + ADY. >> Edin Asemfua

ose + bɔ >> osebo

Edinye ne nsemfua nkabomye ne mɔfɔlogyi nhyehyee a ewɔ asemfua *osebo* mu. Efiri edin *ose* ne adeye *bɔ* mu.

**(39) Benabo**

ED. + ADY. >> Edin Asemfua

bena + bɔ >> benabo

Asemfua *benabo* nso mɔfɔlogyi nhyehyee ne edinye ne nsemfua nkabomye. Efiri edin *bena* ne adeye *bɔ* mu.

**(40) Nkurobo**

ED. + ADY. >> Edin Asemfua

nkuro + bo >> nkurobo

Mofologyi nyehyeee nso a ewo *nkurobo* mu ye edinye ne nsemfua nkabomye. Ne nkyekyemu ne edin *nkuro* ne adeye *bo*.

**(41) Duabo**

ED. + ADY. >> Edin Asemfua

dua + bo >> duabo

*Duabo* mofologyi nyehyeee ne edinye ne nsemfua nkabomye. Efiri edin *dua* ne adeye *bo* mu.

**(42) Adwabo**

NSM. + ED. + ADY. >> Edin asemfua

a + dwa + bo >> adwabo

Edinye ne nsemfua nkabomye na eye mofologyi nyehyeee a ewo *adwabo* mu. Ne nkyekyemu ne nsianim /a-/ (edinye mofem), edin *dwa* ne adeye *bo*.

**(43) Kyenkubo**

ED. + ADY. >> Edin Asemfua

kyenku + bo >> kyenkubo

*Kyenkubo* nso mofologyi nyehyeee ye edinye ne nsemfua nkabomye. Ne nkyekyemu ne edin *kyenku* ne adeye *bo*.

**(44) Abosoo**

NSM. + ADY. + EDAKYI. + NSK. >> Edin asemfua

a + bo + so + o >> abosoo

Mofologyi nyehyeee a ewo asemfua *abɔsoɔ* mu ne edinye ne nsemfua nkabomye. Ewo nkyekyemu wei; nsianim /a-/ (edinye moofem), adeye *bɔ*, edinakyisibea *so* ne nsiakyire /-ɔ/ (edinye moofem).

#### (45) Abɔsobaa

NSM.	+	ADY.	+	EDAKYI.	+	ED.	>> Edin asemfua
a	+	bɔ	+	so	+	abaa	>> abɔsobaa

*Abɔsobaa* nso ye nsemfua nkabom a ne nyehyeee ne nsianim /a-/ (edinye moofem), adeye *bɔ*, edinakyisibea *so* ne edin *abaa*.

#### (46) Mmaabɔ

NSM.	+	ED.	+	ADY.	>> Edin Asemfua
m	+	abaa	+	bɔ	>> mmaabɔ

Asemfua *mmaabɔ* ye nkabom a ne mofologyi ne nsianim /m-/ (dodoɔye moofem), edin *abaa* ne adeye *bɔ*.

#### (47) Abobɔadeɛ

NSM.	+	ADY.	+	ADY.	+	ED.	>> Edin Asemfua
a	+	bo	+	bɔ	+	adeɛ	>> abobɔadeɛ

Nsemfua nkabom *abobɔadeɛ* nyehyeee ne nsianim /a-/ (edinye moofem), adeye *bobɔ* (nkakuho) ne edin *adeɛ*.

#### (48) Abɔka

NSM.	+	ADY.	+	ADY.	>> Edin Asemfua
a	+	bɔ	+	ka	>> abɔka

Mofologyi nyehyeee a ewo asemfua *abɔka* mu ne edinye ne nsemfua nkabomye. Ewo nkyekyemu wei; nsianim /a-/ (edinye moofem), adeye *bɔ* ne *ka*.

**(49) Asubɔ**

ED. + ADY. >> Edin Asemfua  
 asu + bɔ >> asubɔ

Edinye ne nsemfua nkabomye na eye mofologyi nyehyeee a ewo *asubɔ* mu. Ne nkyekyemu ne edin *asu* ne adeye *bɔ*.

**(50) Kobɔ**

ED. + ADY. >> Edin Asemfua  
 ko + bɔ >> kobɔ

*Kobɔ* nso mofologyi nyehyeee ye edinye ne nsemfua nkabomye. Efiri edin *ko* ne adeye *bɔ* mu.

**(51) Afɛkubɔ**

ED. + ED. + ADY. >> Edin Asemfua  
 afɛ + ekuo + bɔ >> afɛkubɔ

Edinye ne nsemfua nkabomye na eye mofologyi nyehyeee a ewo *afɛkubɔ* nso mu. Efiri edin *afɛ*, *ekuo* ne adeye *bɔ* mu.

**(52) Korɔnobɔ**

ED. + ADY. >> Edin Asemfua  
 korɔno + bɔ >> korɔnobɔ

*Korɔnobɔ* nso mofologyi nyehyeee ye edinye ne nsemfua nkabomye. Ne nkyekyemu ne edin *korɔno* ne adeye *bɔ*.

**(53) Apooɔ**

ED. + ADY. >> Edin Asemfua  
 apoo + bɔ >> apooɔ



Mɔfɔlɔgyi nhyehyɛɛ nso a ɛwɔ *apoo* mu ne edinyɛ ne nsemfua nkabomyɛ. Ne nkyekyɛmu ne edin *apoo* ne adeyɛ *bɔ*.

#### (54) Dammɔ

NKY. + ADY. >> Edin Asemfua  
dam + bɔ >> dammɔ

*Dammɔ* nso mɔfɔlɔgyi nhyehyɛɛ ne edinyɛ ne nsemfua nkabomyɛ. Ɛfiri edin nkyerekyerɛmu *dam* ne adeyɛ *bɔ* mu.

#### (55) Ɛkabɔ

ED. + ADY. >> Edin Asemfua  
ɛka + bɔ >> ɛkabɔ

*Ɛkabɔ* nso mɔfɔlɔgyi nhyehyɛɛ yɛ edinyɛ ne nsemfua nkabomyɛ. Ne nkyekyɛmu ne edin *ɛka* ne adeyɛ *bɔ*.

#### (56) Abɔtire

NSM. + ADY. + ED. >> Edin Asemfua  
a + bɔ + etire >> abɔtire

Asemfua *abɔtire* yɛ nkabom a ne nhyehyɛɛ ne nsianim /a-/ (edinyɛ mɔɔfɛm), adeyɛ *bɔ* ne edin *etire*.

#### 4.2.2 Nsemfua a Yɛnya firi Bu mu

Ɔfa-nkorabata yi nso kyere nsemfua ahodoɔ a yɛfa mɔfɔlɔgyi akwan so nya firi adeyɛ *bu* mu. Saa nsemfua yi na ɛdidi soɔ no:

#### (57) Amammuo

NSM. + ED. + ADY. + NSK. >> Edin Asemfua  
a + ɔman + bu + o >> amammuo

*Amammuo* ye nsemfua nkabom a ne mofologyi ne nsianim /a-/ (edinye mofem), edin *oman*, adeye *bu* ne nsiakyire /-o/ (edinye mofem). Omene nhyehyeee mmieniu na eda adi wo asemfua *amammuo* mu. Twi kasa mu se yenyia nsemfua nkabom a, konsonante a etwa nsemfua nkabom no fa a edi kan to sesa ne beaee su ne konsonante a edi nsemfua nkabom no fa a eto so mmieniu no kan konya beaee koro (the same place of articulation). Eno akyi no, se hwenem konsonante di nsemfua nkabom no fa a edi kan to, na konsonante a edi nsemfua nkabom no fa a eto so mmieniu no anim ye agyinaee a epo (voiced plosive) a, hwenem konsonante no mene agyinaee a epo konsonante no ma won mmieniu benya yebaa koro (the same manner of articulation). Enam saa fonologyi nhyehyeee wei so nti na yehunu nsakraee kakra wo asemfua 'amammuo' twere mu no.

#### (58) Ebebuo

ED.	+	ADY.	+	NSK.	>> Edin Asemfua
εβε	+	bu	+	o	>> εβεbuo

Asemfua *εβεbuo* ye nkabom a ne nkyekyemu ne edin *εβε*, adeye *bu* ne nsiakyire /-o/ (edinye mofem).

#### (59) Atemmuo

ED.	+	ADY.	+	NSK.	>> Edin Asemfua
atɛn	+	bu	+	o	>> atɛmmuo

*Atemmuo* nso ye nsemfua nkabom a ne mofologyi ne edin *atɛn*, adeye *bu* ne nsiakyire /-o/ (edinye mofem).

#### (60) Anikyibuo

ED.	+	NKY.	+	ADY.	+	NSK.	>> Edin Asemfua
ani	+	kyie	+	bu	+	o	>> anikyibuo

Nsemfua nkabom *anikyibuo* mofologyi ne edin *ani*, edin nkyerekyeremu *kyie*, adeye *bu* ne nsiakyire /-o/ (edinye mofem).

**(61) Abambuo**

ED. + EDAKYI. + ADY. + NSK. >> Edin Asemfua  
 aba + mu + bu + o >> abambuo

Asemfua *abambuo* nso ye nkabom a ne nhyehyee ne edin *aba*, edinakyisibea *mu*, adeye *bu* ne nsiakyire /-o/ (edinye mofem).

**(62) Kwaseabuo**

NKY. + ADY. + NSK. >> Edin Asemfua  
 kwasea + bu + o >> kwaseabuo

*Kwaseabuo* ye nsemfua nkabom a ne mofologyi ne edin nkyerekyeremu *kwasea*, adeye *bu* ne nsiakyire /-o/ (edinye mofem).

**(63) Atopabuo**

NSM + ADY. + ED. + ADY. + NSK. >> Edin Asemfua  
 a + to + pa + bu + o >> atopabuo

Asemfua *atopabuo* nso ye nkabom a ne nkyekyeremu ne nsianim /a-/ (edinye mofem), adeye *to*, edin *pa*, adeye *bu* ne nsiakyire /-o/ (edinye mofem).

**4.2.3 Nsemfua a Yenya firi Di mu**

Saa ofa-nkorabata yi nso kyere nsemfua ahodo a yefa mofologyi akwan so nya firi adeye *di* mu. Nsemfua yi na edidi so no:

**(64) Adedie**

ED. + ADY. + NSK. >> Edin Asemfua  
 adee + di + e >> adedie

*Adedie* ye nsemfua nkabom a ne mofologyi ne edin *adeɛ*, adeye *di* ne nsiakyire /-e/ (edinye moofem).

**(65) Nkonimdie**

NSM. + ADY. + ED. + ADY. + NSK. >> Edin Asemfua  
 n + ko + nim + di + e >> nkonimdie

Nsemfua nkabom *nkonimdie* nso nhyehyeeɛ ne nsianim /n-/ (edinye moofem), adeye *ko*, edin *nim*, adeye *di* ne nsiakyire /-e/ (edinye moofem).

**(66) Sikadie**

ED. + ADY. + NSK. >> Edin Asemfua  
 sika + di + e >> sikadie

Asemfua *sikadie* nso ye nkabom a ne nkyekyemu ne edin *sika*, adeye *di* ne nsiakyire /-e/ (edinye moofem).

**(67) Atorodie**

ED. + ADY. + NSK. >> Edin Asemfua  
 atorɔ + di + e >> atorodie

Mofologyi nhyehyeeɛ a ewɔ *atorodie* mu ne edinye ne nsemfua nkabomye. Efiri edin *atorɔ*, adeye *di* ne nsiakyire /-e/ (edinye moofem) mu.

**(68) Demdie**

ED. + ADY. + NSK. >> Edin Asemfua  
 dem + di + e >> demdie

Asemfua *demdie* nso mofologyi nhyehyeeɛ ye edinye ne nsemfua nkabomye. Efiri edin *dem*, adeye *di* ne nsiakyire /-e/ (edinye moofem) mu.

**(69) Bemdie**


ED. + ADY + NSK. >> Edin Asemfua  
 bem + di + e >> bemdie

*Bemdie* yɛ nsemfua nkabom a ne mɔfɔlɔgyi ne edin *bem*, adeye *di* ne nsiakyire /-e/ (edinyɛ mɔɔfɛm).

**(70) Nkradie**

NSM. + ADY. + ADY. + NSK. >> Edin Asemfua  
 n + kra + di + e >> nkradie

Mɔfɔlɔgyi nhyehyɛɛɛ a ɛwɔ asemfua *nkradie* mu yɛ edinyɛ ne nsemfua nkabomyɛ. Ne nkyekyɛmu ne nsianim /n-/ (edinyɛ mɔɔfɛm), adeye *kra* ne *di*, ɛnna nsiakyire /-e/ (edinyɛ mɔɔfɛm).



**(71) Yiedie**

ɔKY. + ADY. + NSK. >> Edin Asemfua  
 yie + di + e >> yiedie

Mɔfɔlɔgyi nhyehyɛɛɛ a ɛwɔ asemfua *yiedie* mu ne edinyɛ ne nsemfua nkabomyɛ. Ne nkyekyɛmu ne ɔkyerɛfɔɔ *yie*, adeye *di* ne nsiakyire /-e/ (edinyɛ mɔɔfɛm).

**(72) Yawdie**

NKY. + ADY. + NSK. >> Edin Asemfua  
 yaw + di + e >> yawdie

Mɔfɔlɔgyi nhyehyɛɛɛ a ɛwɔ asemfua *yawdie* mu nso yɛ edinyɛ ne nsemfua nkabomyɛ. Ne nkyekyɛmu ne edin nkyerɛkyerɛmu *yaw*, adeye *di* ne nsiakyire /-e/ (edinyɛ mɔɔfɛm).

**(73) Awudie**

NSM. + ADY. + ADY. + NSK. >> Edin Asemfua  
 a + wu + di + e >> awudie

Mofologyi nhyehyee nso a ewo asemfua *awudie* mu ye edinye ne nsemfua nkabomye. *Awudie* nhyehyee ne nsianim /a-/ (edinye mofem), adeye *wu* ne *di*, enna nsiakyire /-e/ (edinye mofem).

**(74) Fɛwdie**

ED. + ADY. + NSK. >> Edin Asemfua  
 fɛw + di + e >> fɛwdie

*Fɛwdie* ye nsemfua nkabom a efiri edin *fɛw*, adeye *di* ne nsiakyire /-e/ (edinye mofem) mu.

**(75) Hwammodie**

ED. + ADY. + NSK. >> Edin Asemfua  
 hwammɔ + di + e >> hwammodie



Nsemfua nkabom *hwammodie* mofologyi ne edin *hwammɔ*, adeye *di* ne nsiakyire /-e/ (edinye mofem).

**(76) Atɛnnie**

ED. + ADY. + NSK. >> Edin Asemfua  
 atɛm + di + e >> atɛnnie

*Atɛnnie* nso ye nsemfua nkabom a ne nhyehyee ne edin *atɛm*, adeye *di* ne nsiakyire /-e/ (edinye mofem).

**(77) Asɛnnie**

ED. + ADY. + NSK. >> Edin Asemfua  
 asɛm + di + e >> asɛnnie

*Aseinnie* nso ye nsemfua nkabom a efiri edin *asem*, adeye *di* ne nsiakyire /-e/ (edinye mɔɔfem) mu.

**(78) Ahennie**

NSM. + ED. + ADY. + NSK. >> Edin Asemfua  
 a + ɔhene + di + e >> ahennie

Asemfua *ahennie* ye nkabom a ne mɔɔfɔlogyi ne nsianim /a-/ (edinye mɔɔfem), edin *ɔhene*, adeye *di* ne nsiakyire /-e/ (edinye mɔɔfem).

**(79) Asɔfodie**

NSM. + ED. + ADY. + NSK. >> Edin Asemfua  
 a + ɔsɔfo + di + e >> asɔfodie

Nsemfua nkabom *asɔfodie* firi nsianim /a-/ (edinye mɔɔfem), edin *ɔsɔfo*, adeye *di* ne nsiakyire /-e/ (edinye mɔɔfem) mu.

**(80) Gyedie**

ADY. + ADY. + NSK. >> Edin Asemfua  
 gye + di + e >> gyedie

Mɔɔfɔlogyi nhyehyeee a ewɔ asemfua *gyedie* mu ye nsemfua nkabomye ne edinye. *Gyedie* firi adeye *gye*, *di* ne nsiakyire /-e/ (edinye mɔɔfem) mu.

**(81) Sugyadie**

ED. + ADY. + NSK. >> Edin Asemfua  
 sugya + di + e >> sugyadie

Asemfua *sugyadie* ye nkabom a ne nhyehyeee ne edin *sugya*, adeye *di* ne nsiakyire /-e/ (edinye mɔɔfem).

**(82) Nsedie**

NSM. + ADY. + ADY. + NSK. >> Edin Asemfua  
 n + se + di + e >> nsedie

Mofologyi nhyehyeee a ewo asemfua *nsedie* mu ye edinye ne nsemfua nkabomye. Ne nkyekyemu ne nsianim /n-/ (edinye mofem), adeye *se*, *di* ne nsiakyire /-e/ (edinye mofem).

**4.2.4 Nsemfua a Yenya firi Hye mu**

Saa ofa-nkorabata yi nso kyere nsemfua ahodoɔ a yefa mofologyi akwan so nya firi adeye *hye* mu. Nsemfua yi na edidi soɔ no:

**(83) Ahyeasee**

NSM. + ADY. + EDAKYI. >> Edin Asemfua  
 a + hye + aseɛ >> ahyeasee

Mofologyi nhyehyeee a ewo asemfua *ahyeasee* mu ye edinye ne nsemfua nkabomye. Ne nkyekyemu ne nsianim /a-/ (edinye mofem), adeye *hye* ne edinakyisibea *aseɛ*.

**(84) Mmarahyebadwa**

ED. + ADY. + ED. + ED. >> Edin Asemfua  
 mmara + hye + (ɔ) ba + dwa >> mmarahyebadwa

Nsemfua nkabom *mmarahyebadwa* nhyehyeee ne edin *mmara*, adeye *hye*, edin *ba* ne *dwa*.

**(85) Awerɛhyemu**

NSM. + ED. + ADY. + EDAKYI. >> Edin Asemfua  
 a + werɛ + hye + mu >> awerɛhyemu

*Awerɛhyemu* ye nsemfua nkabom a ne mofologyi ne nsianim /a-/ (edinye mofem), edin *werɛ*, adeye *hye* ne edinakyisibea.



**(86) Animuonyamhye**

ED. + EDAKYI. + ADY. + ADY. >> Edin Asemfua  
 anim + mu (o) + nyam + hye >> Animuonyamhye

Asemfua *animuonyamhye* nso ye nkabom a ne nkyekyemu ne edin *anim*, edinakyisibea *mu*, adeye *nyam* ne *hye*.

**(87) Nkɔmhye**

NSM. + ADY. + ADY. >> Edin Asemfua  
 n + kɔm + hye >> nkɔmhye

Mɔfɔlɔgyi nhyehyeeɛ a εwɔ asemfua *nkɔmhye* mu ye edinye ne nsemfua nkabomye. Ne nkyekyemu ne nsianim /n-/ (edinye mɔɔfem), adeye *kɔm* ne *hye*.

**(88) Nkuranhye**

ED. + ADY. >> Edin Asemfua  
 nkuran + hye >> nkuranhye

*Nkuranhye* nso mɔfɔlɔgyi nhyehyeeɛ ye edinye ne nsemfua nkabomye. Ne nkyekyemu ye edin *nkuran* ne adeye *hye*.

**(89) Kεteasehye**

ED. + EDAKYI. + ADY. >> Edin Asemfua  
 kεte + aseε + hye >> kεteasehye

Asemfua *kεteasehye* ye nkabom a ne nkyekyemu ne edin *kεte*, edinakyisibea *aseε* ne adeye *hye*.

**(90) Nhyεsoɔ**

NSM. + ADY. + EDAKYI. + NSK. >> Edin Asemfua  
 n + hye + so + ɔ >> nhyεsoɔ

Mofologyi nhyehyeee a ewo asemfua *nhyesoo* mu ne edinye ne nsemfua nkabomye. Ne nkyekyemu ne nsianim /n-/ (edinye mɔɔfem), adeye *hye*, edinakyisibea *so* ne nsiakyire /-ɔ/ (edinye mɔɔfem).

**(91) Abahyebone**

NSM. + ED. + ADY. + NKY. >> Edin Asemfua  
a + ɔba + hye + bone >> abahyebone

Nsemfua nkabom *abahyebone* nhyehyeee ne nsianim /a-/ (edinye mɔɔfem), edin *ɔba*, adeye *hye* ne edin nkyerekyeremu *bone*.

**(92) Hyebere**

ADY. + ɔKY. >> Edin Asemfua  
hye + bere >> hyebere

*Hyebere* mofologyi nhyehyeee ne edinye ne nsemfua nkabomye. Ne nkyekyemu ne adeye *hye* ne ɔkyerefoɔ *bere*.

**(93) Bɔhye**

ADY. + ADY. >> Edin Asemfua  
bɔ + hye >> bɔhye

Asemfua *bɔhye* nso mofologyi nhyehyeee ne edinye ne nsemfua nkabomye. Efiri adeye *bɔ* ne *hye* mu.

**(94) Nhyehyeee**

NSM. + ADY. + ADY. + NSK. >> Edin Asemfua  
n + hye + hye + ee >> nhyehyeee

Mofologyi nhyehyeee a ewo asemfua *nhyehyeee* mu ye edinye ne nsemfua nkabomye. Ne nkyekyemu ne nsianim /n-/ (edinye mɔɔfem), adeye *hyehye* (nkakuho) ne nsiakyire /-ee/ (edinye mɔɔfem).

#### 4.3 Nsemfua a Yenya firi Adeye: Bɔ, Bu, Di ne Hyɛ mu Nkyerɛaseɛ

Saa ɔfa-nkorabata yi de nsemfua ahodoɔ a mefaa mɔfɔlɔgyi akwan so nya firii adeye: *bɔ, bu, di* ne *hyɛ* mu nkyerɛaseɛ ahodoɔ to dwa.

##### 4.3.1 Nsemfua a Yenya firi Bɔ mu Nkyerɛaseɛ

Ɔfa-nkorabata yi de nsemfua a menya firii adeye *bɔ* mu nkyerɛaseɛ ahodoɔ to dwa. Bere a nsemfua no nkyerekyeremu rekɔ so no, mede adeye *bɔ* metafo nkyerɛaseɛ ahodoɔ nso beto dwa. Nsemfua no ne wɔn nkyerɛaseɛ na ɛdidi soɔ no:

##### (95) i. Mpaebɔ

Adeye *paɛ* asekyere ne sɛ tea mu kasa. Obi tumi *paɛ* bere a ne biribi ayera na ɔpɛ sɛ ɔtea mu kasa ma onii korɔ a ɔwiaɛ no te na ɔsan de n'adeɛ brɛ no. Sɛ obi retɔn adeɛ wɔ dwa so a, ɔpɛ ne nneɛma sɛdeɛ ɔmanfoɔ bɛte na wɔatɔ bi ama no. *Bɔ* metafo asekyere ne sɛ wode asem to obi anaa otumfoɔ bi anim. Nea yɛhunu wɔ ha ne sɛ adeye *paɛ* ne *bɔ* nyinaa asekyere ne, “sɛ wode asem to obi anim”. *Mpaebɔ* yɛ honhom mu nkitahodie a obi fa so de n'ahiasɛm, n'adesrɛdeɛ anaa n'asɛda ma tumi bi a ɔwɔ gyɛdie wɔ ne mu. Saa nkitahodie yi tumi kɔ so wɔ onipa ne tumi bi te sɛ Otweaduampɔn, ɔbosom anaa nananom nsamanfoɔ ntam. Akanfoɔ taa fa nsaguo so na wode bɔ mpaɛɛ (mpaɛyie). Sɛ wɔrchyɛ fa anaase wɔreware a wɔbɔ mpaɛɛ de sɛ bammɔ ne nkɔsɔɔ firi wɔn atumfoɔ yi hɔ. Akristofoɔ ne asom ahodoɔ no mu nnipa nso bɔ mpaɛɛ kyere Onyankopɔn anaa tumi bi a wɔwɔ gyɛdie wɔ wɔn mu. Ɔmanfoɔ gye di sɛ adeɛ biara a wɔbisa no mpaebɔ mu na wode gyɛdie taa akyire no wo nsa ka.

##### (95) ii. *Mpaebɔ* yɛ akodeɛ kɛsɛɛ.

Nhwɛsɔɔ (95ii) asekyere ne sɛ mpaebɔ yɛ tumi a ɔdasani tumi fa so de di ako ma ɔnya nkonimdie. Ɛsiane sɛ mpaebɔ yɛ honhom mu nkitahodie nti, ɔmanfoɔ gye di sɛ wode wɔn asɛnhia kɔ mu a wɔbɛnya ho mmuaɛɛ.

**(96) i. Ntoabo**

Adeye *toa* nso asekyere ne se obi firi faako a ɔwɔ kɔ onipa foforo hɔ wɔ bea foforo. *Bɔ* metafo asekyere ne se wode asem to obi anim. *Ntoabo* ne se obi tu anammɔn nantenante de n'ahiasem kɔto ɔmanfoɔ anim se wɔnye mma no. Nyamesomfoɔ bɔ ntoa kɔdi wɔn som ho adanse kyere afoforo se wɔnye ntom na wone wɔn nsom. Amanyɔfoɔ nso bɔ ntoa kɔda wɔn anisoadehunu a wɔwɔ ma ɔmanfoɔ adi kyere wɔn se wɔnnyina so nto aba mma wɔn. Ntoabo nso tumi ye anammɔn a ɔpanin bi tu kɔ adwumayefoɔ a wɔhyehye n'ase hɔ ne wɔn kɔdi nkitaho kɔhwe senea wɔreye wɔn adwuma afa. Saa anammɔntuo wei mu no, ɔpanin no ne n'adwumayefoɔ ka wɔn tiri pam ho toatoa adwene hwe ɔkwan pa a wode adwuma no befa so na aboa ama adwuma no atu mpon.

(96) ii. Onimuonyamfoɔ Dwomɔ *ntoabo* mu na ɔhunuu kurom hafoɔ haw.

Nhwesoo (96ii) asekyere ne se, bere a ɔpanin Dwomɔ tuu anammɔn kɔɔ ɔmanfoɔ no nan so ne wɔn kɔdii nkitaho na ɔhunuu amanee ne atetee a wɔrefa mu.

**(97) i. Dawubo**

*Dawuro* ye dadee bi a wode abaa hwehwe mu de to nkra ma ɔmanfoɔ. *Bɔ* nso asekyere wɔ ha ne se wode biribi hwe adee bi mu. Enti *dawubo* ne se wode biribi te se abaa hwehwe dawuro mu. *Bɔ* metafo asekyere ne se wode asem bi to ɔmanfoɔ anim. *Dawubo* ye nkratoɔ a yenam so de asem bi ho amannebɔ to ɔmanfoɔ anim. Se obi retɔn adee na ɔpe se nkurofoɔ hunu adee no na wɔtɔ bi a, ɔbɔ ho dawuro de ma ɔmanfoɔ te ne nka. Se ade bɔne te se nyarewa, awudie, akwanhyia ne atoyerenkyem ba kuro bi mu a, nananom ne mpanimfoɔ ma wɔbɔ dawuro de yi ɔmanfoɔ asotire senea ebeye na obiara beda ne ho so. Afei, se mpanimfoɔ pe se wode asem bi to ɔmanfoɔ anim fa wɔn asetena mu nsem bi te se ɔman adwumako anaa adee biara ho a, wɔbɔ dawuro fa ho ma ɔmanfoɔ nya no ntee. Kane no na dawuro ankasa na wode to

saa nkra yi, nanso enne yi wotumi fa radio ne televihiyin so de to saa nkra yi a eno nso ye dawubo.

(97) ii. *Dawubo* nnwuma no reboa aman yi mpontuo.

Boa a dawubo nnwuma no reboa aman yi mpontuo ne se, woma amanfoɔ nya aman yi mu nsem dodoɔ no ara nteeɛ. Wodi dwuma bi te se, woto nkra fa sukuu ho ma nkurɔfoɔ nya bi ko, woto nkra fa nnwuma ho ma nkurɔfoɔ nya bi ye sane to nkra fa adetɔndee ho ma amanfoɔ nya bi to. Wosane kyerekyere amanfoɔ ma wɔhunu wɔn asedeɛ te se etotua, abatoɔ ne mmara so di. Saa nneema wei nyinaa boa aman no kanko ne mpontuo.

(98) **Akotiabo**

Adeye *ko* asekyere ne se wo ne obi nya ntokwa. Se wotia biribi a na ekyere se wompene ade korɔ so anaa w'ani nnye ho. *Bɔ* nso metafo asekyere ne se woka asem kyere obi. *Akotiabo* ne se obi nam sabuakwan te se ebebuo, nnwontoɔ, kasa, asa ne nneyee so ka asem yaayaa kyere ofoforo na onwae anim anaa onsekyere no nka nsi n'anim pen! Ansa na akotiabo beko so wo nnipa bi ntam no na ntawantawa wo wɔn ntam. Nnipa a wotaa bo wɔn ho akotia pa ara ye akorafɔ. Amanfoɔ taa fa akotiabo so de ko tia wɔn a wone wɔn wo asem a wɔnnya amaneɛ biara anaase obi ntumi nsaman wɔn. Eto da na onipa a obi rebo no akotia no hunu akyire a, otumi so so ma ekowie anobaabae anaase ntokwa. Esiane se akotiabo nam sabuakwan so nti, onipa a obi abo no akotia no ntumi nnyina so nsaman nea obɔɔ no akotia no wo mpanimfoɔ anim anaase asennibea.

(99) i. **Osebo**

*Ose* ye anigyee a obi nya no wo adeɛ bi ho. Metafo nkyereaseɛ mu no, *bo* ne se woda biribi adi ma amanfoɔ te anaa hunu. *Osebo* ye dede a obi ye de kyere anigyee a wanya afa adeɛ bi ho. *Osebo* sane tumi ye nkonimdie ho nsenkyerene a yede yen ano ye ma

omanfoɔ hunu anigyee sononko a yɛanya. Sɛ wɔsi ɔhene foforo na ɔmanfoɔ ani gye na wɔredi ho ahurusie a, wɔbo ose de gye no tom. Sɛ ɔmanfoɔ kɔnya agudee bi te sɛ sika kɔkɔ wɔ baabi a, wɔbo ho ose. Saa ara nso na sɛ ɔmanfoɔ di wɔn atamfo so nkonim wɔ ɔsa mu a wɔbo ho se. Sɛ wotwɛn adee bi a ɛda w'akoma so kye na wo nsa ka a wotumi nso bo ho ose. Mpre pii no, sɛ nkomdie anaa anigyee ba obi anaa ɔmanfoɔ asetena mu a na wɔbo ose.

(99) ii. Ahafofɔ de *osebo* daa ɔmanpanin ase bere a wɔnyaa wɔn mantam.

Nhwɛsoɔ (99ii) nkyereasee ne sɛ, bere a wɔtee mantam maa Ahafofɔ no, wɔde dedeye a anigyee wɔ mu daa ɔmanpanin ase sɛ ɔtuu anammɔn boaa wɔn maa wɔn nsa kaa wɔn akoma so adee. Wei kyere sɛ na wɔatwɛn akye sɛ wɔn nsa beka wɔn mantam, enti seesei a ɔmanpanin aboa wɔn ama wɔn nsa aka no, wɔn akoma so adee aba mu, enti wɔanya anigyee mmoroso a wɔreda no adi ama obiara ahu.

#### (100) Benabo

*Bo* metafo nkyereasee wɔ ha ne sɛ obi teatea mu. *Benabo* ye osu a nteateamu wɔ mu. Wei ne *osebo* bo abira, ɛsiane sɛ anigyee na ɛde *osebo* ba, ɛna awerehoɔ nso na ɛde *benabo* ba. *Benabo* abɔsee ne sɛ, na bosom bi din de 'Bena' a na ɔwɔ Asanteman mu. Saa bosom yi na ɔkyiri dede. Ne saa nti sɛ asem yaayaa to obi na onii koro no pɛ sɛ ɔsu twa adwo a, gye sɛ ɔkɔyi bosom no asotire ma bosom no ma no kwan ansa na watumi asu. ɛnam kwan wei so na ɛmaa yɛnyaa asemfua 'benabo', a n'asekyere ne sɛ "bo bena amanee". Sɛ awerehosɛm to obi ma ɛka onipa no akoma pa ara na ɔbo bena. Awerehosɛm yi betumi aye sɛ obi ahwere ne dofo, ahwere n'agyapadee, abɔ ka wɔ dwumadie bi a ɔde ne sika puduo kɔhyee mu, anaase obi de ne were ahye onipa bi mu na wadi no hwammɔ.

**(101) i. Nkurobo**

*Nkurobo* nkyereasee ne se worekeka nneema bi asisi ani ama no awie pɛye. Se mmofra resua aduanenoa wɔ agodie kwan so a yeka se wɔrebɔ nkuro. Ɛne se, wɔkeka nneema bobom hwe se wɔn aduanenoa no bɛdi mu aye te se mpanimfoɔ deɛ no a. *Bɔ* metafo asekyere ne se wode asem bi to dwa. *Nkurobo* metafo nkyereasee ye anodisem a mpanimfoɔ gye no wɔ asennie mu pɛ asem bi pomasiberɛ. Ansa na mpanimfoɔ de asem bi ho atemmuo bɛto dwa wɔ asennie mu no, ɛwɔ se nkurobo kɔ so ansa. Ɛne se, wɔgye afaanu a wɔredi wɔn asem no anodisem de toto nsenceɛ ani hwe nea ɔdi bem ne nea ɔdi fo. Saa anodisem a ɛkɔ so wɔ asennie mu yi na yɛfre no *nkurobo*. Akanfoɔ asennie baako a nkurobo taa kɔ so wɔ mu ye awaresem. Ne saa nti wɔwɔ ɛbɛbuo bi se, “Awareɛ gu nkuro”, a n’asekyere ne se, ansa na mpanimfoɔ bɛgye awareguo atom no, gye se awarefoɔ no de wɔn anom nsem to dwa ansa. Nkurobo boa ma yɛhunu nokore a ɛwɔ asem bi mu.

**(101) ii. *Nkurobo* ho hia wɔ asennie mu.**

Hia a nkurobo ho hia wɔ asennie mu ne se, ɛno na mpanimfoɔ (atemmuafoɔ) gyina so de hunu asem bi mu nokore ansa na wode wɔn atemmuo ato dwa wɔ asennie mu.

**(102) i. Duabo**

*Dua* ye abaa dendɛn a wode hwe biribi so ma ade korɔ tumi sɛɛ. *Bɔ* nso asekyere ne se obi de ne nsa anaa ne honam akwaa bi anaa biribi hwe obi anaa biribi (mu). *Duabo* abɔsɛɛ ne se, kane no na wofom obi ma onipa korɔ a woafom no no bo fu wo pa ara a, na wafa dua (abaa) de abɔ wo apira wo de atua wo bɔne no so ka. Ɛsiane se dua a na onipa tam de bɔ nea wafom no no ye aniwɔso nti, se nsunsuanso bɔne bi ba nea wapira no so a, na onipa no tumi nya asem wɔ nananom ne mpanimfoɔ anim. Ne saa nti, ɔmanfoɔ yɛɛ adwene se wɔmfɛ dua mmɔ obi a wafom wɔn wɔ aniwɔsoɔ bio, na mmom wɔbɛsaman onii korɔ ama tumi te se Nyame, agradaa, abosom, nsuo ne

nsamanfoɔ na wɔadi wɔn asem wɔ honhom mu, na deɛ ɔbedi fɔ no na tumi no ankasa atwe n'aso wɔ honhom mu. *Bɔ* metafo asekyere ne se woka asem kyere tumi bi. *Duabɔ* metafo nkyereasee ne se obi saman onipa a wafom no ma tumi te se Nyame, agradaa, abosom, nsuo ne nsamanfoɔ wɔ honhom mu ama wɔatwe onipa no aso wɔ bɔne bi a waye ho. Eto da nso a, obi tumi bɔ n'ankasa ho dua de kyere se ɔdi asem bi mu bem anaase onnim asem bi ho hwee. Duabɔ botae pa ara ne se wode hwehwe asem bi mu nokore. Nneema a etumi de duabɔ ba ye asisie, ntwatosoɔ, korɔno, se obi akɔfa ɔfoforo yere anaa ne kunu ne kwaseabuo. Mpre pii no, eye a duabɔ ho nsunsuansoɔ nye papa. Onipa a duabɔ anya no yare ma ɔtumi fa mu hwere ne nkwa. Ansa na onipa no benya ahotɔ no gye se wɔdane dua no.

(102) ii. Ense se obiara de *duabɔ* di agoro.

Nhwesoɔ (102ii) nkyeremu ne se, esiane se tumi wɔ duabɔ mu na etumi di onipa nnya nti, enni kwan se ɔdasani bɔ dua bere biara a ɔpe.

(103) i. **Adwabɔ**

*Dwa* ne se nnipakuo bi adi ahyia wɔ faako. *Bɔ* metafo nkyereasee ne se wode asem bi to dwa. *Adwabɔ* ye nhyiamu a nnipakuo bi di de toatoa adwene fa wɔn asetena mu nsem ho. Mpre pii no, se asem bi si ɔman mu anaa mpanimfoɔ pe se woyi ɔmanfoɔ asotire fa asenhia bi ho a, woto nsa fre ɔmanfoɔ na wode asem no ato wɔn anim, saa nhyiamudie yi na yefre no adwabɔ. Akanman mu no, eye a nananom anaa nnipa a wɔwɔ tumi wɔ ɔman no mu na wɔtaa bɔ dwa. Bere a wɔtaa bɔ dwa ye afahyebere, bere a ɔman mu panin bi pe se ɔne ɔmanfoɔ dwendwene wɔn kuro ho anaa ɔde asenhia bi to wɔn anim.

(103) ii. ɔmanpanin kasae wɔ *adwabɔ* no ase.

Nhwesoɔ (103ii) nkyereasee ne se, bere a ɔmanfoɔ adi ahyia wɔ faako no na ɔmanpanin de n'anom nsem a ɔwɔ ma wɔn too wɔn anim.



**(104) Kyenkubo**

*Kyenku* ne se nnipakuo bi gyinagyina ho anaa tenatena ase twa kanko. Enna *bo* nso metafo asekyere ne se wode asem bi to dwa. Se asem bi si na eho hia se omanfo hyia mu fa ho adwene amono mu ho ara a, wotumi bo kyenku de fa ho adwene. Omanfo tumi bo kyenku de dwene ade pa sane tumi de dwene ade bone ho. Mpre pii no, ansa na nnipa bi bebɔ kyenku no na wowo botae bi si won ani so a wɔrebɛdwendwene ho wo bere bi mu.

**(105) i. Abɔsoɔ**

*Bo* asekyere ne se wode biribi te se ahoma, belete anaa wɔkye fam onipa honam akwaa bi te se ne sisi anaa ne nsa. *Abɔsoɔ* ye ntama teaa bi a yede mia atadee te se sleete, nika anaa trɔsa mu ma emu ye den senea yehye a enworɔworɔ. Mmaa mpanimfo taa de won sika hye won abɔsoɔ mu de bo won asene senea ebeye na sika no nyera. Se wɔsi obi hene foforo na ɔresua ntamafura a, mpanimfo taa bo no abɔsoɔ senea ebeye na ne ntama nkɔpa wo badwam na enkɔfa animguasee mmre no ne oman no.

**(105) ii. Abena dwatire nyinaa hye n'abɔsoɔ mu.**

Nhwesoɔ (105ii) asekyere ne se Abena de ne sika a ɔde bɛdi dwa nyinaa asie n'abɔsoɔ mu a ɔde akyekyere n'asene rebɔ ho ban sɛdeɛ ebeye a sika no nyera.

**(106) i. Abɔsobaa**

*Bo* aniani nkyerɛaseɛ ne se obi de adeɛ hwe biribi so anaa mu. *Abaa* nso ye dua kumaa bi a yetumi de hwe biribi so ma no pae anaa bu. *Abɔsobaa* ye dua anaa dadeɛ dendɛn a yede hwehwe biribi te se egya so ma egya no pae. Metafo nkyerɛaseɛ mu no, *abɔsobaa* ye adeɛ a yede foa dwumadie bi so ma dwumadie no wie pɛye. Se ewo se onipa bi tu anammɔn ye biribi na onipa no antu saa anammɔn no na onipa foforo

kae onii korɔ no nea εwɔ sɛ ɔyɛ a, yɛhunu onipa a ɔkaɛɛ onii korɔ maa no tumi dii ne dwuma no sɛ ɔyɛ abɔsobaa. ɛne sɛ, waboa akaɛ onipa no ama watumi adi ne dwuma.

(106) ii. *Abɔsobaa* na εma εgya pae.

Nea yɛhunu no wɔ nhwɛsoɔ (106ii) mu ne sɛ abɔsobaa no yɛ den sene εgya, enti sɛ yɛde hwɛhwe εgya so a, εboa ma εgya no pae tumi wie pɛyɛ. Mɛtafɔ nkyɛɛasɛɛ mu no, sɛ obi de ne nimdɛɛ anaa n'ahɔɔden foa obi dwumadie so ma dwumadie no wie pɛyɛ a, saa onipa no nimdɛɛ anaa ahɔɔden no bɛyɛ abɔsobaa.

(107) i. **Mmaabɔ**

*Abaa* yɛ dua a wɔde hwe obi wɔ bɔne anaa mfomsoɔ bi a wayɛ ho. *Mmaabɔ* nkyɛɛasɛɛ ne sɛ wode mmaa boro obi de twe n'aso wɔ mfomsoɔ bi a wayɛ ho. Ne mɛtafɔ nkyɛɛasɛɛ nso ne sɛ abusua, kuro anaasɛ ekuo mmieniu bi mu nnipa de ntɔkwa denden asi ani na wɔrepirapira wɔn ho anaa wɔrekunkum wɔn ho. Nea εtumi kɔfa mmaabɔ bɛto afa ne afa bi ntam ne sɛ ɔfa baako mu nnipa bɛdwene sɛ ɔfa foforo mu nnipa asisi wɔn anaasɛ wɔabu wɔn animtia na wɔnte wɔn ho ase. Faako a mmaabɔ taa kɔ so wɔ ho no εyɛ a mpontuo nni ho. ɛfiri sɛ ɔmanfoɔ nnya asomdwoɛɛ mfa nni wɔn dwuma wɔ saa beaɛ ho.

(107) ii. *Mmaabɔ* kɔɔ so wɔ Drɔbo ne Gyapekromfoɔ ntam wɔ afe 2018 mu.

Afe 2018 mu no, ntɔkwa kɛsɛɛ bɛtoɔ Drɔbofoɔ ne Gyapekromfoɔ ntam a na ne farebae gyina asase ho ntawantawa so. Na ɔfa baako mu nnipa susu sɛ ɔfa foforo mu nnipa resisi wɔn afa wɔn agyapadɛɛ εna nteasɛ anyɛ adwuma maa εkɔfaa ntɔkwa kyɛnɛɛɛ bɛtoɔ wɔn ntam maa nnipa binom pirapiraɛ maa ebinom nso faa mu hwɛɛɛ wɔn nkwa.

**(108) i. Abobɔadeɛ**

Sɛ adeɛ bi *bɔ* a na ɛkyerɛ sɛ ɛmu adwa, apae anaase aseɛ. *Abobɔadeɛ* yɛ adeɛ a ɛtumi sɛɛ berɛ a biribi ahwe so anaa adeɛ bi aka no. Akanfoɔ hunu adeɛ a ɛtumi sɛɛ berɛ a biribi ahwe so te sɛ kosua, taforabɔtɔ (prete), ahwehwɛ, perentoa, ayowa anaa kukuo sɛ ɛyɛ abobɔadeɛ. Sɛ onipa anaa aboa bi wu nso a yɛka sɛ wayɛ abobɔadeɛ, a aseɛ ne sɛ wabɔ anaase wasɛɛ a woyɛ no hwɛɛ a ɛnyɛ yie bio.

**(108) ii. *Abobɔadeɛ*-tɔ yɛ kabɔ.**

Senti a abobɔadeɛtɔ yɛ kabɔ ne sɛ, sɛ wotɔ na ɛfiri wo nsa hwe fam kakra bi a, ɛbɛsɛɛ ama woabɔ ka anaase woahwere wo sika. ɛsiane sɛ abobɔadeɛ nni ahɔɔden nti, ɛyɛ a ne wura taa hwɛ no yie.

**(109) Abɔka**

Mɛtafɔ nkyerɛaseɛ mu no, *abɔka* yɛ onipa a ɔnni ahɔɔden na ɛrenkyɛ biara ɔbetumi ahwere ne nkwa. Yareɛ ne akwanhyia tumi ma obi hwere n'ahɔɔden na wabɛyɛ abɔka. ɔmanfoɔ ntaa ne obi a wayɛ abɔka nni agorɔ gidigidi, ɛfiri sɛ wogoro ne ho kɛsɛ a ɔbetumi awu ahyɛ wo ama woanya asɛm.

**(110) i. Asubɔ**

*Bɔ* mɛtafɔ asekyerɛ ne sɛ wodi dwuma bi. *Asubɔ* yɛ nhohoro ho dwumadie a wɔnam tumi ne honhom so hyɛ obi den ma no bɛka gyedie anaa ekuo bi ho. ɛyɛ amanneɛ a wɔyɛ de hohoro obi ho dontori anaa ɛfi ma ne ho te ma no ba tebea papa mu. Akanman mu no, sɛ obi sua akɔm wie a wɔbɔ no asu de hyɛ no den wɔ akɔm no mu. Afei, sɛ wɔde obi di adeɛ anaa wɔsi no hene wɔ kuro bi mu a, wɔbɔ no asu ma no nya tumi sononko sɛnea ɛbɛyɛ na ɔbɛnya ahɔɔden de adi ne dwuma. Bio, sɛ obi yare yarewuo na ɔsane ba nkwa mu bio a, mpanimfoɔ bɔ no asu de te ne ho firi yarewuo no ho, na wɔasane de agye no aba atasefoɔ mu bio. Sɛ obi ware foforo a, ɔwarefoɔ no mɛfoɔ tumi bɔ no asu de gye no bɛka awarefoɔ kuo ho. Sɛ obi nso gye Kristo di

foforo wɔ kristosom mu a, asɔre no mpanimfoɔ bɔ no asu de gye onipa no tom sɛ wabɛka wɔn som no ho. Enti asubɔ ye nnyentom nsɛnkyerɛnne a wɔye de gye obi bɛka ekuo bi ho.

(110) ii. *Asubɔ* ye akristofoɔ gyedie kɛsɛɛ.

Nhwɛsoɔ (110ii) nkyerɛsɛɛ ne sɛ, akristofoɔ hunu asubɔ sɛ eyɛ ɔkwan baako a wɔfa so de gye obi tom ma ɔbɛka kristosom kuo no ho. Wɔwɔ gyedie sɛ obi a ɔnnyee asubɔ nyamesom nwiee pɛye, ɛfiri sɛ onipa no nhohoroɔ ne ho fi ne bɔne nguie, ne saa nti sɛ onipa no wu mpo a, ɛbetumi asi ne nkwaɣyɛ ho kwan.

**(111) i. Kobɔ**

Asemfua *ko* kyere baako. *Bɔ* nso metafo asekyere wɔ ha ne sɛ obi nenam na ɔdi ne dwuma. *Kobɔ* ne sɛ obi ayɛ ankonam na ɔntena fie a ɔnenam di ne dwuma. Obi nenam basabasa di ne dwuma wɔ abɔntene na ɔntena fie a yɛhunu saa onipa no sɛ wabɔ ko. Saa ara nso na sɛ obi ye ankonam tu bata kɔhyɛ mu kye na n'abusuafoɔ ne n'adɔfoɔ nte ne nka a, yɛhunu sɛ saa onipa no abɔ ko. Obi a ɔntaa nkɔ sukuu anaa adwuma nso yɛhunu no sɛ wabɔ ko, ɛsiane sɛ dwumadie ahodoɔ a ɛkɔ so wɔ sukuu anaa adwuma no mu ho no, ɔmfa ne ho nhyɛ mu bi. Ne tiawatwa mu no, kobɔ ne sɛ obi ate ne ho afiri n'abusua, n'adɔfo anaa ne kuo a ɔwɔ mu dwumadie mu na wɔntɛ onipa ne nka. Omanfoɔ hunu obi a wabɔ ko sɛ ɔmpɛ nnipa, na ɔnni adwene pa nso, ne saa nti eyɛ a wɔmpɛ saa nipa no asem.

(111) ii. *Apea a-bɔ ko* te Libya.

Nhwɛsoɔ (111ii) nkyerɛmu ne sɛ, *Apea* ayɛ ankonam atu bata akɔtena ɔman Libya mu redi ne dwuma a n'abusuafoɔ ne n'adɔfo nte ne nka.

**(112) i. Afekubɔ**

*Afɛ* ne sɛ obi ne onipa bi bɔ tipɛn anaa wɔyɛ pɛ wɔ mfɛɛ anaa dibɛrɛ mu. ɛnna *ekuo* nso ne sɛ nnipa bi aka wɔn ho abom na wɔdi wɔn dwuma bom. *Bɔ* metafo asekyerɛ ne sɛ obi de ne ho kɔbata ofoforo ho. Afekuo ne sɛ nnipa a wɔbɔ tipɛn aka wɔn ho abom na wɔdi wɔn dwuma. ɛnna *afekubɔ* nso ne sɛ obi de ne ho hyehye nkurɔfoɔ a ɔne wɔn bɔ tipɛn (afekuo) na ɔntaa ntena ne fie. Onipa a ɔpɛ afekubɔ ntaa ntena ne fie, enti daa na ɔne ne mfɛfoɔ nenam. ɔmanfoɔ hunu afekubɔfoɔ dwumadie sɛ ɛnye papa. ɛsiane sɛ wɔntaa ntena wɔn fie na wɔnenam abɔntene so basabasa ye wɔn nneɛma nti, ɔmanfoɔ nnye wɔn dwumadie ntom wɔ wɔn asetena mu. Wɔhunu afekubɔni biara sɛ ɔnni suban pa.

**(112) ii. Afekubɔ nti Akoto nni ahotɔ.**

Ahotɔ a Akoto nni ne sɛ ɔntena ne fie, ɔdidi ne nnamfonom akyi yeyɛ nneɛma bi a ɛnsɔ ani na kampɛsɛ n'asom adwo no ama wanya ahotɔ wɔ n'asetena mu.

**(113) Korɔnɔbɔ**

*Korɔno* abɔsɛɛ firi asemfua 'ko' (sɛ obi ayɛ ankonam nenam abɔntene basabasa na ɔntena fie) mu. *Bɔ* nso asekyerɛ ne sɛ obi di dwuma bi. Yɛhunu sɛ obi a wabɔ ko dwuma a ɔdi nye papa. *Korɔnɔbɔ* ne sɛ wonam kwan bɔne so afa obi adeɛ. Korɔnɔbɔ bi tumi kɔ so berɛ a owifoɔ no awiawia ne ho afa adeɛ, ɛnna ebi nso tumi kɔ so wɔ nnaadaa kwan so (nyansa korɔno). Nyansa korɔno ne sɛ wonam adɛfɛdɛfɛ anaa mmradɛtoɔ so awia obi adeɛ. Korɔnɔbɔ ho nsunsuansoɔ nye papa. ɛfiri sɛ, sɛ ntawantawa ba owifoɔ no ne nea ɔrewia n'adeɛ no ntam a, wɔn mu bi tumi pira, di dem anaase hwere ne nkwa. Korɔnɔbɔ ye adeɛ a ɔmanfoɔ nnye ntom wɔ wɔn asetena mu, ne saa nti wɔmpɛ obi a ɔbɔ korɔno asem koraa.

**(114) i. Apoobɔ**

*Apoɔ* ne sɛ obi sisi ɔfoforɔ. *Bɔ* nso metafo asekyerɛ ne sɛ wodi dwuma bi a enye. *Apoobɔ* ye asisie kwan a wɔfa so gye biribi firi ɔfoforɔ nsam. Esane tumi kyere sɛ onipa bi nam nyansa kwan ne mmradetɔ so sisi obi anaa gye obi adeɛ firi ne nsam. Onipa a ɔbɔ apoɔ ye nea ɔnam kwan bi so di dwuma bi ma ɔmanfoɔ nya gyedie ne awerɛhyemu wɔ ne mu, na akyire yi wafa nyansa kwan so asisi anaa awia ɔmanfoɔ no.

(114) ii. Enam *apoobɔ* so na Ameyaw de anya ne ho.

Nhwesɔɔ (114ii) nkyerɛaseɛ ne sɛ, Ameyaw nam nnaadaa ne mmradetɔ so asisi nkurofoɔ agyegyɛ wɔn sika ne wɔn agyapadeɛ ama wabayɛ ɔdefoɔ seesei.

**(115) Dammɔ**

*Dam* ye adwene mu yareɛ a ɛma obi ye ne nneɛma basabasa anaa ɔntumi nnwene nye biribi pa mma ne ho ne afoforɔ. *Bɔ* aniani nkyerɛaseɛ ne sɛ biribi hwe obi anaa adeɛ bi so. Sɛ biribi hwe adeɛ bi so a, ɛtumi ka ade korɔ ma adeɛ no ho tumi te kyema. *Dammɔ* aniani nkyerɛaseɛ ne sɛ dam ahwe obi so. Metafo nkyerɛaseɛ mu no, *dammɔ* ne sɛ adwene mu yareɛ aka obi ama n'adwene ho ate kyema. *Dammɔ* ye tebea a obi kɔ mu berɛ a wanya adwene mu yareɛ na ɔntumi nni dwuma pa biara. Sɛ obi bɔ dam a, ade pa biara bɔ no. Enɛ sɛ, ɔnnya aduane pa nni, ɔnnya atade pa bi nhyɛ, ɔnnya dan pa bi nna mu, ɛnna ɔnnya ɔbaa anaa ɔbarima papa bi nso nware.

**(116) i. Ekabɔ**

*Ekɔ* ye sika a ɛwɔ sɛ obi tua no adeɛ bi ho. Sɛ wokɔ dwa so kɔtɔ adeɛ a, ɛboɔ a ɛda ade korɔ so na ɛye wo ka a wotua. Sɛ adeɛ a ɛmu ye duru bɔ obi so a, onii korɔ tumi pira. *Ekabɔ* aniani nkyerɛaseɛ ne sɛ sika a obi de wuraa dwumadie bi mu ahwe ne so. Metafo nkyerɛaseɛ mu no, *ekabɔ* ne sɛ obi ahwere sika anaa adeɛ bi a anka

ɔrehwehwe mfasoɔ afiri so. Etumi nso ye se woahwere biribi a w'ani da so se anka ebeso aba ama wo. Se obi de ne sika hye edwadie mu na ne sika no hye a wabɔ ka. Se obi de ne sika ne ne bere kɔpere tumidie anaa mpaninnie na ne nsa anka mpaninnie no nso a wabɔ ka. Se obi nyinsen na ne nsa anka ne ba no nso a eye ekabɔ. Ne senti ne se, se ne nsa kaa abɔfra no na ɔnyiniie a, anka ɔbenya mfasoɔ afiri ne so.

(116) ii. Owusu suro *kabɔ* nti ɔmpɛ dwadie.

Nhwesoɔ (116ii) asekyere ne se, esiane se Owusu nim se ɔde ne sika kɔwura dwadie mu a ne sika no behye nti, ɔmpɛ dwadie. Ebetumi aba se ɔnnim sikasem ntotoee nti se ɔde ne sika kɔhye dwadie mu a, deɛ etee biara ɔbehwere sika no ama wabɔ ka.

Se yehwe *bɔ* dwumadie ne ne nkyereasee wɔ nsemfua; *kobɔ*, *afɛkubɔ*, *korɔnobɔ*, *apoobɔ*, *dammɔ* ne ekabɔ mu a, yehunu se ekyerɛ biribi anaa dwumadie a enye na emma nkɔsoɔ.

(117) i. **Abɔtire**

*Etire* ye onipa honam dua no fa a ani, hwene, moma, ano ne tirinwi no wɔ ho. *Bɔ* metafo asekyere ne se wokata biribi so. *Abɔtire* ye biribi a wɔde kata etire so. Kane no na eye ekye a ahemfo na wɔtaa hye de siesie wɔn ho. Metafo nkyereasee mu no, *abɔtire* ye ahenkye anaa animpagya nsenkyerenne a yede ma obi de hye no animuonyam wɔ ade pa bi a waye ho. Se obi di dwumasono ma ɔman bi te se ɔdi ɔman no anim kɔ ɔko kɔdi mu nkonim a, ɔmanfoɔ tumi ma no abotire de hye no nkuran sane de hye no animuonyam. Se obi nso di nkonim wɔ akansie bi te se bɔɔlobɔ, ammirikatuo ne akuturukubɔ mu a, wɔtumi ma no abotire de hye no animuonyam wɔ adwuma pa a waye ho.

(117) ii. Osuani a ɔsua adeɛ yie nya nkonim *abɔtire* wɔ sɔhwe mu.

Nhwɛsoɔ (117ii) nkyerɛasɛɛ ne sɛ, osuani a ɔyere ne ho sua adeɛ yie tumi twa ne sɔhwɛ ma ɔdi mu nkonim. Sɛ ɔdi nkonim wɔ sɔhwɛ no mu a mpanimfoɔ ma no abodin krataa de hyɛ no animuonyam wɔ dwumasono a wadi no ho. Enti ɛha abodin krataa no abɛyɛ abɔtire a wɔde ahyɛ osuani no animuonyam. Ansa na obi bɛnya abɔtire wɔ dwumadie bi mu no, gye sɛ ɔyɛ ahosiesie mapa sane ko nkoden.

#### 4.3.2 Nsemfua a Yɛnya firi Bu mu Asekyere

Ɔfa-nkorabata yi nso de nsemfua a menya firii adeyɛ *bu* mu nkyerɛasɛɛ ahodoɔ to dwa. Bere a nsemfua no nkyerɛkyerɛmu rekɔ so no, mede adeyɛ *bu* metafo nkyerɛasɛɛ ahodoɔ nso bɛto dwa. Nsemfua no ne wɔn nkyerɛasɛɛ na ɛdidi soɔ no:

##### (118) i. Amammuo

*Oman* yɛ nnipakuo bi a wɔte kuro anaa asase koro bi so a wɔbɔ mu yɛ adeɛ biara. *Bu* metafo nkyerɛasɛɛ wɔ ha ne sɛ obi anaa nnipa bi toto nneɛma de hwɛ adeɛ bi kankɔ. *Amammuo* ne sɛ wɔde tumi ama onipa anaa nnipakuo bi sɛ wɔnni ekuo, kuro anaa ɔman bi so na wɔntoto nneɛma mfa mpe wɔn kankɔ. Wɔde amammuo hyɛ nnipa bi nsa a, ɔmanfoɔ de ekuo anaa ɔman no mmara taa wɔn akyi sɛdɛɛ ɛbɛyɛ na wɔbɛnya tumi de adi wɔn dwuma de apere ekuo anaa ɔman no mpontuo. Ɔmanfoɔ hwɛhwɛ sɛ mpanimfoɔ a wɔde tumi ahyɛ wɔn nsa wɔ amammuo mu no bɛyɛ nhyehyɛɛ ne ntotoɛɛ berɛ ano berɛ ano ama wɔadi yie wɔ wɔn asetena mu. Ɔmanfoɔ tumi to aba de yi yi mpanimfoɔ ma wɔdi wɔn so wɔ amammuo mu. Wei taa kɔ so wɔ ka bi ma menka bi amammuo mu. Nanso sɛ ɔmanfoɔ repɛ ɔhene ama wadi adeɛ wɔ Akanman mu deɛ a, wɔnto aba, na mmom mpanimfoɔ de wɔn ani to fam na wɔayi ɔdehyɛɛ a ɔsɛ fata ama no abɛbu ɔman no.

(118) ii. Ɔmanfoɔ ani gye ɔpanin no *amammuo* ho nti daa wɔkamfo no.



Nkyereasee a ewo nhwesoo (118ii) mu ne se, esiane se omanfooo no de tumi maa opanin no se omfa nni won so, na opanin no ye nhyehyeee pa a eboa nnipa no kanko nti, ama omanfooo no bo n'aba so daa.

**(119) i. Ebebuo**

Ebe ye nsem a yen nananom aboo no po de da abraboo (asetena) mu osuahunu adi. Eye nsentiaa bi a esi asem bi so dua. Eye adwenemunsem a eda oman bi nyansa, gyedie, suban, nneyoee ne won asetena mu nsem adi (Agyekum, 2011:51). *Bu* metafo nkyereasee ne se wode nyansasem (witticism) to dwa. Agyekum ko so kyere *ebebuo* mu se eye kasakyeremu anaa kasafrenkyemm a yede kyere asem bi a yere se yeka ase anaa yede si asem so dua ma nnipa te ase pefee. Ebebuo ye aduradee a ema kasa no ye hwam, eda adwene titire a ewo asem no mu no adi ma nteasee yi ne ho. Se asem mmaee a Akanfooo mmu be. Bere a wode bu be ye nsaguo mu, asennie mu, afotuo mu, adwumaye mu ne abraboo mu dwumadie nkaee mu. Yentaa mfa daadaa kasa na ebu be. Ebebuo mu no, yetumi fura asem bi ho ntama, ka no wo kwan foforo so ma ne nteasee beye na. Esiane se yenka asem watraa wo ebebuo mu nti, ansa na obi bete asem bi a yekaa no wo ebebuo kwan so ase no, gye se owo kasa no ho nimdee mapa.

**(119) ii. Wote faako a, wote w'adee so.**

Nhwesoo (119ii) ye ebebuo a n'asekyere ne se, se woye onihafoo na woammoo wo ho so anye adwuma den amfa ampe sika a, wobetena wo yiedie so ama woadi hia wo abraboo mu.

**(120) i. Atemmuo**

*Atemmuo* ye gyinaesie a obi anaa abadwafoo a wowo tumi se wodi asem (atemmuafooo) de to dwa bere a woadi onipa bi asem awie. Ansa na atemmuo beba no, atemmuafoo toto onipa a woredi n'asem no ano hwe nokore a ewo asem bi a waka mu, anammoo bi a watu mu anaa dwuma bi a wadi mu. Ansa na wode atemmuo beto

dwa no, wɔma onipa a wɔredi n'asem no akwannya ma ɔde n'adansedie a ɔwɔ fa asem no ho nyinaa to dwa, sɛdɛɛ ɛbɛyɛ na wɔbɛhunu asem no mu nokorɛ. Wei akyi no, atemmuafoɔ no de onipa a wɔredi n'asem no adansedie toto nsɛnɛɛ ani hwɛ sɛ aba bi wɔ mu a. Sɛ wɔwie na onii korɔ adi nokorɛ wɔ ne dwumadie mu a, wɔbua no bem, na mmom sɛ wafom wɔ kwan bi so wɔ ne dwumadie mu a, wɔbua no fɔ ma wɔtumi ma no ho asotwe. Baabi a atemmuo taa kɔ so pa ara yɛ asɛnnibea, ahɛmfie anaa beaɛɛ biara a wɔtumi di asem.

(120) ii. Akristofoɔ bɛhunu wɔn gyinabea *atemmua* da.

Akristofoɔ wɔ gyɛdie sɛ ɛda bi reba (*atemmua* da) a obiara bɛbu n'adwuma a ɔbɛyɛɛ no wɔ wiase ho akonta akyɛrɛ Onyankopɔn. Sɛ w'akontabuo no sɔ Onyankopɔn ani a, ɔbɛbɔ w'aba so ama woanya daa nkwa de akɔtena paradise, na mmom sɛ w'akontabuo no ansɔ Onyankopɔn ani a, ɔbɛbua wo fɔ de wo akɔto ogya tadeɛ mu.

**(121) Anikyibuo**

*Ani* yɛ onipa akwaa baabi a ɔde hunu adeɛ. *Bu* metafo nkyɛɛaseɛ ne sɛ woka biribi bɔ so. Onipa biara nni ho a ɔbɛtumi de n'ani ahwɛ adeɛ hann a ɔmmɔ n'ani. *Anibɔ* ne sɛ obi rekata n'ani preko pɛ, na wasane abue no amono mu ho ara a n'ani nna ne ho so. *Anikyibuo* nso yɛ ɔkwan a onipa bi fa so de n'ani kasa kyɛrɛ obi a ɔne no anya wɔ abofuo kwan so. *Anikyibuo* ne sɛ worekata w'ani, asane abue de akyɛrɛ adeɛ bi a ɛrekɔ so a w'ani nnye ho. Sɛ obi rebu anikyie a, ɔmuna n'anim, kata n'ani berɛ tiawa bi mu kyɛrɛ nea ɔne no anya no, ansa na wasane abue n'ani no bio. Anikyibuo yɛ boapayɛ. Sɛ obi bɛtumi abu anikyie de aka n'asem akyɛrɛ onipa a ɔne no anya a, gye sɛ ɔbɛn saa nipa no kakra, ansa na watumi ada saa nneyɛɛɛ no adi ama onipa no ahunu. ɛtaa kɔ so wɔ nnipa a wɔn ntam ngo ntam.

**(122) i. Abambuo**

*Abamu* (abam) yɛ onipa kokom. Onipa kokom na n'akoma wɔ. *Bu* nso asekyerɛ ne sɛ adeɛ bi mu twa na ɛsɛɛ. *Abambuo* aniani nkyerɛaseɛ ne sɛ obi akoma twa anaa ɛsɛɛ. Ne metafo nkyerɛaseɛ nso ne sɛ onipa bi resi gyinaɛɛ anaa ɔretu anammɔn, na biribi asi no kwan anaa ɔfoforo ayɛ nneyɛɛɛ anaase waka kasa bi akyerɛ no, ama n'ahɔɔden a anka ɔde redi dwuma no ano abre ase. Sɛ obi abam bu wɔ ne dwumadie ho a, ɛma ne sunsum so te, ma ahokeka a anka ɔde redi dwuma no nso ano brɛ ase, enti ɛtumi ma onipa no gyae dwuma a anka ɔredi no. Onipa a ɔbu nkurofoɔ abam no, ɛyɛ a ɔmanfoɔ ntaa mpe n'asɛm, ɛfiri sɛ wɔhunu no sɛ ɔmpe afoforo nkɔsoɔ.

**(122) ii. Odwadini no sotɔɔ hyeeɛ ara pɛ na ɛde *abambuo* brɛɛ no.**

Nhwɛsoɔ (122ii) asekyerɛ ne sɛ, berɛ a odwadini no hunuu sɛ ne sotɔɔ a ɛyɛ n'agyapadeɛ ahyɛ no, ɛtee ne sunsum ne n'ahɔɔden so. ɛfiri sɛ ɔhwɛ sika puduo a ɔde yɛɛ sotɔɔ no a seesei, egya ahyɛ asɛɛ no a, ama n'anidasoɔ reyɛ asa.

**(123) i. Kwaseabuo**

*Kwasea* yɛ tebea bi a ɛkyerɛ sɛ obi nnim nyansa anaa ɔntumi nnwene yie. *Bu* metafo nkyerɛaseɛ ne sɛ woma obi dane gyimifoɔ. *Kwaseabuo* ne sɛ onipa bi fa kwan bi so sisi ɔfoforo wɔ adeɛ bi mu. Sɛ nnipa bi kɔyɛ adwuma na mfasoɔ ba so ma ɔbaako kyinkyim ɔfoforo nsa wɔ mfasoɔ no kyɛ mu a, yɛka sɛ wabu nea wakyinkyim ne nsa no kwasea.

**(123) ii. *Kwaseabuo* nti Boaten nni apaafɔɔ.**

Nhwɛsoɔ (123ii) asekyerɛ ne sɛ, sɛ Boaten fa nnipa sɛ wɔnyɛ adwuma mma no na ɔntua wɔn ka na nnipa no yɛ adwuma no wie a, ɔnni ne bɔhyɛ so ntua wɔn ka yie, na wasisi wɔn. Ne saa nti nkurofoɔ hunu no sɛ ɔbu nnipa kwasea, ɛno nti na obiara mpe sɛ ɔne no bɛyɛ adwuma no.

**(124) Atopabuo**

*Atopa* ne se biribi woso na edi akoba. *Bu* nso asekyere ne se biribi mu koakoa anaa emu kyekye. Se woto wo pa a na ekyere se wowosowoso wo sisi. *Atopabuo* ne se onipa bi woso ne sisi ma eko soro sane ba fam, anaase eko n'anim sane ba n'akyi bere a oda ho anaase ogyina ho. Atopabuo tumi ko so bere a obi resa na orewosowoso ne sisi anaase sebe, bere a obarima ne obaa bi redi mpa so agoro na obaako rewowosowoso ne sisi.

**4.3.3 Nsemfua a Yenya firi Di mu Asekyere**

Ofa-nkorabata yi nso de nsemfua a menya firii adeye *di* mu nkyereasee ahodoɔ to dwa. Bere a nsemfua no nkyerekyeremu rekɔ so no, mede adeye *di* metafo nkyereasee ahodoɔ nso be to dwa. Nsemfua no ne won nkyereasee na edidi soɔ no:

**(125) i. Adedie**

Se wodi *adee* a na ekyere se *wode* adee ato w'anom amene. Metafo nkyereasee mu no, *adedie* ne se wode obi asi onipa a wawu anan mu ama wafa ne nneema. Esane kyerere se obi aso onipa bi tuo mu anaa wasi n'anan mu ye adwuma a na onipa no ye ma no. Ahennie mu no, se ohene bi ko ne kra akyi anaa wotu ohene bi adee so na wode onipa foforo si n'anan mu a, yeka se onipa foforo no adi adee. Se onipa bi nso fa owufoɔ bi suban anaa ne nneyee te se mmaape, senea okasa ne senea onante a, yeka se wadi n'adee. Senti a yeka se wadi n'adee ne se, ete se nea ode adee a ewo onipa no ato n'anom amene. Se ebia:

**(125) ii. John Mahama na odii Atta Mills adee.**

Nhwesoo (125ii) nkyereasee ne se, bere a Omanpanin Atta Mills koɔ akuraa no, John Mahama na omanfoɔ de no sii n'anan maa no yee Atta Mills nnwuma nyinaa maa no wo Ghana amammuo mu, enti yeka se John Mahama adi Atta Mills adee. Efiri se adee a anka ewo no na John Mahama faee no.

**(126) i. Nkonimdie**

Adeye ko kyerε ntɔkwa. Sε obi reko a ɔhia ahoɔden sononko ansa na watumi atwi afa nea ɔne no anya no so. Asemfua *nim* nso kyerε animuonyam. *Di* metafo asekyerε ne sε obi nsa aka biribi. *Nkonimdie* ne sε obi ako ama ne nsa aka animuonyam. Ene sε obi amia n'ani abɔ mmɔden (ako) aduru ne botaeε ho wɔ dwumadie bi mu. Sε woko duru wo botaeε ho a, yeƙa sε woadi nim (woanya animuonyam). Ansa na wobɛnya nkonimdie wɔ dwumadie bi mu no, gye sε womia w'ani, si nkete, ko nkoden, nya abotare ansa na wo nsa aka, enti ete sε deε woreko ntɔkwa pεpεεpε. Esiane sε biribi mu nkonimdie nna fam nti, eyε a nea ɔtumi di dwumadie bi mu nkonim no yεhunu no sε ɔyε onipa a ɔdi mu. Dwumadie a yetumi nya nkonimdie wɔ mu bi ne akuturukubɔ, bɔɔlobɔ akansie, ammirikatuo akansie, sukuu mu sɔhwεtwεre ne abatoɔ.

**(126) ii. Apraku bɛnya *nkonimdie* wɔ sɔhwε no mu.**

Eyε sukuuni biara botaeε sε ɔbetwa ne sɔhwε. Ansa na osuani betwa ne sɔhwε no, ɔhia ahosiesie mapa, εwɔ sε ɔbɔ mmɔden sua adeε bere ano bere ano, na ɔsane di sukuu mu mmara so. Sε ɔtwa sɔhwε no a, Yεhunu no sε wadi sɔhwε no so. Nhwεsoɔ (126ii) asekyerε ne sε, esiane sε osuani Apraku abɔ ne ho mmɔden asiesie ne ho ama sɔhwε no nti, ɔbetwa sɔhwε no ama waduru ne botaeε ho na wanya nkonim abotire a eyε abɔdin krataa.

**(127) i. Sikadie**

Sε obi di sika a na εkyerε sε wamene sika no ato ne yam. Metafo nkyerεaseε mu no, *sikadie* ne sε obi de sika ayε biribi wɔ kwan bɔne so. Sε onipa bi de n'ankasa, ekuo anaa ɔman sika di dwuma wɔ kwan a εnse so a, yeƙa sε wadi sika no. Sε wode obi, ekuo anaa ɔman sika pудо yε adwuma na adwuma a woyεεε no boɔ annuru sika no dodoɔ na wofa sika no nkaεε a, yeƙa sε woadi sika no. Sε obi nso fa ketεasehyε ne

porɔɛ kwan so wia obi, ekuo anaa ɔman sika a, ɔmanfoɔ frɛ no sikadie. Ɛte sɛ nea wamene sika no ato ne yam.

(127) ii. *Sikadie* nti Ghana ntumi ntu mpɔn.

Nhwɛsoɔ (127ii) asekyerɛ ne sɛ, ɛsiane sɛ nnipa bi a wɔwɔ tumi fa kwan bɔne so de ɔman no sika di dwuma a mfasoɔ biara mma so mma ɔman no nti, ɔman no ntumi nko n'anim. Ɛte sɛ nea wɔamemene sika no atoto wɔn yam no.

### (128) *Atorɔdie*

*Atorɔ* yɛ asem bi a ɛnye nokorɛ. *Di* metafo asekyerɛ wɔ ha nso ne sɛ wode asem to dwa. *Atorɔdie* ne sɛ woka asem a ɛnye nokorɛ. Sɛ asem bi si na wɔmfa nsomaa wo sɛ kɔka na wokɔka kyere nkurɔfoɔ a wɔka sɛ woadi atorɔ. Sɛ wode onipa bi anaa ekuo bi ahuntasem anaa asomasem nso pue abɔntene a wɔka sɛ woadi atorɔ. *Atorɔdie* yɛ adeɛ a ɛtumi de ntawantawa bɛto nnipa ntam. Ɛyɛ adeɛ a ɔmanfoɔ mpɛ na wɔnnye ntom wɔ wɔn asetena mu, ne saa nti obi a ɔdi atorɔ no ɔmanfoɔ hunu no sɛ ɔyɛ ɔmanbɔfoɔ, ɛfiri sɛ ɔbɛtumi de ɔman no asomasem akɔma n'atamfo ama ɔman no anya amane.

### (129) *Dɛmdie*

Asemfua *dɛm* asekyerɛ ne sɛ onipa anaa aboa ho akwaa bi te kyema na asesa afiri ne tebea a na ɛwɔ mu na antumi ansi ne dada mu bio. *Di* nso metafo asekyerɛ ne sɛ biribi bɛka onipa anaa aboa bi honam na ankɔ bio. Ɛte sɛ nea onipa anaa aboa no amene *dɛm* ato ne yam no. Sɛ obi di dɛm a, ne honam akwaa a ɛho ate kyema no ntumi nyɛ adwuma te sɛ nea kane no na ɛyɛ no bio. Ɛne sɛ, dɛmdie no ma honam akwaa no ahooɔden so te koraa. Ɔhaw a ɛtumi de temakyeɛ ba obi akwaa ho ma ɔdi dɛm bi ne anifura, kwata, dammɔ, kɛseyɛ mmorosoo ne nanmuka.

**(130) i. Bemdie**

Asemfua *bem* asekyere ne se nkonim aba ama obi wo asennie mu. *Di* metafo asekyere ne se adee bi beye obi dea. Se wodi *bem* a na ekyere se nkonimdie aba w'afa. *Bemdie* ne se nkonimdie aye obi dea wo asennie mu. Se mpanimfoɔ tena nnipa bi asem so na wɔreka, toto wɔn ano gye wɔn adansedie de toto nseneee ani wie na dee n'asem beye de no na yeka se wadi bem. Bemdie ye tirisiane a ekɔ ma obi wo asennie mu. Nsem a mpanimfoɔ tumi tena so ka ma bemdie ba obi afa ye kwaadu a efa nsem bi te se ntwatosɔɔ, awudie ne korɔnobɔ ho. Ansa na obi bedi bem wo asennie mu no, ewɔ se onipa no nya adanse turodoo a emu dɔ sene nea ɔne no anya asem no. Se obi di bem wo asennie mu a, ɔnya ahotɔ te se dee wadi aduane pɛpɛpɛ. Senti a ede ahotɔ brɛ no ne se, ema amaneɛ te se ekabɔ, afiasenna anaa animguaseɛ pare no.

**(130) ii. Bemdie** a ekɔ maa Asare ama ne ho abae no.

Nhwesɔɔ (130ii) asekyere ne se, bere a Asare dii bem wo asennie mu no, ɔnyaa anigyeɛ ne abotɔyam wo n'abrabɔ mu. Efiri se ama wayi ne ho afiri ɔhaw te se animguaseɛ mu.

**(131) Nkradie**

*Kra* asekyere ne se woka kyere obi se woretu anammɔn afiri ne nkyen akɔ baabi foforo. Enna *di* nso metafo asekyere ne se wode asem to obi anim. *Nkradie* ye nkitaho a nnipa bi di bere a wɔn ntam rebetete. Nkradie gu mu mmienu, nea wo ne onipa no di a mobesane ahyia bio ne nea modi a monsane nhyia bio. Nea mobesane ahyia bio no ye ntetemu a enam asetena mu akwantuo so, enna nea monsane nhyia bio no ye nea enam owuo so na eba.

### (132) Yiedie

Asemfua *yie* asekyere ne se biribi si pi ye kama na edi mu. *Di* nso metafo asekyere ne se obi nya ahotɔ ma ne nipadua. *Yiedie* ne se nneema atotɔ n'akwan mu ama obi nsa aso nea ɔpe nyinaa so. Se obi di yie a ɔnya abrabɔ mu anigyeɛ ne ahotɔ. Enti ete se nea wamene yie ato ne yam no. Abrabɔ mu yiedie nam adwumaden, nsiye ne abotare so na eba.

### (133) Yawdie

Asemfua *yaw* ye atenka a ema obi hunu amane wɔ ne honam mu. Se obi pira wɔ ne honam akwaa baabi a ɔte yaw, saa ara na se awerehosɛm nso to obi a ɔte yaw. Metafo nkyereaseɛ mu no, *di* ne se obi nya atenka wɔ ne nipadua mu. Se wodi yaw a na ekyere se w'ani nnye biribi anaa tebea bi ho. *Yawdie* ye tebea a emma obi ani nnye nneyeeɛ anaa biribi ho. Se obi kɔ saa tebea no mu a, esesa n'anigyeɛ ne ne tebea pa kɔ tebea a n'ani nnye ho mu. Se asem bone bi te se akwanhyia, yareɛ, owuo, ekabɔ anaa animguaseɛ to obi ma no hye ne kra so a ɔtumi di yaw. Se onipa bi kɔ yawdie mu a, ɔnnya ahotɔ ne anigyeɛ wɔ n'asetena mu. Etumi ma onipa no kra were ho ma ebɔ no yareɛ mpo.

### (134) i. Awudie

*Wu* asekyere ne se onipa anaa biribi nkwa ba awieeɛ. Enna *di* nso metafo nkyereaseɛ ne se woye adeɛ bi ma no nya nsunsuanso bone wɔ obi so. *Awudie* ne se obi afa sabuakwan anaa mmara kwan so agye obi kra afiri ne nsam. Se onipa gye ne yonko nipa kra firi ne nsam a eyɛ awudie, saa ara nso na se aboa bi kum onipa a eyɛ awudie. Na mmom, se onipa kum aboa bi a yemfre no awudie, Akanfoɔ fre no okum. Enye mmerɛ nyinaa na awudie kyere se obi kra afiri ne nsa. Etɔ da na se obi ye wo adeɛ te se ɔsee w'agyapadeɛ bi, gye biribi a esom wo bo firi wo nsam anaa ɔde wo kokoamsem bi pue abontene so ma no ye wo ya mmorosɔɔ a, yeka se wadi wo awu.



Senti a wei nso ye awudie ne se, esiane se adee a woahwere no som bo ma wo nti, etumi ka wo kra ma woye mmɔbo te se nea ɔde sekan ato wo mene mu aku wo perepere.

(134) ii. Kurom hɔfoɔ *awudie* nti obiara mpe won asem.

Nhwesoo (134ii) asekyere ne se, esiane se kuro no mu nnipa tumi di dwuma bi ma nkurofoɔ hwere won nkwa anaa nkurofoɔ nya ho nsunsuanso bone nti, obiara mpe se ɔde ne ho bebo won ama ono nso ahunu amane wo won nsam.

(135) i. **Fewdie**

Asemfua *few* kyere atweetwee. Enna *di* nso metafo asekyere ne se woye biribi. *Fewdie* ne se obi nam atweetwee kwan so goro ɔfoforɔ ho. Se obi redi onipa bi ho few a, ɔhye da fa agoro kwan so de sinto anaa mfomsɔɔ a ewo onipa no ho tweetwee no a onipa a ɔredi ne ho few no ntaa nhunu akyire. Fewdie taa ko so wo nnipa a wɔbo tipen ntam. Eto da na fewdie no ano ye den pa ara ma nea obi redi ne ho few no hunu akyire a, etumi kowie ntakwa.

(135) ii. Opoku pe *fewdie* nti onni ayɔnkoo.

Esiane se Opoku tumi fa ekwan bi so de mfomsɔɔ ne sinto a ewo nkurofoɔ ho tweetwee won nti, obiara ntumi ne no mfa ayɔnkoo. Efiri se wosusu se wode won ho bo no na ɔhunu won sinto bi a ɔbegyina so de atweetwee won.

(136) i. **Hwammodie**

*Hwammɔ* ne se obi anidasoo wo adee bi ho aye kwa anaa antumi amma mu. *Di* nso metafo asekyere ne se woye biribi. *Hwammodie* ne se obi nsa si fam wo obi anaa adee bi a na ɔwo gyedie wo mu mu. Se onipa anaa biribi ma obi gyedie ne awerehyemu a ɔwo wo ne mu sa a yefre no *hwammodie*. Etumi ba bere a wosusu se obi anaa adee bi

betumi adi dwumasono ama wo, nanso antumi ankɔwie no saa na ama wo nsa asi fam. Hwammɔdie ba onipa bi abrabɔ mu a, etumi ma n'aba mu bu.

(136) ii. *Hwammɔdie* ye ya pa ara.

Nhwesoo (136ii) asekyere ne se, se wode wo ho to obi anaa adee bi so na ema wo nsa si fam a, etumi ha wo yie pa ara.

(137) i. **Atennie**

*Atem* ne se obi ka asem yaayaa kyere ofoforo. Obi tumi de sinto anaa temakye a ewo ofoforo ho yeyaw no. *Di* metafo asekyere ne se wode asem to dwa. *Atennie* ne se obi se n'ano to onipa bi ho se no yaw. Nea odi asem no keka nsem a eye ya, nea ewom ne nea enni mu kyere onipa no ma no di yaw. Mpre pii no, se atennie beko so wo nnipa bi ntam a na abofuo anaa ntokwa na aba won ntam. Atennie ho nsunsuansoo taa kowie atwedebo anaa ntokwa.

(137) ii. *Atennie* nti obiara mpre abofra no asem.

Nhwesoo (137ii) mu no, esiane se abofra no tumi se n'ano keka nsem yaaya kyere omanfo nti, obiara nni odo ma no. Efiri se woanhwe yie na woben no kotia ne nan so a, obedi wo asem ama ade eye wo.

Se yehwe adeye *di* dwumadie ne ne nkyereasee wo nsemfua *yawdie*, *awudie*, *fɛwdie*, *hwammɔdie* ne *atennie* mu a, ekyerere biribi anaa dwumadie bi a enye.

(138) i. **Asennie**

*Asem* ye nea onipa bue n'ano a oka anaa nea okasa fa ho. Enna *di* nso metafo asekyere ne se woye nhwehwe mu do biribi mu asuko. *Asennie* ne se wohwehwe asem bi mu nokore na wode yie to yie. Se mente me ho ase anaa ntawantawa ba nnipa bi ntam na ekoduru mpanimfo anim a, mpanimfo no si nkonnwa ne nnipa a ntawantawa aba won ntam no di nkitaho fa asem no ho pe asem no pomasiberɛ. Saa anototoo ne

nsiesie yi na yefre no *asennie*. Mpanimfoɔ anaa atemmuafoɔ a wɔn adwene mu do na wɔnim de na wɔhwe ma asennie ko so. Atemmuafoɔ no hwe ma afaanu no nyinaa de wɔn anodisem ne adanseɛ to dwa. Eno akɔyi no mpanimfoɔ no gyina wɔn nsem ne adanseɛ no so kari hwe hunu nea n'asem ye de ne nea n'asem nye de. Wɔwie a, nea n'asem ye de no wɔbua no bem, na wɔabua nea n'asem nye de no nso fo. Asennie bi wɔ ho na atemmuafoɔ no hwe hunu se wɔbua obi bem anaa fo na se ede oyene anaa emfa asomdwoee mma a, wɔtu wɔn nan si asem no so de afotuo ma afaanu no ma wɔkɔtoa wɔn abrabɔ so. Saa asennie wei bi tumi ye awaresem. Baabi a wɔdi asem no yefre ho asennibea.

(138) ii. Nokore nhunta wɔ *asennie* mu.

Nhwesoo (138ii) asekyere ne se, esiane se atemmuafoɔ nya abotare de tie obiara anodisem ne n'adansee wɔ asennie mu nti, sɛdeɛ etee biara asem no mu nokore beda adi.

### (139) Ahennie

*Ohene* ye obi a ɔmanfoɔ afa amammerɛ ne amannee kwan so ayi no se ɔna ekuo, kuro anaa ɔman bi ano. *Di* nso metafo asekyere ne se woye biribi anaa wototo nneema wɔ ekuo anaa kuro mu. *Ahennie* ye tumi ne animuonyamhye a wode pagya odehyee bi ma no dibere ma ɔbeda ɔmanfoɔ ano wɔ kuro anaa ɔman mu toto nneema de pere wɔn yiedie ne mpontuo. Akanfoɔ mfa wɔn ahennie nni agoro koraa, ansa na obi bedi hene no na ɔfiri adehyee abusua mu, na afei nso ɔye obi a ɔwɔ suban pa a ɔmanfoɔ benya ne mu gyedie. Wɔhunu wɔn ahemfo se wɔwɔ tumi sononko a wode di dwuma ahodoɔ de boa ɔmanfoɔ no mpontuo wɔ wɔn asetena mu.

**(140) Asɔfodie**

*Ɔsɔfo* yɛ obi a wɔama no nteteeɛ na ɔwɔ nimdeɛ ne ho kwan sɛ ɔhwɛ asɔre bi so. Enna *di* nso metafo asekyere ne sɛ woyɛ adwuma bi. *Asɔfodie* yɛ ɔkwan a obi fa so hwe asɔre anaa asafo bi so. Eyɛ tumi ne dibere a wɔnam Nyankopɔn asem so de ma obi beda asɔre ano. Kristosom mu na asɔfodie kɔ so. Sɛ obi resua asɔfodie a, mpanimfoɔ fa Nyankopɔn asem so ma no nteteeɛ, hyɛ no den wɔ honhom ne honam mu senea ebeyɛ a ɔbenya nimdeɛ mapa na watumi de ahwe asafo no so. Mpre pii no, akristofoɔ hwɛhwɛ sɛ obi a ne ho te, na ɔne Nyankopɔn ntam go na ɔdi sɔfo, senea ebeyɛ na ɔbetumi ne Awurade adi nkitaho de asɔremma no abisadeɛ ato n’anim ama wayɛ ama wɔn, na afei nso watumi atenetene asɔremma no akyerɛkyere wɔn wɔ Awurade mu.

**(141) i. Gyedie**

Adeyɛ *gye* asekyere ne sɛ obi sɔ biribi a ɛwɔ ɔfoforo ho mu ma ebɛdi ne ho. Enna *di* metafo nkyerɛaseɛ ne sɛ adeɛ bi bayɛ wo dea. *Gyedie* aniani nkyerɛaseɛ ne sɛ obi sɔ adeɛ a ɛwɔ ɔfoforo ho mu ma ebeyɛ ne dea. Ne metafo nkyerɛaseɛ ne sɛ obi de ne ho to onipa anaa adeɛ bi so sɛ ebetumi adi dwuma bi ama no. Sɛ obi nya ahotɔsɔɔ ne awerɛhyɛmu wɔ onipa anaa adeɛ bi mu a, yɛka sɛ ɔwɔ gyedie wɔ saa adeɛ no mu. Gyedie nso ne sɛ obi mfaa n’ani nhunuu biribi nanso ɔwɔ awerɛhyɛmu sɛ ade korɔ no wɔ ho. Senea Hebrifoɔ 11:1-3 de to dwa no, “Na afei *gyedie* ne adeɛ a yen ani da sɔɔ ho ahotɔsɔɔ ne nneɛma a yɛnhunu ho adansegyɛɛ. Na yei mu na tetefoɔ no nyaa adanse pa. *Gyedie* na yɛde te aseɛ sɛ wiase hodoɔ wɔde Nyankopɔn asem na ɛsiesieɛɛ, enti deɛ ani tua firi nneɛma a enna adie mu na ɛbaɛɛ.” Akanfoɔ wɔ gyedie sɛ Onyankopɔn, abosom ne nananom nsamanfoɔ na wɔbɔ wɔn ho ban. Wɔsane gye di sɛ owuo akyi asetena wɔ ho. Obi betumi anya gyedie wɔ adeɛ bi a wahunu pen anaa adeɛ bi a ɔnhunuu da mu. Sɛ ebia:

(141) ii. Akristofoɔ wɔ *gyedie* sɛ Nyankopɔn besane aba ne mmaɛɛ a ɛto so mmieniu.

(141) iii. Akosua wɔ *gyedie* wɔ n'awofoɔ mu sɛ wɔbɛto hyɛn ama no.

Nhwɛsoɔ (141ii) mu no, ɛwɔ mu sɛ obiara mfaa n'ani nhunu Nyankopɔn da deɛ, nanso akristofoɔ nam wɔn som ne wɔn nkyerekkyere so wɔ awerɛhyɛmu sɛ ɔbesane aba ne mmaɛɛ a ɛto so mmieniu abɛbu wiase atɛn. Nhwɛsoɔ (141iii) mu nso no, Akosua de n'ani ahunu n'awofoɔ pɛn, ɛnna ɔwɔ ahotɔsoɔ wɔ wɔn mu sɛ ɛkwan biara so no, wɔbɛto hyɛn ama no. Sɛ obi nya awerɛhyɛmu ne ahotɔsoɔ wɔ obi anaa biribi mu sei a na yɛfrɛ no gyedie.

### (142) Sugyadie

*Sugyadie* ne sɛ ɔbarima anaa ɔbaa bi a waduru ne mpanin mfeɛ so nni hokani. Sɛ obi nwaree da a, yɛka sɛ ɔdi sugya, ɛnna sɛ onipa bi nso ware gyae a, bere a wagyae awareɛ a ɔnya nwareɛ no, yɛka sɛ ɔredi sugya. Sɛ obi nni ɔba nso a, yɛka sɛ ɔdi ba sugya. Wei da adi wɔ Yermia 18:21, ɛsɛ; “Enti yiwi wɔn mma ma ɛkɔm, na yi wɔn to afena ano, na wɔn yerenom nni mmasugya.” Yɛnyaa asɛnka wei bere a Israelfoɔ fomm Awurade a anka Awurade rebɛtwe wɔn aso, nanso Odiyifoɔ Yermia paa Awurade akyɛw maa ɔde firii wɔn. Akyire yi no Israelfoɔ sɔre tiaa Yermia a anka wɔrebɛyɛ no dɔm, ne saa nti Yermia ka kyereɛ Awurade sɛ ɔnkunkum Israel mmarima ne wɔn mma nyinaa na wɔn yerenom nni mmasugya. Nkyerɛmu wei da no adi sɛ, sɛ adeɛ bi ho yɛ na ma obi a, ɛkwan bi so no yɛtumi ka sɛ ɔdi saa adeɛ no ho sugya.

### (143) i. Nsedie

Adeyɛ sɛ asekyere ne sɛ obi de asem to dwa. Nsɛ yɛ nsem a obi ka de kyere sɛ ɔbedi biribi mu nokorɛ. Ɔyɛ gyinaɛɛ a obi si de hyɛ biribi mu kena sɛ ɔbɛma adeɛ bi ayɛ sɛnea ɛtɛɛ anaa agyina ne gyinabea. Sɛ ɔhene anaa ɔpanin resuae a, ɔdi nse ka n'akoma mu nokorɛ de kyere ne manfoɔ sɛ wasɔ tumidie a wɔde ama no no mu, na

ɔbeyere ne ho aye adwuma den ama wɔn, na ɔnnane n'akyi nkyere wɔn da biara da. Se ɔbaa ne ɔbarima nso reware a, wɔdi nse ka kyere wɔn abusuafoɔ ne ɔmanfoɔ nyinaa se wɔbedodɔ wɔn ho asane adi wɔn ho nokore bere biara. Se wɔrebɛdi obi asem wɔ asennibea nso a, wɔma onipa no di nse de kyere se asem a ɔde bɛto dwa no ye nokore turodoo. Obi redi nse a, ɔgyina tumi anaa honhom a ɔgye di so te se Nyankopɔn, abosom anaa nsuo so na ɔde ka ne nsem. Se obi di nse wɔ biribi ho a, ɔmanfoɔ taa nya gyedie wɔ ne mu pa ara, efiri se ɔmanfoɔ hunu se nsedie mu nsem wɔ tumi, a se obi bu so a etumi nya nsunsuanso bɔne wɔ ne so.

(143) ii. *Nsedie* ma yehunu asem bi mu nokore.

Esiane se tumi wɔ nsedie mu nti, se obi ka no wɔ asennie mu a, nnipa dodoo no ara nya awerɛhyemu se nsem a onipa no de bɛto dwa wɔ asennie no mu nyinaa ye nokore turodoo a atorɔ baako mpo mfra mu.

#### 4.3.4 Nsemfua a Yenya firi Hye mu Asekyere

ɔfa-nkorabata yi nso de nsemfua a menya firii adeye *hye* mu nkyereasee ahodoɔ to dwa. Bere a nsemfua no nkyerekyeremu rekɔ so no, mede adeye *hye* metafo nkyereasee ahodoɔ nso bɛto dwa. Nsemfua no ne wɔn nkyereasee na edidi soɔ yi:

(144) i. *Ahyeasee*

Se biribi wɔ *asee* a na ekyere se ewɔ fam anaa adee bi wɔ soro sene no. *Hye* asekyere wɔ ha nso ne se adee bi wɔ baabi. *Ahyeasee* aniani nkyereasee ne se biribi wɔ adee bi ase. Metafo nkyereasee mu no, *ahyeasee* ne se woreye biribi foforo. Se worehye biribi ase a na ekyere se wode firi fam na wode rekɔ soro, afei na woreto ne fapem. Se worehye biribi ase a, ehia ntoboasee ne nhyehyeee pa, senea ebeye na ade korɔ no benya ahooɔden na atumi akye.

(144) ii. Adeɛ biara *ahyɛaseɛ* yɛ den.

Den a adeɛ biara ahyɛaseɛ yɛ no kyere sɛ, ɛsiane sɛ afei na woreto no faɛm nti, ɛyɛ a ɛgyɛ mmere pii. Ɛfiri sɛ ɛhia ntoboaseɛ ne nhyɛhyɛɛ pa, sɛnea ɛbeyɛ na atumi aboa ama dwumadie no adi mu na akɔ awieɛ pa.

**(145) i. Mmarahyɛbadwa**

*Mmara* yɛ nhyɛhyɛɛ a ɛbo ekuo anaa ɔman bi ho ban. Ɛnna *dwa* nso yɛ nnipakuo bi a wɔapaw wɔn de dwumadie sononko bi ahyɛ wɔn nsa. *Hyɛ* metafo asekyere ne sɛ yɛ biribi. *Mmarahyɛbadwa* yɛ nnipakuo a ɔman bi apaw wɔn sɛ wɔnhyia mu na wɔnyɛ mmara mma ɔman no. Wɔyɛ mmara fa ɔman no yiedie ne ne kankɔ ho. Mpre pii no, ɛyɛ a mmara a wɔyɛ no di mu sene nea obiara anaa ekuo biara yɛ no wɔ ɔman no mu. Mmarahyɛbadwa mu nnipa bi wɔ ho a wɔto aba na ɛyiyi wɔn, ɛnna ebinom nso wɔ ho a ɔmanfoɔ no fa kwan foforo so na ɛyiyi wɔn. Ɛsiane sɛ mmarahyɛbadwa no di dwumasono nti, nnipa a wɔka ho no taa yɛ animdefoɔ ne abenfoɔ. Obi a ɔka mmarahyɛbadwa ho no yɛfre no mmarahyɛbadwani, ɛnna beaɛ anaa faako a wɔhyia di wɔn dwuma nso yɛfre ho mmarahyɛbadwam.

(145) ii. Onimuonyamfoɔ Kyei Mensa ka Ghana *mmarahyɛbadwa* no ho.

Nhwɛsoɔ (145ii) asekyere ne sɛ Onimuonyamfoɔ Kyei Mensa ka mpanimfoɔ a wɔapaw wɔn sɛ wɔnsi ɔmanfoɔ anan mu na wɔnyɛ mmara mma wɔn wɔ ɔman no mu ho.

**(146) i. Awerɛhyɛmu**

Asemfua *wɛrɛ* yɛ akoma. Ɛnna *hyɛ* nso asekyere ne sɛ adeɛ bi wɔ baabi. *Awerɛhyɛmu* aniani nkyereaseɛ ne sɛ wode w'akoma awura adeɛ bi mu. Ne metafo nkyereaseɛ yɛ ahotɔsoɔ anaa ahodasoɔ a wowɔ no obi anaa adeɛ bi mu. Sɛ obi nya awerɛhyɛmu wɔ onipa anaa adeɛ bi mu a, na ɛkyere sɛ ɔwɔ gyedie wɔ mu sɛ ɔbenya mfasoɔ bi afiri

mu. Mpre pii no, ansa na wobɛnya awerɛhyɛmu wɔ obi anaa adeɛ bi mu no, na ade korɔ no adi kan ada nneyɛɛ anaa nsɛnkyerɛnne bi adi akyerɛ wo ama woanya gyɛdie wɔ mu. Nnɛɛma a ɔmanfoɔ tumi nya awerɛhyɛmu wɔ mu bi ne Nyankopɔn, abosom, nnipa ne agyapadɛɛ.

(146) ii. Kwaku wɔ *awerɛhyɛmu* sɛ afe yi deɛ ne kookoo no bɛso pa ara.

Nhwɛsoɔ (146ii) kyerɛ sɛ, sɛ Kwaku hwɛ nsɛnkyerɛnne a ɛda adi wɔ ne kookoofuo no mu a, ama wanya ahotɔsoɔ ne gyɛdie wɔ mu sɛ ɛbetumi aso bebree ama wanya ho mfasoɔ.

**(147) i. Animuonyamhyɛ**

*Anim* yɛ onipa akwaa baabi a ɛfiri ne moma so kɔpɛm n'abɔdwe, ɛho na n'ani, ne hwene ne n'ano wɔ. Adeyɛ *nyam* nso ne sɛ biribi woso anaa ɛhyerɛn. Sɛ obi anim yɛ nyam a na ɛkyerɛ sɛ n'anim woso anaa ɛhyerɛn. *Hye* metafo asekyerɛ ne sɛ wɔde ade pa wura obi. *Animuonyamhyɛ* aniani nkyerɛaseɛ ne sɛ wɔde ade pa awura obi anim. Metafo nkyerɛaseɛ mu no, *animuonyamhyɛ* yɛ mpagya a wɔde ma obi a wako nkoden wɔ dwumadie bi mu de bɔ n'aba so. Dwuma a obi tumi di ma wɔbɔ n'aba so bi ne sɛ obi adi ɔman anim akɔ ɔsa anaa waboa adi dwumasono de agye ade pa bi abrɛ ɔman no. Nnɛɛma a wɔde hyɛ obi animuonyam tumi yɛ sika, kɔnmuadɛɛ, ɛhyɛn, abodin krataa, sɛ wɔreto obi dibɛrɛ mu, ne ade.

(147) ii. *Animuonyamhyɛ* a wɔde maa Boakye nti ne kɔn da ho.

Mpre pii no, sɛ wɔhyɛ obi animuonyam a, ɛma ne tiri mu yɛ no de ma ɔde hoahoa ne ho. Nhwɛsoɔ (147ii) kyerɛ sɛ wɔhyɛɛ Boakye animuonyam wicɛɛ no, ama ne tiri mu ayɛ no de a ɔde hoahoa ne ho daa.



**(148) i. Nkɔmhyɛ**

Agyekum (2011) kyere adeye *kɔm* mu se, “Eye tebea a obi ko mu wo sunsum mu nya tumi de woso woso ne ho sane ye nsenkyeranne ahodoɔ. Se obi rekɔm a, ɔbosom a ɔresɔre no no behyen ne mu ma ɔko tebea foforo (honhom) mu. Wei ma ɔkɔmfɔɔ (nea ɔkɔm) no firi nnipa tebea mu ko sunsum tebea mu, enti ɔtumi ye nneɛma bi a anka n’ani da ho se onipa a, ɔrenye. Ebi ne se ɔkɔmfɔɔ tumi bo kosua mono gu ne ho anaase onom. ɔtumi nso te akoko tiri firi so we no mono, ɔtumi de ne ho hwehwe fam. ɔtumi nso foro apata, ɔtumi tete ntasuo de ye ne ho, ne ade wo badwam.” Baabi a ɔkɔmfɔɔ kɔm no yefre ho asoreee so. *Hye* metafo nkyereseɛ ne se obi ka nea ebasi daakye. *Nkɔmhyɛ* ne se obi nam honhom kwan so ka nea ebeto obi anaa ebasi daakye. Nkɔmhyɛ taa fa honhom so na eba. Ene se, onipa a ɔhunu honhom mu nsem tumi bo mpae kyere ne tumi te se Nyankopɔn anaa abosom ma woma no yikyerɛ fa nea ebasi anaa nea ebeto obi daakye ho. Se honhom mu nipa bi hye nkɔm a ema nkɔsoɔ (nkɔm pa) fa obi ho na onii korɔ no de akoma pa gye de ne gyedie taa akyire a, etumi ba mu ma no. Nkɔmhyɛ a emma nkɔsoɔ (nkɔm bone) deɛ, se eba fa obi ho a wɔtumi bo ho mpae de si ano kwan. Enye bere biara na nkɔmhyɛ nam honhom mu ba, eto da a obi a ɔwo anisoadehunu nso tumi fa aniwoso so ka asem bi ma no ba mu. Saa nkɔmhyɛ wei ye nea onipa bi tumi hwe obi suban ne ne nneyee ho ka nea ebetumi ato no daakye ma no tumi ba mu. Yefre onipa a ɔhye nkɔm *nkɔmhyɛni* anaa *odiyifoɔ*.

**(148) ii. Odiyifoɔ Opoku *nkɔmhyɛ* ano ye hye.**

Nhwesoɔ (148ii) kyere se, adeɛ biara a Odiyifoɔ Opoku beka se ebasi anaa ebeto obi no eba mu, emfa ho se eye honhom mu anaa aniwoso deɛ.

**(149) i. Nkuranhye**

*Nkuran* yε adwene mu mmoa a wode ma obi ma otumi di dwuma bi. *Hyε* nso asekyere ne se woyε biribi. Metafo nkyereaseε mu no, *nkuranhyε* ne se woretāa obi akyi ama no atumi adi dwuma bi. Se wotenetene obi ma no akwankyerε pa, boa no (se sika fa mu), ka kasa de kyere no wo dwuma a oredi mu a, yεka se worehye no nkuran. Se awereho to onipa bi te se ohwere ne dofo bi anaa ohwere n'agyapadeε bi nso a, yetumi hye no nkuran ma n'akoma to ne yam ma no sane tumi nya anidaso bio wo n'abrabo mu. Ekwan wei so no, yεka ko onipa a oredi yaw no nkyen kyekyere ne were, tu no fo, boa no wo akwannuasa so, sedefε ebeyε a ne were befiri ne yaw na watumi atoa n'abrabo so bio.

(149) ii. *Nkuranhye* a n'awofo de maa no na εmaa no tumi ko sukoo.

Se obi reye adeε na onya nnipa ma wohye no nkuran a, εboa no ma otumi ye ade koro yie. Nhweso (149ii) asekyere ne se, εnam akwankyerε, atenetene, afotuo ne mmoa a onipa no awofo de maa no na εboaa no maa otumi ko sukoo.

**(150) Kεtεasehye**

*Kεtεasehye* aniani nkyereaseε ne se obi kowura kete ase. Se obi wura kete ase a na ode ne ho asuma, enti adeε a ebeyε no wo ho no obiara nhunu. *Kεtεasehye* metafo nkyereaseε ne se obi gye adanmudeε. Eye kokoa mu adekye a efura onipa ani a εmma no nye ade pa a εse fata se oye. Se onipa a owo tumi anaa dibere gye akyedeε firi obi ho na akyedeε no nya nsunsuanso wo dwuma a onipa no di ma onii koro no so a, eye kεtεasehye. Se obi fa kεtεasehye kwan so kye onipa bi a owo dibere adeε a, mpre pii no, onipa no ntumi mma nokore nna adi wo one nea okyee no adeε no dwumadie mu. Etumi ba se onipa no fura nokore so ntama di dwuma bi ma nea okyee no adeε no nya ho mfaso a εmfa mmara kwan so. Ekwan bi so no, ete se nea onii koro ato opanin no adwene, enti akwannya a ense mfata onii no koraa a na onipa no de rema no.

**(151) i. Nhyesoo**

Adeye hye asekyere ne se obi de tumi anaa ahunahuna ma ofoforo ye biribi a enye ne pe. *Nhyesoo* ne se wofa kwan bi so ma onipa bi ye adee a emfiri ne pe mu, n'ahooden ntumi anaase onyee krado se obeye. Se wohye obi ma no ye adee a, onipa no taa ye no wo amemenemfe ne abofuo so. Nhyesoo bi tumi ma onipa bi ye ade pa, enna ebi nso ma onipa bi ye ade bone. Nhyesoo a ema onipa bi ye ade pa ye nea obi ma onipa no tu anammɔn di dwuma bi a osusu se ebeboa onipa no ankasa abrabɔ, nanso eye a onipa no nhunu se anammɔn a wrehye no ama watu no beboa n'abrabɔ. Enna nhyesoo a ema onipa bi ye ade bone ye nea obi ma onipa no tu anammɔn di dwuma bi a emmoa onipa no abrabɔ. Saa nhyesoo wei taa de nsunsuanso bone bre onipa a wahye no no.

(151) ii. *Nhyesoo* wo sukuuko mu dodo.

(151) iii. *Nhyesoo* nti na aberantee no de ne ho akobo akoromfo.

Nhyesoo a ewo nhwesoo (151ii) mu ye nea ema onipa tu anammɔn pa no bi. Se yehwe sukuuko a, akyerekyerefoo ne sukuu mpanimfoo taa ma asuafoo di dwuma bi te se aprapra, adodo adodo, adesua, nna ntem ne mmara so di, a mpre pii no eye a na emfiri asuafoo no pe mu, enti wohunu no se eye nhyesoo. Nanso ebewie akwire no na anammɔn a mpanimfoo maa asuafoo no tui de yiedie ne nkosoo abre won, enti wei ye nhyeso pa. Enna nhyesoo nso a ewo nhwesoo (151iii) mu ye nea ema onipa tu anammɔn bone no bi. Se yehwe a, yehunu se nneema a na obi ma aberantee no ye a n'ani nnye ho nti na emaa no de amemenemfe de ne ho kobo nnipa bonefoo a woye akoromfo.

**(152) i. Abahyebone**

*Oba* ye abofra a obi awo no. *Bone* nso ye nneema ne nneyee a enye na etia mmara anaa ensɔ Onyankopon ne nnipa ani. *Abahyebone* aniani nkyereasee ne se obi de nneema anaa nneyee a enye wura abofra a wawo no. Metafo nkyereasee mu no, eye

ntetee a enye a wode ma abofra ma abofra no ani firi ade pa ye so. Se obi hye ne ba bone a, abofra no tiri mu beye no de mpo wo bere a oreye adee a enye ho. Efiri se, onim se oye adee a enye mpo a, n'awofoo beba abegyina n'akyi ako ama no wo bere a asem ato no. Wei tumi ma abofra no abraboo see bere a wanyini, esiane se oye adee a enye mpo a, ofiri se eye ade pa.

(152) ii. *Abahyebone* nti Ankoma antumi ansua adwuma.

Onipa a wohye no bone no, eye a ontumi nni mmara so na kampese wakohye obi ase aye adwuma. Nhwesoo (152ii) asekyere ne se, esiane se mmarasodi wo adwumasua mu, na Ankoma awofoo nso ahye no bone nti na amma no antumi ansua adwuma no. Efiri se, ote ne ho ne obi kosua adwuma a obesom n'adwuma mu mpanimfoo asane aye nnwuma pii, nanso esiane se wohye no takyoo nti ontumi nye saa.

(153) i. *Hyebere*

*Bere* ye nna anaa mfee a ewo ho ma obi anaa adee bi. Enna *hye* nso metafo asekyere ne se wosusu se wobeye biribi wo bere bi a ebaba mu. *Hyebere* aniani nkyereasee ye nna anaa bere a wode ato ho ama biribi. Ne metafo nkyereasee ye bobera a obi de firi ne bofoo nkyen baa wiase se ode rebobo ne bra. Onipa biara wo ne hyebere. Se obi bedi yie anaa onni yie wo asase yi so gyina ne hyebere so. Akanfoo gye di se obi adwuma a obeye, n'awaree, mfee dodo a obedi ne adee biara a obeye no wo asase yi so gyina ne hyebere so, a odasani anaa adee biara ntumi nsesa no, gye se Nyame nko ara.

(153) ii. *Hyebere* sesafoo ne Awurade.

Nkasae wei kyere se onipa anaa adee biara nni ho a ebetumi asesa obi bobera a ode firi ne bofoo nkyen baa wiase, se eye papa oo, se eye bone oo, eno ara na ebeye n'abraboo nnyinasoo a ontumi nkwati no da, gye se Awurade na ebetumi asesa no.

**(154) i. Bɔhyɛ**

*Bɔ* metafo asekyere ne se wode asem bi to dwa. Enna *hyɛ* nso metafo asekyere ne se wosusu se wobeyɛ biribi wɔ bere bi a ebɛba. *Bɔhyɛ* ye adeɛ a obi ka se ɔbeyɛ ama ne ho, ɔfoforo, ekuo anaa ɔman bi wɔ bere bi a ebɛba. Se obi rehwehwe adeɛ afiri onipa bi ho a, ɔtumi hyɛ onipa no bɔ se ɔboa no ma ne nsa ka adeɛ a ɔrehwehwe a, ɔno nso beyɛ biribi ama saa nipa no. Se obi pɛ se wɔto aba ma no na ɔnya mpaninnie bi a, ɔtumi hyɛ bɔ fa ɔmanfoɔ no ahiadeɛ ho se wɔto aba ma no a, ɔno nso beyɛ wɔn ahiadeɛ ama wɔn. Se nsem a ewɔ obi bɔhyɛ mu to ɔmanfoɔ asom yie a, wɔtumi gye ne bɔhyɛ no to mu ye n'abisadeɛ ma no. Enye bere a obi rehwehwe adeɛ afiri onipa bi ho nko ara na ɔtumi hyɛ no bɔ. Eto da na obi wɔ ɔpe pa se ɔboa onipa bi wɔ kwan bi so a, ɔtumi hyɛ onipa no bɔ se ɔbeboa no. Se obi beɔdi hene wɔ kuro bi so a, ɔtumi hyɛ bɔ fa ɔmanfoɔ haw ne wɔn ahiadeɛ ho se ɔbeyɛ ama wɔn. Onipa a ɔdi ne bɔhyɛ so no, eyɛ a ɔmanfoɔ taa nya ne mu gyedie sene nea ɔnni ne bɔhyɛ so.

(154) ii. Onimuonyamfoɔ Ansere di ne *bɔhyɛ* so nti ɔmanfoɔ to aba ma no daa.

Nhwɛsoɔ (154ii) asekyere ne se, esiane se Onimuonyamfoɔ Ansere ye nneɛma a ɔka kyere ne manfoɔ se ɔbeyɛ ama wɔn nti, wɔanya ne mu gyedie ama daa se wɔko abatoɔ so a, wɔto ma no ma ɔnya mpaninnie.

**(155) i. Nhyehyɛɛɛ**

*Nhyehyɛɛɛ* ye ɔkwan a wɔfa so ye adeɛ bi. Etumi nso ye susudua anaa hyehyɛpono a onipa, ekuo anaa ɔman bi fa so ye wɔn nneɛma. Wɔn a wɔdi wɔn nhyehyɛɛɛ so ye wɔn nneɛma senea wɔatoto no pɛpɛpɛ. Se obi wɔ ekuo anaa ɔman bi mu na wanni ne nhyehyɛɛɛ so a, ɔtumi to ekuo anaa ɔman no mmara ma ɔnya ho asotwe.

(155) ii. *Ɔye asɔre no nhyehyee se asɔreba tua toɔ bosome biara.*

Nhwɛsoɔ (155ii) asekyere ne se, *Ɔye mmara ma asɔreba biara se ɔtua toɔ bosome biara. Ɔsiane se toɔtua ye susudua a wɔgyina so de gye obi to mu se ɔye ekuoba nti, se obi antua a wato kuo no mmara a enam so betumi ama no anya ho asotwe.*

#### 4.4 Adeye Bɔ, Bu ne Hyɛ Anantebɔ (Collocants)

Saa ɔfa-nkorabata yi kyere nsemfua bi a etaa ne adeye *bɔ, bu* ne *hyɛ* nante bom ma yen nkyerɛaseɛ ahodoɔ. Senca adi kan atɔ dwa wɔ dwumadie yi mu se adeye yi mu biara wɔ ne nkyerɛaseɛ ankasa no, emu biara nso tumi ne nsemfua bi nante bom (collocation) ma yen nkyerɛaseɛ ahodoɔ wɔ metafo kwan so.

##### 4.4.1 Bɔ Anantebɔ (Bɔ Collocants)

Ɔfa-nkorabata yi kyere nsemfua bi a etaa ne adeye *bɔ* nante bom ma yen metafo nkyerɛaseɛ ahodoɔ. Enonom na edidi soɔ yi:

(156) *Bɔ* kuro

Se biribi *bɔ* a na ekyerɛ se emu apae, adwa anaase aseɛ. Kuro *bɔ* a na ekyerɛ se emu nnipa nyinaa asa. Wei tumi ba bere a yare bone bi ate asi kuro bi mu akunkum mu nnipa nyinaa. Afei, se ɔko si kuro bi mu na emu nnipa nyinaa ko toɔ a, yeka se kuro no abɔ. Bio, se asenkeseɛ si kuro bi mu na emu nnipa nyinaa dwanedwane a, yetumi ka se kuro no abɔ.

(157) i. *Bɔ* abusua

Yeka se wo-*bɔ* abusua a na ekyerɛ se wo suban anaa wo dwumadie bi see abusua. Metafo nkyerɛaseɛ mu no, yeka se nnipa bi *bɔ* abusua a na ekyerɛ se wɔye mogya korɔ, wɔto ana kɔsi ena baako so anaase wɔfiri abusua baako mu. Se ebia:

(157) ii. Mansa ne Sekyerɛ *bɔ* abusua.

Nhwesoo (157ii) metafo nkyereasee ne se Mansa ne Sekyere firi abusua koroo mu. Esiane se wofiri abusua koroo mu nti nneema bi wo ho a wobetumi aye, enna nneema bi nso wo ho a wontumi nye. Nea wobetumi aye bi ne se obaako betumi adi ofoforo adee, enna nea wontumi nye no bi nso ne se wontumi nware won ho. Esiane se woye mogya koroo nti se woware won ho a woye mogyafra, a Akanfo amammera tia.

(158) i. *Bɔkosua tafere*

Wo-*bɔkosua tafere* a na ekyerere se wopae kosua mu de nea ewo mfimfini no ka wo tekrema so mene. Metafo nkyereasee mu no, yeka se nnipa binom *bɔkosua tafere* a na ekyerere se wododo won ho a woye biribiara bo mu. Se ebia:

(158) ii. *Seewaa ne Afriyie bɔkosua tafere.*

Metafo dwumadie mu no, nhwesoo (158ii) asekyere ne se Seewaa ne Afriyie dodo won ho a mframa mfa won ntam koraa. Ekyerere se wodwene bom, woka asomasem bom, di nkitaho bom, tutu won anammɔn nyinaa nso bom.

(159) *Bɔafipam*

Se obi ne ofoforo *bɔafipam* a na ekyerere se won afie bembɛn ho wo borono koroo so. Nnipa a wobɔ afipam no, etumi ba se obaako kasa wo ne fie mpo a ofoforo no tumi te ne nka wo ne fie, efiri se won afie bembɛn ho wo borono koroo so.

(160) i. *Bɔhyee*

Se nnipa bi *bɔhyee* a na ekyerere se won nsase bembɛn ho pee. Ne saa nti se obaako rekoo ofoforo asase so a enkye koraa na waduru. Se ebia:

(160) ii. *Ghana ne Togo bɔhyee.*

Nhwesoo (160ii) asekyere ne se oman Ghana ne Togo nsase bembɛn ho a se obi firi oman yi baako so rekoo ofoforo so a enkye koraa na waduru. Aman a wobɔ hyee taa di dwuma bi bom. Dwuma a wotumi di bom bi ye dwadie, agodie ne adesua.

(161) i. *A-bɔ* no

Biribi *bɔ* wo a na ekyerɛ sɛ ahwe wo so anaa aka wo honam. Sɛ adeɛ a ɛmu yɛ duru hwe wo so a ɛbetumi apira wo. Metafɔ nkyerɛaseɛ mu no, sɛ biribi *bɔ* wo a na ekyerɛ sɛ wonni ade korɔ, ahwere wo anaase apare wo. Sɛ ebia:

(161) ii. Nimdeɛ a-*bɔ* Yaw.

Nhwɛsoɔ (161ii) kyerɛ sɛ Yaw nni nimdeɛ, nimdeɛ apare no anaase ahwere no. Obi a ɔnni nimdeɛ yɛ onipa a ne nyansa nkɔ nkan na ɔntumi nnwene yie mfa ade pa biara ho.

(162) i. *Bɔ* boɔ

Nkasaeɛ wei asekyerɛ ne sɛ to boɔ mma no nhwe obi honam. Ne metafɔ nkyerɛaseɛ ne sɛ ka sika a wobɛtɔn adeɛ bi agye. Wɔtaa *bɔ* boɔ wɔ dwa so berɛ a wɔretɔn adeɛ. Adeɛ bi boɔ tumi ma yɛhunu sɛnea adeɛ no som bo fa. Sɛ ebia:

(162) ii. Adwoa *bɔ-ɔ* apɔnkye no boɔ.

Nhwɛsoɔ (162ii) metafɔ asekyerɛ ne sɛ Adwoa kaa sika a ɔbetɔn apɔnkye no agye.

(163) *Bɔ* tire nko

Wo-*bɔ* tire nko a na ekyerɛ sɛ wowoso wo ti de gye asem bi tom. Ɛyɛ kwan a obi tumi fa so de pene asem bi so. Sɛ obi mpe sɛ ɔde n'ano bekasa a na ɔbɔ ne tiri nko de gye biribi tom. Sɛ biribi te sɛ aduane hyɛ obi anom na ɔntumi nkasa a ɔtumi bɔ ne ti nko. Ɛtɔ da nso na obi nte apɔ na ne saa nti ɔntumi mfa n'ano nkasa a, onii no tumi bɔ ne tiri nko de pene asɛnka anaase biribi so.

(164) *Bɔ* dwɛɛ

*Dwɛɛ* ne sɛ obi kyerekyerɛ ne ho gu aforɔɔ so. *Bɔ* metafɔ asekyerɛ ne sɛ woyɛ biribi. Sɛ obi nya ne ho na ɔmmɛ ne ho ase mfa anidie mma ne mfefoɔ ne mpanimfoɔ na sɛ



daa otete ne ho gu won so a, yeka se onipa no rebɔ dwɛɛ. Onipa a otaa bɔ dwɛɛ ye obi a wanya akyɛdɛɛ sononko te se ahoɔfɛ, sika anaa ahonyadɛɛ sene nnipa bi na ne saa nti daa ɔde saa adɛɛ no hoahoa ne ho gu afoforɔ so.

(165) i. *Bɔ nwoma*

Se obi nim adɛɛ mmorosɔɔ a na yeka se ɔ-*bɔ nwoma*. Mpre pii no, obi a yeka se ɔbɔ nwoma ye onipa a n'adenim nni sesɔɔ wɔ ne mfeɔɔ mu. Se ebia:

(165) ii. *Kyerewaa bɔ nwoma kyɛn Kusi.*

Nhwɛsɔɔ (165ii) asekyɛɛ ne se *Kyerewaa nim nwoma sene Kusi.*

(166) *Bɔ nkwan*

Yeka se obi *bɔ nkwan* a na ekyerɛ se onipa no nim nkwan ye na ne nkwan nso ye de pa ara. Se ne nkwan sɔ fam a na apae!

(167) i. *Bɔ ban*

Wo-*bɔ ban* a na ekyerɛ se wohwe adɛɛ bi so yie. Se obi bɔ adɛɛ bi ho ban a, ɔgye bere hwe se biribi bɔne biara nka adɛɛ no mma no nsee. Yetaa bɔ adɛɛ bi ho ban firi akorɔmfɔɔ, atamfo ne nnipa bɔnefoɔ ho. Adɛɛ a ye bɔ ho ban nso taa ye nea esom yen bo na eho hia yen wɔ yen asetena mu. Se ebia:

(167) ii. *Papa no re-bɔ ne yere ho ban.*

Nhwɛsɔɔ (167ii) asekyɛɛ ne se, esiane se papa no yere som bo ma no nti, ɔrehwe ne so yie senca ebeye na ade bɔne biara nto ne yere no anaase ɔbarima foforo mmɛgye no mfiri ne nsam.

(168) i. *Bɔ hwii*

Nkasaaɛ ‘bɔ hwii’ asekyerɛ ne sɛ nante anaasɛ tu anammɔn bi ntentɛm so. Sɛ wopɛ sɛ wotu anammɔn kɔ baabi ntɛm so a, wotumi bɔ hwii kɔ hɔ. Mprɛ pii no, sɛ wobɔ hwii kɔ baabi a eyɛ a wontaa nkyɛ wɔ hɔ na woasane aba w’akyi. Sɛ ebia:

(168) ii. Okuani no *bɔɔ hwii* kɔɔ n’afuo mu.

Nhwɛsoɔ (168ii) asekyerɛ ne sɛ okuani no de ahɔɔhare kɔɔ n’afuo mu kɔdii dwuma bi anaasɛ ɔkɔhwɛɛ nea ɛreko so wɔ hɔ.

(169) *Bɔ wa*

Sɛ obi *bɔ wa* a na ɛkyerɛ sɛ ɔpu mframa firi n’ahrawa mu ntentɛm so ba n’anom a dede nso di akyire berɛ korɔ no ara mu.

(170) *Bɔ abubuo*

*Bɔ* asekyerɛ ne sɛ wode asem bi to dwa. *Abubuo* nso ne sɛ obi a ɔwɔ sika yɛ ne ho te sɛ nea ahia no. Obi a ɔbɔ abubuo no berɛ biara ɔkeka ne nsem yɛ ne ho te sɛ nea ɔnni sika. Onipa a ɔbɔ abubuo da saa suban yi adi sɛnea ɛbeyɛ na afoforo nhunu sɛ ɔwɔ bi mma wɔnsrɛsɛ no sika anaa biribi.

(171) *Bɔ nkaɛɛ*

Asemfua *nkaɛɛ* firi adeyɛ *kaɛ* mu. *Kaɛ* asekyerɛ ne sɛ obi anaa biribi twe ɔfoforo adwene si adeɛ bi so bio. Wobɔ nkaɛɛ a na ɛkyerɛ sɛ wotwe obi adwene si asem anaa biribi a asi dada so bio. Ɛto da nso na asem bi si ɔman mu na wɔpɛ sɛ wɔyi ɔmanfoɔ asotire fa ho a, wobɔ wɔn nkaɛɛ ma wɔnya asem no nteeɛ.

(172) *Bɔ yareɛ ma wo ho*

Obi bɔ yareɛ ma ne ho a na ɛkyerɛ sɛ ɔnyare nanso daa ɔpatu yare. Onipa a ɔbɔ yareɛ ma ne ho yɛ ɔkwadwofoɔ a sɛ ɛduru adwuma berɛ a na ne yareɛ ba, nanso sɛ adwuma no twam a na wate apɔ amono mu hɔ ara.

(173) *Bɔ anson*

Anson-*bɔ* ne se wode afotu bone ma obi ma onipa no ye adee a enye. Se wohye onipa bi kutupa anaa wotutu nsem gu n'asom ma nye ade bone a, yeka se woabo no anson. Omanfo ntaa mpe onipa a abo anson asem koraa, efiri se wahunu no se ompe asomdwoee anaa nkoso.

(174) i. *Bɔ paa*

*Paa* ye adwuma a onipa bi ye ma oforo ma onipa no tumi nya mfasodee bi te se sika firi mu. Wo-*bɔ* paa a na ekyere se woma obi ye adwuma bi ma wo na wotua no ka. Se obi nni bere anaa ahoden a ode beye n'adwuma a, otumi de adwuma no bo paa. Se ebia;

(174) ii. *Owura no bɔ paa daa.*

Nhweso (174ii) asekyere ne se, esiane se owura no nni ahoden anaa bere a ode beye ne nnwuma nti, bere biara ama nkurofo ye ne nnwuma ma no na wotua won ka. Nnwuma a obi betumi de abo paa bi ne ado, kookoobo, aburoodua, nneemasoa ne nneemasie.

(175) *Bɔ hyire*

Se wowo abofra foforo na abofra no maame anaa obi a orehwe abofra no de hyire (dotee fitaa bi) keka abofra no honam ani senea ebema abofra no aye kese a, yeka se wa-*bɔ* abofra no hyire. Metafo nkyereasee mu no, se obi *bɔ* hyire a na ekyere se wadi nkonim wo asem anaa dwumadie bi mu ama omanfo rebo gye no so. Esiane se nkonimdie aba onipa no afa nti, eye a nkonimdifo no anaa n'akyitaaforo tutu pawda gu ne so wo anigye kwan so, wei na yefre no *hyirebo*. Dwuma a obi tumi di mu nkonim ma wabo no hyire bi ne booboo, abato, shwetwere, koto asennie, ne ade.

(176) i. *Bɔ no to ho*

Wo-*bɔ* obi to ho a na ekyerɛ sɛ onipa no ayɛ wo adeɛ a w'ani nnye ho nti woafa no tirimka. Ne saa nti ɛda a onipa no bɛfom wo a wobɛsɔ ne dua mu no, womfa ne ho nkyɛ no koraa. Sɛ ebia:

(176) ii. *Papa no a-bɔ ne yere ato ho.*

Nhwɛsɔ (176ii) asekyerɛ ne sɛ papa no yere ayɛ no adeɛ a n'ani nnye ho, enti wafa ne yere no tirimka a ɛda a ɔbɛsɔ ne dua mu no, ɔbetua no so ka.

(177) *Bɔ wo hwene*

Sɛ wokasa hyɛ wo hwene mu a na yɛka sɛ wobɔ wo hwene. ɛne sɛ obi rekasa na ɔmmue n'ano yie mma ɔmanfoɔ nte nea ɔreka. Onipa a ɔbɔ ne hwene no ɔmanfoɔ taa hunu no sɛ ɔmmu nnipa nti ɛyɛ a wɔmpɛ n'asɛm.

(178) *Bɔ mmɔkwaa*

Wo-*bɔ* mmɔkwaa a na ekyerɛ sɛ wosrɛsrɛ nkurɔfoɔ nneɛma de yɛ wo ho. Obi a ɔbɔ mmɔkwaa yɛ onipa a ɔtaa sɛsrɛ nkurɔfoɔ nneɛma te sɛ mpaboa, atadeɛ, wɔɔkyɛ, abɔsɔ, ne ade siesie ne ho. Saa onipa yi yɛ obi a ɔntaa mfa ne sika ntoto nneɛma a ɔhia a ɔde besiesie ne ho, na ne saa nti daa ɔsrɛsrɛ nkurɔfoɔ nneɛma de yɛ ne ho. ɔmanfoɔ ntaa mpɛ obi a ɔbɔ mmɔkwaa asɛm, enti ɛyɛ a wɔtaa bu no animtia.

(179) *Bɔ sese*

*Sese* yɛ mpatadan anaa ɛdan kumaa bi a wɔsi no wɔ nwuram anaa akuraa ase. *Bɔ* nso metafo asekyerɛ ne sɛ wodi dwuma bi. Wo-*bɔ* sese a na ekyerɛ sɛ woasi mpatadan bi wɔ nwuram. Sɛ obi kɔpue kwaeɛ mu na ɔrɛpɛ baabi de ne ti ato anaa de ne nneɛma agu a, ɔtumi si dan kumaa bi na watena mu. Saa dan wei na yɛfrɛ no sese. ɛsiane sɛ sese sua nti, ɛyɛ a nnipa ne nneɛma kakra bi na ɛtumi kɔ mu. Wɔn a wɔtaa bɔ sese yɛ abɔfoɔ, akuafɔɔ ne abɛtwafoɔ.

(180) Bankye no a-*bɔ*

Bankye ye aduane a wɔtu firi fam noa di. *Bɔ* metafo asekyere ne se biribi nyini na eye kese a se wodi a ebeye yie. Se bankye *bɔ* a na ekwere se anyini aye kese aduru mpɛmpɛnsɔɔ a wɔtu de ye aduane di a eye yie. Se okuani dua bankye a, etumi di beye abosome nsia de rekɔ ansa na abɔ ama wɔatumi de aye aduane adi ama no aye yie.

(181) i. *Bɔ* adeɛ

*Bɔ* metafo asekyere ne se woye biribi. *Wo-bɔ* adeɛ a na ekwere se wode biribi a ebi nni wiase aba. Esiane se Onyankopɔn na odii kan yee onipa nti, yeka se ono na *ɔ-bɔɔ* onipa. Se ebia:

(181) ii. Onyankopɔn na *ɔ-bɔɔ* wiase.

Nhwɛsɔɔ (181ii) asekyere ne se Onyankopɔn na oyee wiase anaa ode wiase baee.

(182) Akokɔ *bɔ* mma

Se adeɛ *bɔ* a na ekwere se emu apae anaa adwa. Mpre pii no, se adeɛ *bɔ* a eye a biribi taa firi mu pue. Akokɔ *bɔ* mma a na ekwere se wapaepae ne nkosua mu ama ne mma (akokɔ mma) apuepue afiri mu, anaase wahwane mma anaa ode mma aba wiase.

(183) i. *Bɔ* ma

Se adeɛ bi *bɔ* ma a na ekwere se afa ade dodoɔ a n'ahɔɔden betumi afa awie, ne saa nti se wode biribi gu anaa hye mu bio a enye yie, ebeku so. Nneɛma a etumi *bɔ* ma bi ne adaka, bɔɔ, toa, ankore anaa edan. Se ebia:

(183) ii. Asɔredan no a-*bɔ* ma sei pe.

Nhwɛsɔɔ (183ii) asekyere ne se asɔredan no afa nnipa dodoɔ a ebetumi afa awie, ne saa nti onipa biara ntumi nwura mu bio mma no nyeye yie.

(184) *Bɔ* sekan ano

Wo-*bɔ* sekan ano a na  $\epsilon$ kyere se wose ma ano aye nam sedee ebeye a wobetumi de adɔ yie anaase wobetumi de atwitwa nneema. Se yerebɔ sekan ano a, yetaa de twitwi dadee anaa bɔɔ so mpre pii senea ebetumi ama sekan no ano aye nam. Mpre pii no, sekan mono na eye a yetaa bɔ ano. Eto da nso na yede sekan bi di dwuma ma ano kum na se yede di dwuma na enye yie bio a, yetumi bɔ ano ma ano sane ye nam bio.

(185) *Bɔ* atadee ho

*Bɔ* metafo nkyereasee wo ha ne se ma biribi nye ketewa kakra. Wobɔ atadee ho a na  $\epsilon$ kyere se wode afidie anaa panee pam atadee ho ma no ye ketewa kakra. Se atadee bi so na ene obi ho nye pe a na obɔ ho, sedee ebeye ketewa kakra ama ene ne honam aye pe na watumi ahye ama no aye yie.

#### 4.4.2 *Bu* Anantebɔ (Bu Collocants)

Ofa-nkorabata yi nso kyere nsemfua bi a etaa ne adeye *bu* nante bom ma yen metafo nkyereasee ahodoɔ. Enonom na edidi soɔ no:

(186) *Bu* nkotodwe

*Kotodwe* ye pɔ a ewɔ faako a onipa nan ne ne sre hyia no. *Bu* nso asekyere wo ha ne se biribi mu koa. Se obi bu nkotodwe a, okoto na ode ne nipadua akwaa a yefre no nkotodwe no asisi fam. Se obi de asem reto onipa anaa tumi bi a owɔ obuo ma no anim a, otumi bu nkotodwe na waka n'asem akyere no. Wei tumi ko so bere a obi rebɔ mpaee. Eto da nso na obi fom a, wotumi ma onipa no bu nkotodwe de twe n'aso wo bone a waye no ho. Wei taa ko so wo sukuu mu ne nteteebea ahodoɔ.

(187) *Bu* mfumpaa

Se obi bu mfumpaa a, oda fam, danedane ne ho, ko ha, ba ha, atifi ne anaafɔɔ, soro ne fam wo bere a wate anigyesem anaase awerehosem bi. Se obi te asem yaayaa te se

ɔhwere ne dɔfo, n'agyapadee anaa adee bi a esom bo ma no a, ɔtumi bu mfumpaa de twa adwo. Mmɔfra nso taa bu mfumpaa bere a wɔredi agoro wɔ ketee so anaase agoprama so. Sebe, eto da nso na ɔbarima ne ɔbaa bi rehyia mu wɔ ketee so a, wɔtumi ka se wɔrebu mfumpaa. Wei taa si bere a ɔmanfoɔ pe se wɔka ɔbarima no ne ɔbaa no nhyiamudie ho asem to mu nkyene.

(188) *Bu* mmara so

Mmara ye nhyehyeee a ebɔ ekuo, kuro anaa ɔman bi ho ban. Se wobu mmara a na ekyerɛ se wode anidie ma ekuo anaa ɔman bi nhyehyeee. Na mmom se wobu mmara so a na ekyerɛ se wosee mmara. Ene se, woto anaa womfa ekuo, kuro anaa ɔman bi nhyehyeee nye adwuma. Mpre pii no, se obi bu mmara so a eye a mpanimfoɔ twe n'aso, esiane se wɔhunu se mmaratofɔɔ no de kuo anaa ɔman no anim atwitwi fam. Onipa a ɔtaa bu mmara so no, eye a ɔmanfoɔ hunu no se ɔnni ahohyesoɔ anaa ɔnni ne ho ni, enti eye a wɔtaa bu no animtia.

(189) i. *Bu* ban

*Ban* ye ɔfasuo a wɔto de gye biribi te se edan ho. Se obi bu ban a na ekyerɛ se wasee ɔfasuo a wɔto de agye adee bi ho. Nkasae wei metafo nkyerɛasee ne se obi adi bone na wadwane afiri edan bi a wode no akɔhye mu mu. Se ebia:

(189) ii. Antwi a-*bu* ban.

Nhwesoɔ (189ii) metafo nkyerɛasee ne se Antwi adi bone ama wɔakye no akɔto afiase ama wadwane afiri afiase ho a wɔhwehwe no baabiara a wɔnhunu no.

(190) i. *Bu* nsa'

*Nsa'*ye onipa akwaa a efiri abati kopem abakon. *Wo-bu* wo nsa a na ekyerɛ se woapira ama wo nsa mu akye mmienu. Metafo nkyerɛasee mu no, se ɔbaa bi bosome so ma ɔhunu mogya wɔ ne nipadua mu anaase ɔye mmaayodee a, yeka se wabu ne nsa. Se ebia:

(190) ii. Eno a-*bu* ne nsa’

Nhwesoo (190ii) metafo nkyereasee ne se Eno bosome aso ama wahunu mogya wo ne nipadua mu anaase sebe, wakyima.

(191) i. A-*bu*

Biribi *bu* a na ekyere se asee. Metafo nkyereasee mu no, *bu* ne se biribi dooso anaase eye bebre. Adee bi bu a na ekyere se adoo, ne saa nti se worepe bi a wommre koraa na wo nsa aka bi. Mpre pii no se adee bi bu a ema ne boo nso ye fo. Se ebia:

(191) ii. Ntoosi a-*bu* wo Akumadan.

Nhwesoo (191ii) metafo nkyereasee ne se ntoosi bebre wo Akumadan, ne saa nti se worepe ntoosi ato wo ho a wommre koraa na woanya bi. Esiane se ntoosi dooso wo ho nti ama ne boo nso aye fo wo ho pa ara.

(192) *Bu* ka

Wobu ka a na ekyere se woakye eka mu ama obi. *Bu* metafo asekyere ne se ka asem kyere obi. Wobu obi ka a na ekyere se woasese anaa woaka sika a ewo se otua wo biribi ho akyere no. Wotumi bu obi ka ma no bere a wakoto adee wo dwa so na woreka adee no boo ama watua. Eto da nso na obi to mmara anaase odi biribi ho fo wo asennie mu na ewo se otua ho ademadee a, mpanimfo bu ne ka ma no tua.

(193) i. *Bu* nkompoo

*Nkompoo* firi nsemfua *koo* ne *po* mu. *Koo* ye honam akwaa a eka etire ne abati, bo ne akyi bo mu. Enna *po* nso ye faako a nneema mmienu bi hyia. *Nkompoo* ye baabi a onipa koo ne ne ti hyia. *Bu* metafo asekyere ne se dane wo ho hwe biribi. Adee a atwam na yebu nkompoo hwe. Metafo nkyereasee mu no, wobu nkompoo a na ekyere se woatwa w’ani ahwe sedee na adee bi tee wo bere bi a atwam. Woresusu sedee na adee bi di mu anaa sedee na esom bo fa wo bere bi a atwam. Eto da na yere se yede biribi toto



adee bi a atwam ho a, yetumi twa yen ani kohwe ade korɔ no na yede aye ntotoho afa adee bi a ewɔ ho nne yi ho. Wei na yefre no ‘nkɔmpɔbuo’. Yetumi bu nkɔmpɔ hwe ade pa ne ade bɔne. Obi tumi sua adee firi biribi a atwam ho ma εboa n’abrabɔ. Sɛ ebia:

(193) ii. Sɛ ye-*bu nkɔmpɔ* a, yɛhunu sɛ kane no na nnipa nyini kyɛ.

Nhwɛsoɔ (193ii) asekyere ne sɛ, sɛ yetwa yen ani hwe tete ho no a, yɛhunu sɛ na nnipa nyini nya mfeɛ dodoɔ ansa na wɔakɔ wɔn kra akyi, nanso nne yi deɛ ente saa.

(194) i. *Bu* dɔ

Asemfua *dɔ* asekyere ne sɛ obi pɛ ɔfoforo asem pa ara na ɔwɔ anigyee, ɔpɛpa anaa atenka ma no. *Bu* nso metafo asekyere ne sɛ wonya atenka bi wɔ wo wedee anaa wo nipadua mu. Sɛ wobu dɔ ma obi a na ekyerɛ sɛ onipa no ho ye wo fɛ, anaase wada nneyee bi adi akyerɛ wo ama w’ani agye ne ho, a sɛ wonya kwan a wo ne no betena sɛ awarefoɔ. Sɛ ebia:

(194) ii. Adu a-*bu* dɔ ama Akua.

Nhwɛsoɔ (194ii) ye abeefo kasa a ekyerɛ sɛ Adu anya anigyee anaa ɔdɔ sononko ama Akua, a sɛ ɔnya no a ɔbeware no.

#### 4.4.3 Hye Anantebo (Hye Collocants)

ɔfa-nkorabata yi nso kyerɛ nsemfua bi a etaa ne adeye *hye* nante bom ma yen metafo nkyerɛaseɛ ahodoɔ. Enonom na edidi soɔ no:

(195) *Hye takrawɔgyam*

Asemfua *takrawɔgyam* wɔ mɔɔfem nnan a ene /takra-, -wɔ-, -egya-, -mu/. *Takra* ye adee bi te sɛ nwi a ekata anomaa ho. Sɛ takra tɔ egya mu a enkye koraa na ahye aseɛ. *Takrawɔgyam* ne sɛ obi tutu nsem bɔne gugu adɔfoɔ bi asom ma etumi de ntawantawa bɛto adɔfoɔ no ntam ma ɔdɔ a ewɔ wɔn ntam no sɛɛ. *Hye* metafo

nkyereasee ne se obi kowura baabi di dwuma bi. Wohye takrawogyam a na ekyere se wokohunta baabi tutu nsem a enye nokore gugu adofoo bi asom ma etumi de ntawantawa beto adofoo no ntam. Onipa a ohye takrawogyam ye obi a ofa akwannuasa so ko ofoforo dfo nkyen kokeka onipa no ho nsem kyere ne dfo no. Ofiri ho a na wasane de n'ani akyere onipa no ho na wakokeka onipa no dfo ho nsem nso akyere no. Esiane se takrawogyamhye tumi de ntawantawa beto adofoo ntam nti, obi a odi saa dwuma no eye a yentaa mpe n'asem. Yebehunu asenka yi bi wo Mmabusam 6:19 ese, "Odansekurumfo a ohunu atoroem, ne dee o-hye anuanom ntam *takrawogyam* ye Awurade akyiwadee."

(196) i. *Hyē nyinsēn*

*Nyinsēn* ye tebea a obaa ko mu ma abodoma beda n'awodee mu. *Hyē* nso asekyere wo ha ne se adee bi wo baabi. Nkasae wei aniani nkyereasee ne se obi de abodoma wura obaa bi awodee mu. Ne metafo nkyereasee ne se obarima ne obaa bi ada ama obaa no afa afuro. Se ebia:

(196) ii. Kwame a-*hyē* Afia nyinsēn.

Nhwesoo (196ii) metafo asekyere ne se Kwame ne Afia adi mpa so agoro ama Afia ho adane a ebema no awo oba bere bi a ebaba.

(197) *Hyē nsa*

*Nsa* ye anomdee a wonya firi biribi te se abe, adobe, ahwede ne ade mu a ebi tumi bo. *Hyē* asekyere wo ha ne se obi de grawa anaa koo po susu biribi te se nsa. Wohye nsa a na ekyere se wohwie nsa firi adee bi te se ankore, galon anaa toa mu gu koo po anaa koraa mu ma obi. *Hyē* nkyereasee bio ne se kra obi se omfa adee bi mmre wo. Enti nkasae 'hye nsa'sane kyere se kra obi se omfa nsa mmekye wo anaase omfa mmre wo na to. Adeye *hye* nkyereasee mmienue a ewo nkasae wei mu ye homografo (homographous).

(198) i. *Hyε* bankye

Wohye bankye a na ekyerε se wode bankye agu biribi te se bɔtɔ mu. Se okuani bi nso redua bankye wɔ n'afuo mu a, yεka se ɔrehyε bankye. *Hyε* nkyerεaseε mmienu a εwɔ nkasaeε 'hyε bankye' mu ye pɔlesemi, εfiri se yehunu se bankye no wɔ baabi. Nkasaeε 'hyε bankye' sane tumi kyerε, se wokra okuani bi se ɔntu bankye mmεkyε wo anaase ɔmfɔ mmre wo na tɔ. Se ebia:

(198) ii. Adom *hyε-ε* bankye wɔ bɔtɔ mu.

(198) iii. Fosu *hyε-ε* papa no b́ankye.

Nhwεsɔɔ (198ii) asekyerε ne se Adom de bankye guu bɔtɔ mu. Enna nhwεsɔɔ (198iii) nso asekyerε ne se Fosu kraa papa no se ɔmmre no bankye.

(199) *Hyε* no ma

Asemfua 'ma' asekyerε ne se nsuo, aduane, nnipa anaa nneεma a εwɔ biribi mu anaa baabi dɔɔsɔ na wɔde bi ka ho a εnye yie anaase ebi nkɔ mu bio. Wohye biribi ma a na ekyerε se wode adeε bi te se nsuo, nsa, εmo anaa gari agu biribi te se kɔɔpɔ, grawa anaa ankore mu ama no aduru mpεmpεnsɔɔ a se wode bi gu mu bio a εnye yie. *Hyε* metafɔ asekyerε ne se woboa obi. Metafɔ nkyerεaseε mu no, se wohye obi ma a na ekyerε se woaboa no ama wayε den akyεn senea na ɔteε kane no sεdeε εbeyε na ɔbetumi adi dwuma bi ama no ayε yie.

(200) i. Hye-*hyε* hɔ

Se mmoa anaa nnipa bi wɔ beaeε bi te se εdan mu a, yetumi ka se wohye-*hyε* hɔ. Metafɔ nkyerεaseε mu no, yεka se ɔbaa ne ɔbarima bi hye-*hyε* hɔ a na ekyerε se wɔretwe mpena a wɔn mpenatweε no nhyεε da mpueεε mmaa nnipa dodoɔ no ara nhunuie. Se ebia:

(200) ii. Pokuaa ne Safo hye-*hye* ho.

Nhwesoo (200ii) metafo nkyereasee ne se Pokuaa ne Safo retwe mpena a won mpenatwee no nhyee da mpueee mmaa nnipa dodoo no ara nhunui.

(201) i. *Hyē* n'afono mu

Afono ye honam akwaa mremre bi a ewo onipa anim, ewo n'ani ase, aso ne ano ntam, eye mmien, benku ne nifa. Wohye obi afono mu a na ekyerē se wode biribi awura n'afono mu. Metafo nkyereasee mu no, se wohye obi afono mu a na ekyerē se wode adanmudee (biribi te se sika anaa akyedee biara a emfa mmara kwan so) ama no se omfura nokore so ntama na onni dwuma bi mma wonnya ho mfasoo. Se ebia:

(201) ii. Asoma *hye-ε* polisini no afono mu.

Nhwesoo (201ii) metafo nkyereasee ne se Asoma maa polisini no adanmudee se omfura nokore so ntama na onni dwuma bi mma ono Asoma nnya ho mfasoo.

(202) *Hyē* kutupa

*Kutupa* ne se obi ye ade bone anaa adee a enye. *Hyē* nso asekyere ne se wodi dwuma bi. Wohye onipa bi kutupa a na ekyerē se woma no akwankyerē bone ma okoye adee bi a enye. Se wohye onipa bi kutupa a, nea woahye no kutupa no tumi nya ahoo den sononko de di bone, esiane akwitae bi a wanya nti.

(203) *Hyē* mu kena

Wohye adee bi mu kena a na ekyerē se woama no asi pi, asi ta, anaa awie peye. Se wode biribi foa adee bi so anaa wode tae akyire ma no di mu a, yeka se woahye mu kena. Akanman mu se wode asem koto mpanimfo anim se wonni a, woma wode biribi te se sika, nsa anaa ade titire bi tae akyire de hye mu kena de kyerē se, asem no hia wo nti wontena so nka. Se wrekogyee awaree ama obarima bi nso a, obaa no abusuafo ma obarima no bo kokoko de biribi te se nsa ne sika tae akyire de hye

awaree no mu kena. Wei kyerε se ɔbarima no wɔ ɔpe pa se ɛrenkyε koraa ɔbeware ɔbaa no. Enti wohyε adeε bi mu kena a na ɛkyerε se woayε biribi ama adeε no adi mu.

#### 4.5 Nsem no Mpensempensemu wɔ Adwenemusem Metafo Tiori ne Adwenemu Semanteks mu

Senea Lakoff ne Johnson (1980) kyerε mu no, metafo ne se asemfua bi anya nkyerεaseε ntrεmu. Nwomanipfo yi hunu metafo se ɛyε adwenemusem, na ɛyε lengwesteks fa bi a ɛma nteaseε. Ne saa nti se obi bεte asemfua bi metafo ntrεmu ase a gye se ɔwɔ kasa no ho nimdeε. Lakoff (1988) nso kyerε adwenemu semanteks mu se ɛyε tiori a ɛkyerε se yegyina yen nimdeε ne yen suahunu a yewɔ fa ɔkasa bi ho so na yede te asemfua anaa lengwesteks nkasaeε bi ase.

Senea Bolinger (1975) kyerε mu no, nneema a ɛboa ma yenya lengwesteks nkasaeε bi asekyerε ye senea yede nkasaeε no adi dwuma (context of use) ne nsemfua a ɛne asemfua bi di dwuma bom (collocation).

Agyekum (2013) da no adi se asemfua bi metafo nkyerεaseε tumi ye semanteks ntrεmu kakra bi na ɛyε a ɛbeka asemfua no nkyerεaseε ankasa ho, ebi nso wɔ hɔ a ne nkyerεaseε ankasa ne ne metafo nkyerεaseε no mu twe.

Atɔ dwa wɔ nhwehwemu-dwuma yi mu se adeyε *bɔ*, *bu*, *di* ne *hyε* mu biara wowɔ ne nkyerεaseε ankasa ne ne metafo ntrεmu ahodoɔ. Adeyε yi bi metafo ntrεmu ne wɔn nkyerεaseε ankasa bembɛn anaase wɔwɔ twaka kakra. Wei na Agyekum frε no metafo a ne nkyerεaseε wɔ hɔ (living metaphor). Adeyε yi bi nso metafo ntrεmu tumi sesa koraa firi wɔn nkyerεaseε ankasa ho. Agyekum frε wei nso metafo a ne nkyerεaseε ayera (dead metaphor). Ansa na wobɛtumi ate adeyε yi mu biara metafo dwumadie ase no, gye se wohwε faako a yede adeyε no adi dwuma ne nea yereka ho asem

(concept). Bio, nsemfua a ene adeye yi di dwuma bom (collocation) nso boa ma yɛnya adeye no metafo nkyerɛaseɛ sɛnea Bolinger kyere mu no.

Nokore wo adwenemu semanteks fapem a ene se yegyina yen nimdee ne osuahunu a yewo fa okasa bi ho so na yede te lengwesteks nkasae bi ase no mu. Ene se, ansa na obi bete adeye yi metafo ntrɛmu ahodoɔ ase no, gye se wo Akan kasa no ho nimdee mapa, esiane se adeye yi bi metafo ntrɛmu bɛnya nkyerɛaseɛ a emu do pa ara.

Ne tiawatwa mu no, se obi gyina adwenemusem metafo tiori ne adwenemu semanteks so a, ebeboa no ama wate adeye *bo*, *bu*, *di* ne *hye* a mede yee nhwehwemu-dwuma yi nkyerɛaseɛ ahodoɔ ase. Enam wei so na emaa megyinaa tiori mmieny yi so de yee me mpensempensenmu wo nhwehwemu-dwuma yi mu no.

#### 4.6 Ofa yi Muabo

Dwumadie yi fa a eto so nnan ahwe adeye *bo*, *bu*, *di* ne *hye* a mede yee nhwehwemu yi nkyerɛaseɛ ankasa ne won nkyerɛaseɛ ahodoɔ. Asane ahwe nsemfua ahodoɔ a yefa mofologyi akwan te se edinye ne nsemfua nkabomye so nya firi adeye yi mu ne won nkyerɛaseɛ ahodoɔ. Ofa yi sane hwee nsemfua bi a etumi ne adeye: *bo*, *bu* ne *hye* nante bom (collocation) ma yen nkyerɛaseɛ ne metafo ntrɛmu ahodoɔ. Ofa yi nkorabata a etwa toɔ nso de nsem no mpensempensenmu wo adwenemusem metafo tiori ne adwenemu semanteks mu too dwa. Ofa a eto so nnum no de nhwehwemu-dwuma yi muabo, m'adwenkyere ne n'awicee to dwa.

## ƆFA A ƐTƆ SO NNUM

### MUABƆ, ADWENKYERƐ NE AWIEƐƐ

#### 5.0 Nnianimu

Nhwehwemu-dwuma yi fa a ƐtƆ so nnum da dwumadie no nyinaa muabƆ adi. Ɔfa yi mu ara na mede m'adwenkyerƐ fa dwumadie yi ho nso bɛto dwa. Ɔfa yi nkorabata a Ɛtwa toƆ nso de dwumadie no awieƐƐ bɛto dwa.

#### 5.1 Dwumadie yi Nyinaa MuabƆ

Dwumadie yi ye mɔfɔ-semanteks mpɛnsɛmpɛnsɛnmu a Ɛfa Akan adeye *bɔ, bu, di* ne *hyɛ* ho. Dwumadie yi ahwe adeye yi nkyerɛaseɛ ankasa ne wɔn nkyerɛaseɛ ahodoɔ. Ɛtɔɔ dwa sɛ adeye *bɔ, bu* ne *hyɛ* mu biara wowɔ pɔlesɛmi nkyerɛaseɛ. Ɛsane tweɛ adwene sii so sɛ mɔfɔlɔgyi nhyehyɛɛ te sɛ edinyɛ ne nsemfua nkabomyɛ na yɛfa so de nya nsemfua afoforɔ firi saa adeye yi mu.

Nsemfua ahodoɔ a menya firii adeye yi mu nhyehyɛɛ tumi yɛ; nsianim + adeye + adeye, nsianim + adeye + edinakyisibea + nsiakyire, nsianim + adeye + edinakyisibea + edin, nsianim + adeye + adeye, edin + edin + adeye, nsianim + adeye + adeye + edin, nsianim + adeye + adeye, edin nkyerɛkyerɛmu + adeye + nsiakyire, nsianim + adeye + adeye + adeye, nsianim + adeye + edin, edin + adeye + nsiakyire, edin nkyerɛkyerɛmu + adeye + nsiakyire, nsianim + adeye + edin + adeye + nsiakyire, ɔkyerɛfoɔ + adeye + nsiakyire, nsianim + adeye + adeye + nsiakyire, adeye + adeye + nsiakyire, nsianim + adeye + edinakyisibea, edin + adeye + edin, edin + edinakyisibea + adeye + adeye, edin + edinakyisibea + adeye, nsianim + edin + adeye + edin nkyerɛkyerɛmu, adeye + edin, adeye + adeye, nsianim + edin + adeye + edinakyisibea, ne ade.

Sɛnea Aronoff ne Fudeman (2005) da no adi no, nsemfua nkabomyɛ ye ɔkwan sononko a yɛfa so de ye nsemfua afoforɔ firi nsɛnkuo bi mu. Nsemfua afoforɔ a

menya firii adeye no mu nyinaa ye nkabom (compounds). Saa ara nso na nsemfua afoforo a menya firii adeye no mu nyinaa ye edin nsemfua (nominals). Dwumadie yi si Appah (2016) nhwehwemu so dua se yetumi fa nsemfua nkabomye so de nya edin firii adeye mu.

Nsemfua ahodoɔ a mefaa edinye ne nsemfua nkabomye so nya firii adeye yi mu no, mesane hwɛɛ wɔn nkyerɛaseɛ ahodoɔ. Ɛdaa adi wɔ nhwehwemu-dwuma yi mu se adeye yi mu biara anyinya metafo ntrɛmu ahodoɔ. Yɛhwɛ adeye *bo* a, se yiyi ne nkyerɛaseɛ ankasa a ene, “se obi de ne nsa anaa ne honam akwaa bi anaa biribi hwe obi anaa biribi (mu)” to nkyɛn a, anyinya nkyerɛaseɛ ne metafo ntrɛmu ahodoɔ bi te se, se biribi mu dwa, tue, pae anaa tokuro beda ho; se wode asem to obi anim; se wode biribi te se ahoma, belete anaa wɔkye fam onipa akwaa bi te se ne sisi anaa ne nsa; se obi de ne ho kɔbata ɔfoforo ho; se obi di dwuma bi; se wokata biribi so, ne ade. Yesane hunuu no wɔ nhwehwemu-dwuma yi mu se adeye *bo* tumi ne nsemfua bi di dwuma bom (collocation) ma yenya nkyerɛaseɛ ne metafo ntrɛmu ahodoɔ nso firii mu.

Ato dwa se adeye *bu* nso, se yeyi ne nkyerɛaseɛ ankasa a ene, “se biribi mu kye mmieniu” to nkyɛn a, anyinya nkyerɛaseɛ ne metafo ntrɛmu ahodoɔ bi te se, se obi koa biribi mu ma afaafa no ano hyia ma adeɛ no ye ketewa; se obi de anidie ma ɔfoforo; se obi fa nyansakwan so anaa esum ase sisi obi wɔ sika anaa biribi mu; se obi toto nneɛma de hwehwe ekuo, kuro anaa ɔman bi kankɔ; se wode nyansasɛm bi to dwa; se wokeka nneɛma bi bobɔ so; se biribi seɛ, ne ade. Dwumadie yi sane twee adwene sii so se adeye *bu* ne nsemfua bi nso tumi di dwuma bom (collocation) ma yenya nkyerɛaseɛ ne metafo ntrɛmu ahodoɔ firii mu.

Asane ato dwa wɔ nhwehwemu-dwuma yi mu se, se yeyi adeye *di* nso nkyerɛaseɛ ankasa a ene, “se obi de aduane to n’anom (wesa) mene” to nkyɛn a, anyinya nkyerɛaseɛ ne metafo ntrɛmu ahodoɔ bi te se, se adeɛ bi beye obi dea; se wode asem



bi to dwa; se wode asem to obi anim; se wodi dwuma ma obi nya ho nsunsuanso bone; se woye nhwehwemu do asem bi mu asuko de pe ne pomasiberε, ne ade.

Ada adi wo dwumadie yi mu nso se adeye *hyε* nkyereaseε ankasa a ene, “se obi de afadeε te se mpaboa, atadeε, εkyε anaa kawa siesie ne ho” da nkyen a, anyinya nkyereaseε ne metafo ntrεmu ahodoε a ebi ne, se obi koka kyere odwumfoε bi te se otomfoε anaa kapenta se onye nneεma bi te se aso anaa mpa mma no; se obi de biribi te se aburoo anaa εmo sie san anaa apata so ma εwo na εtumi kye nso; se obi de tumi anaa ahunahuna ma oforoε ye biribi a enye ne pe; se wonya biribi; se obi ka nea εbesi daakye, ne ade. Esane daa adi se adeye *hyε* wowo nsemfua binom a εtumi ne won di dwuma bom ma yεnya nkyereaseε ahodoε firi mu.

Se yehwe adeye *bo, bu, di* ne *hyε* nkyereaseε ahodoε a yεahunu no wo nhwehwemu-dwuma yi mu a, εmu biara baεε enam senea yεde adeye no dii dwuma faεε ne adeε ptee a na yereka ho asem nti. Ne saa nti na megyinaa adwenemusem metafo tiori ne adwenemu semanteks so de yεε nsem no mpensempensemmu no, senea εbeboa ama yεate won nkyereaseε ahodoε no ase yie.

Nea apue afiri nhwehwemu yi mu ma me ne Agyekum (2013) ye adwene se asemfua bi nkyereaseε ankasa ne ne metafo nkyereaseε ntam tumi twe, wei na Agyekum fre no metafo a ne nkyereaseε ayera (dead metaphor) no. Efiri se, se yehwe adeye a mede yεε nhwehwemu yi metafo nkyereaseε ahodoε wo dwumadie yi mu a, yεhunu se won nkyereaseε ankasa ne won metafo ntrεmu binom ntam twe.

Afei, adeye a mede dii dwuma yi nyinaa taa ne edin na εkeka bom ma yεnya nsemfua aforoε a εye edin nkabom. Bio, nsemfua nkabom no mu dodoε no ara nso ye nea yetumi gyina won ti so nya won nteaseε, a mpre pii no won ti no wowo nsemfua nkabom no benkum so (most of the compounds are endocentric and predominantly left-headed). Nsemfua nkabom yi mmoano da adi wo nkekaho a εdi kan (Appendix I)

no mu. Bio, edin nsemfua nso na etaa ne adeye no nante bom (collocation) ma yenya won nkyereasee ne metafo ntramu ahodoɔ. Saa anantebo yi nso da adi wo nkekaho a eto so mmieniu (Appendix II) no mu.

Adeye no metafo nkyereasee ntaa nnyina adeye no nko ara so, na mmom se adeye no ne nsemfua bi keka bom anaa di dwuma bom a na yenya won metafo nkyereasee ahodoɔ no. Ne saa nti ansa na obi betumi ate adeye no metafo dwumadie ase yie no, gye se ohwe nsemfua a ene adeye no di dwuma bom ne adee pɔtee a okasafɔ no pe se oka ho asem anaa ode to dwa, ansa na wate adeye no metafo dwumadie ase.

## 5.2 Adwenkyere

Se yehwe nsemfua ne nkyereasee ahodoɔ a yeanynya afiri adeye *bo*, *bu*, *di* ne *hye* mu a, e da adi pefee se emu biara betumi de nsemfua ahodoɔ abeka Akan kasa no nsemfua ho. Nhwehwemu-dwuma a efa mɔfo-semanteks ho nhye da nnɔso wo Akan kasa mu, enti mesusu se nwomanimfoɔ nye mɔfo-semanteks nhwehwemu ahodoɔ mfa adeye nkaee ho wo Akan kasa mu. Wei beboa ama yeahunu nsemfua ne nkyereasee ahodoɔ a yebetumi anyinya afiri adeye mu wo Akan kasa mu, na aboa ama yen kasa no anyini.

## 5.3 Awiee

Nhwehwemu-dwuma yi ye mɔfo-semanteks mpensempense nmu a efa Akan adeye *bo*, *bu*, *di* ne *hye* ho. Ama yeahunu adeye yi mu biara nkyereasee ankasa ne ne nkyereasee ahodoɔ. Asane ato dwa se mɔfoɔlogyi nhyehyee te se edinye ne nsemfua nkabomye na yetumi fa so de nya nsemfua afoforo afiri adeye yi mu. Yehunuu se nsemfua afoforo a yenya firii adeye no mu nyinaa nso ye edin. Asane ada adi wo dwumadie yi mu se nsemfua afoforo no wowo nkyereasee ne metafo ntramu ahodoɔ. Nhwehwemu-dwuma yisane twee adwene sii nsemfua bi a etumi ne adeye no di dwuma bom ma yen nkyereasee ahodoɔ nso. Tiori a megyinaa so de yee nsem no mpensempense nmu ye adwenemusem metafo tiori (Lakoff ne Johnson, 1980) ne

adwenemu semanteks (Lakoff, 1988). Tiori mmienu yi aboa ama nsem no mpensempensenmu adi mu wo dwumadie yi mu. Dwumadie yi nam tiori yi so atwe adwene asi so se metafo ye adwenemusem, na eye lengwesteks fa bi a ema nteasee ampa. Ama ada adi se ansa na obi betumi ate asemfua bi metafo ntramu ase no, gye se ohwe senea yede asemfua no adi dwuma afa, na osane gyina ne nimdee ne ne suahunu a wo fa kasa no ho so.



## MMOA NWOMA

- Adomako, K. (2015). Some Phonological Processes in an Akan Linguistic Game. *Linguistik Online* 72, 3/15-<http://dx.doi.org/10.13092/1o.72.1970>.
- Adomako, K. (2013). Underapplication in Akan Loanword Adaptation. *International Journal of Linguistics*, 5(5), 174-197.
- Adomako, K. (2012). Verbal Nominalization as a Derivational Process: The Case of Akan. *Ghana Journal of Linguistics*, 1(2), 43-64.
- Agyapong, M. E. (2012). *Metaphorical Extensions of Ho, Aso, Adwene and Tekrema*. MPhil Thesis, University of Education, Winneba.
- Agyapong, M. R. (2013). *Akan Nsemfuafem ho Nhwewemu wa Mɔfo-fɔnɔlɔgyi Kwan so*. MPhil Thesis, University of Education, Winneba.
- Agyekum, K. (2013). The Pragmatics of Mouth Metaphors in Akan. *Ghana Journal of Linguistics*, 2(1), 1-17.
- Agyekum, K. (2011). *Akan Kasadwini*. Accra: Dwumfuor Enterprise.
- Agyekum, K. (2010). *Akan Kasa Nhyehyee*. Accra: Dwumfuor Enterprise.
- Agyekum, K. (2001). Hunu Nominals in Akan. *The Journal of Ghanaian Languages*, 1(1), 30-34.
- Agyepong, P. D. (2017). *Cutting and Breaking Events in Akan*. PhD Thesis, University of Cape Town.
- Agyepong, P. D., Amfo, N. A. A., et al (2017). Literal and Metaphorical Usages of Eat and Drink in Akan. *Nordic Journal of African Studies*, 26(1), 62-78.
- Akmajian, A. D. (2001). *Linguistics: An Introduction to Language and Communication*. Cambridge, M A: MIT Press.
- Akrofi, C. A. (2011). *Twi Kasa Mmara*. Accra: Waterville Publishing House.
- Amuah, J. (2009). *Literature in English for Senior High Schools*. Accra: Aki-Ola Publications Company Ltd.
- Anderson, R. S. (1992). *A Morphous Morphology*. New York: Cambridge University Press.
- Appah, C. K. I. (2016). Akan Verb-Noun Compounds. *Italian Journal of Linguistics*, 28(1), 1-22.
- Appah, C. K. I. (2012). *Construction Morphology: Issues in Akan Complex Nominal Morphology*. PhD. Thesis, Lancaster: Lancaster University.

- Appah, C. K. I. (2009). *Compounding in Akan: Universals and Typology in Word Formation*. Kosice: Slovakia.
- Appah, C. K. I. (2003). *Nominal Derivation in Akan: A Descriptive Analysis*. MPhil Thesis, NUST, Trondheim: Norway.
- Aronoff, M. & Fudeman, K. (2005). *What is Morphology?* Oxford: Blackwell Publishing.
- Aronoff, M. (1976). *Word Formation in Generative Grammar*. Cambridge, M A: MIT Press.
- Barnabas, L., Wappah, J. P., et al (2013). A Morphosemantic Analysis of the Kamue Personal Names. *International Journal of English Language and Linguistics Research* 1(2), 1-12.
- Baruah, T. C. (2006). *The English Teacher's Handbook*. New Delhi: Sterling Publishers Private Limited.
- Boadi, A. L. (2016). *The Syntax and Semantics of the Akan Verbal Affixes*. Tema: Ghana. Digibooks Ghana Ltd.
- Bodomo, A. B. (1997a). *The Structure of Dagaare*. Stanford Monographs in African Languages. Stanford: CSLI Publications.
- Bolinger, D. (1975). *Aspects of Language*. New York, Chicago, San Francisco, Atlanta: Harcourt, Brace Jovanovich, Inc.
- Buernortey, A. J. (2013). *Polysemous and Metaphorical Analysis of Some Dangme Verbs*. MA Thesis, University of Education, Winneba.
- Bybee, L. J. (1985). *Morphology. A Study of the Relation Between Meaning and Form*. Amsterdam: John Benjamins Publishing Company.
- Carnie, A. (2013). *Syntax: A Descriptive Introduction*. (3<sup>rd</sup> ed.). Malden, MA & Oxford: Wiley-Blackwell.
- Christaller, J. G. (1933). *A Dictionary of the Asante and Fante Language called Twi*. Basel: Basel Evangelical Missionary Society.
- Christaller, J. G. (1875). *A Grammar of the Asante and Fante Language called Twi*. Basel: Basel Evangelical Missionary Society.
- Creswell, J. W. (2009). *Research Design: Qualitative, Quantitative and Mixed Methods Approaches* (3<sup>rd</sup> ed.). Thousand Oaks, CA: Sage Publications.
- Creswell, J. W. (1998). *Qualitative Inquiry and Research Design: Choosing Among Five Traditions*. Thousand Oaks, CA: Sage Publications.

- Cruse, A. (2011). *Meaning in Language: An Introduction to Semantics and Pragmatics*. Oxford: Oxford University Press.
- Crystal, D. (2008). *A Dictionary of Linguistics and Phonetics*. Oxford: Blackwell Publishing.
- Dolphyne, F. A. (2006). *The Akan (Twi-Fante) Language: its Sound Systems and Tonal Structure*. Accra: Woeli Publishing Services.
- Dolphyne, F. A. (1988). *The Akan (Twi-Fante) Language: its Sound Systems and Tonal Structure*. Accra: Ghana Universities Press.
- Fromkin, V. & Rodman, R. (1998). *An Introduction to Language*. (6<sup>th</sup> ed.). Philadelphia: Harcourt Brace Publishers.
- Ghana Statistical Service (2010). *Population and Housing Census: Summary Report of Final Results*. Accra: Ghana.  
[http://www.statsghana.gov.gh/docfiles/2010phc/census2010 Summary report of final results.pdf](http://www.statsghana.gov.gh/docfiles/2010phc/census2010%20Summary%20report%20of%20final%20results.pdf).
- Gries, S. T. (2004). Corpus-based Methods and Cognitive Semantics: the Many Senses of to Run. *Journal of Pragmatics* 36: 1189-1210.
- Gruyter, D. W. (2000). *Morphology*. Berlin-New York.
- Hana, J. (2011). *Introduction to Linguistics: Morphology*. Clevedon: Multilingual Matters.
- Hayes, B. (2009). *Introductory Phonology*. Oxford: Blackwell Publishing.
- Hurford, J. R. (2007). *Semantics: A Coursebook*. New York: Cambridge University Press.
- Issah, S. & Adomako, K. (2013). *Introduction to Linguistics*. Koforidua: Pedaddo Ventures.
- Katamba, F. & Stonham, J. (2006). *Morden Linguistics: Morphology*. (2<sup>nd</sup> ed.). London: Palgrave Macmillan.
- Katamba, F. (1993). *Morphology*. London: Macmillan Press Ltd.
- Kirby, J. R. & Bowers, P. N. (2012). *Morphology Works*. Kingston: Queen's University.
- Kovecses, Z. (2002). *Metaphor: A Practical Approach*. Oxford: Oxford University Press.
- Lakoff, G. (1988). *Cognitive Semantics*. California: University of California.

- Lakoff, G. & Johnson, M. (1980). *Metaphors We Live By*. Chicago: University of Chicago Press.
- Legon-Zurich-Trondheim (2011). *Akan Dictionary*. (2<sup>nd</sup> ed.). Legon: University of Ghana.
- Lieber, R. (2009). *Introducing Morphology*. New York: Cambridge University Press.
- Lobner, S. (2002). *Understanding Semantics*. London: University of Dusseldorf.
- Murphy, L. (2010). *Lexical Meaning*. Cambridge: Cambridge University Press.
- Okyere, B. A. (2012). *Golden English for Junior High Schools*. Kumasi: New Golden Publications.
- Osam, E. K. (2003). *An Introduction to the Verbal and Multi-Verbal System of Akan*. In D. Beermann and L. Hellan (Eds.). *Proceedings of the Workshop on Multi-Verb Constructions*. Trondheim Summer School 2003.
- Owu-Ewie, C. (2017). *Introduction to Traditional and Action Research*. Ajumako: College of Languages Education, Ajumako.
- Payne, E. T. (1997). *Describing Morphosyntax: A Guide for Field Linguists*. Cambridge: Cambridge University Press.
- Pierce, M. (1995). *Language Learning and Social Identity*. Clevedon: Multilingual Matters.
- Riemer, N. (2010). *Introducing Semantics*. Cambridge: Cambridge University Press.
- Schneider, N. (2010). *Computational Cognitive Morphosemantics: Modeling Morphological Compositionality in Hebrew Verbs with Embodied Construction Grammar*. *Berkeley Linguistics Society*. Retrieved on 7/12/2018.
- Sekyi-Baidoo, Y. (2013). *Aspect of the Semantics of the Akan Phrasal Verb*. Winneba: University of Education, Winneba.
- Sekyi-Baidoo, Y. (2002). *Semantics: An Introduction*. Kumasi: Willas Press.
- Sweetser, E. (1990). *From Etymology to Pragmatics: Metaphorical and Cultural Aspects of Semantic Structure*. Newcastle-Britain: Atheneum Press Ltd.
- Thakur, D. (2011). *Linguistics Simplified: Semantics*. New Delhi: Bharati Bhawan Publishers & Distributors.
- Thakur, D. (2010). *Linguistics Simplified: Morphology*. New Delhi: Bharati Bhawan Publishers & Distributors.
- The Bible Society of Ghana (2008). *TwerεKronkron: Akan Kasa mu*. Accra: Ghana.

Zeijlstra, H. (2013). *Negation and Polarity*. In M. den Dikken (Ed.). *The Cambridge Handbook Of Generative Syntax* 793-826. Cambridge: Cambridge University Press.





## NKEKAHO I

### DWUMADIE YI MU NSEMFOUA NKABOM BI

Abahyεbɔne	Asennie
Abambuo	Asɔfodie
Abobɔadeε	Asubɔ
Abotire	Atεmmuo
Abɔka	Atennie
Abɔsobaa	Atopabuo
Abɔsɔɔ	Atorɔdie
Adedie	Awerεhyεmu
Adwabɔ	Awudie
Afεkubɔ	Bemdie
Ahyεaseε	Benabɔ
Ahennie	Bɔhyε
Akotiabɔ	Dammɔ
Amammuo	Dawubɔ
Anikyibuo	Dεmdie
Animuonyamhyε	Duabɔ
Apoobɔ	εbεbuo
εkabɔ	Nkurobɔ
Fεwdie	Nsedie
Gyedie	Ntoabɔ
Hwammɔdie	Osebɔ
Hyεberε	Sikadie
Kεtεasehyε	Sugyadie
Kobɔ	Yawdie

Koronobo

Yiedie

Kwaseabuo

Kyenkubo

Mmaabo

Mmarahyɛbadwam

Mpaɛbo

Nhyehyɛɛɛ

Nhyɛsoɔ

Nkonimdie

Nkomhyɛ

Nkuranhyɛ

Nkradie



## NKEKAHO II

### DWUMADIE YI MU ANANTEBO BI

Bɔ abusua	Bɔ wa
Bɔ abubuo	Bu ban
Bɔ adeɛ	Bu dɔ
Bɔ afipam	Bu ka
Bɔ anson	Bu mfumpaa
Bɔ atadeɛ ho	Bu mmara so
Bɔ ban	Bu nkotodwe
Bɔ boɔ	Bu nkɔmpɔ
Bɔ dwɛɛ	Bu nsa'
Bɔ hwii	Hyeɛ ho
Bɔ hyeɛ	Hyeɛ bankye
Bɔ hyire	Hyeɛ kutupa
Bɔ kosua tafere	Hyeɛ mu kena
Bɔ kuro	Hyeɛ n'afono mu
Bɔ ma	Hyeɛ no ma
Bɔ mmɔkwaa	Hyeɛ nsa
Bɔ nkaɛɛ	Hyeɛ nyinsɛn
Bɔ nkwan	Hyeɛ takrawɔgyam
Bɔ no to ho	
Bɔ nwoma	
Bɔ paa	
Bɔ sese	
Bɔ sekan ano	
Bɔ tire nko	

